

Nihánj me se-nanā Jesucristó nanā sa' cachrón síí cu'naj Lucas rihaan yanj a

*Nanā nihánj taj xna'anj se vaa qui'yaj síí cu'naj
Lucas yanj nihánj ca'nej so' rihaan síí cu'naj Teófilo
a*

¹ Dan me se que'eē uxrá yuvij guun rá cachron nica nanā rihaan yanj che'é nu' se vaa qui'yaj Jesucristó sca'núj ní' asij rque doj a.

² Dan me se cachrón nij so' nanā cataj xna'anj nij síí quene'en cunudanj se vaa qui'yaj Jesucristó asij guun che'e so' cayáán so' rihaan chumij nihánj, ne nij síí quene'en ro', me síí ata suun nata' nanā yo' rihaan nu' yuvij a.

³ Ne 'unj nihánj me síí tucu'yón uxrá, don ca'vee narij cunudanj rasuun yo', ne che'é dan vaa che'é cachron nica 'unj cunudanj se vaa qui'yaj Jesucristó rihaan yanj nihánj nayaā so' sij cu'naj Teófilo sij sa' ndo'o, raj adonj.

⁴ Nanj qui'yáj, gaa ne ca'vee guun ya rá so' se vaa ya vaa nu' nanā cataj xna'anj nii rihaan so' che'é Jesucristó adonj.

*Nanā nihánj taj xna'anj se vaa cataj xna'anj
se-mozó Diose se vaa ca'ngaa Juan síí cuta' ne man
yuvij a*

⁵ Gaa cayáán síí cu'naj Herodes síí nicaj suun rey uun chij rihaan estadó Judea, gaa ne 'o xrej canicun' rihaan yuvij israelitá me 'o síí cu'naj

Zacarías, ne cachéé so' ga 'o ta'aj nij xrej, ne ta'níí ta'nij si'no Abías me nij so' a. Ne nica Zacarías me chana cu'naj Elisabet, ne ta'nij 'o xrej me no',

⁶ ne síi yanj sa' rihaan Diose me roj nica roj so', ne sa' uxrá cuno roj so' nu' nij nana me rá Diose cuno ní', ne nuvi' cacun' tumé roj so' a doj a ma'.

⁷ Tzaj ne taj vaj ta'níí roj so', che'é se chana itun me Elisabet adonj. Ne aj cachén ndo'o yo' ne roj nica roj so' nanj á.

⁸ Dan me se gaa natúj nij ta'níí ta'nij si'no Abías qui'yaj suun nij so' se-sun Diose,

⁹ ne 'o güii quiri' ni'yaj Zacarías catuu so' nuvií nocoo caraa so' squíí xlá rihaan ya'an a. 'O se tucuaán nocó' nij xrej me se daj a güii tico tixaj nij so' se-chuvii nij so', se vaa quene'en nij so' a me síi quiri' ni'yaj caraa squíí rihaan ya'an a.

¹⁰ Dan me se catúj Zacarías rque nuvií nocoo, ne xe' nicun' 'o x'ne' yuvij, cachíín ni'yaj nij so' rihaan Diose gaa caraa Zacarías squíí rihaan ya'an a.

¹¹ Dan me se naqui'yaa 'o se-mozó Diose rihaan Zacarías, ne nicun' so' rej nuva' mesá altar acaa squíí a.

¹² Dan me se gaa quene'en Zacarías man se-mozó Diose, gaa ne cuchu'vi' ndo'o so' a.

¹³ Tzaj ne cataj se-mozó Diose rihaan so', ne:

—Se cuchu'ví' so', man Zacarías. 'O se aj cuno Diose nana cachíín ni'yáá so' rihaan so', ne che'é dan cuchruj nica so' Elisabet ta'nij sno'o so' adonj.

¹⁴ Juan tucu'náj so' man so' á. Guun niha' ndo'o rá so', ne guun niha' rá que'ee yuvii asa' ca'ngaa so' adonj.

15 'O se ta'níi so' me síi guun síi sa' ndo'o rihaan Diose nanj adonj. Se co'o so' tzi' se co'o so' rinté se co'o so' ma'. Asij güii ataa ca'ngaa so', ne guun che'e Nimán Diose yo'o cayáán Nimán Diose ga so' nanj á.

16 Ne que'ee síi israelitá canicaj nimán canoco' uún man Diose síi 'nij ra'a man nij so', qui'yaj ta'níi so' adonj.

17 Dan me se guun so' síi ca'anj suun rihaan Diose adonj. Asino ta'níi so' guun che'e ca'mii natáj rihaan yuvii, gaa ne ca'mii síi ca'nej Diose man a. Daj se qui'yaj Nimán Diose, racuíj Nimán Diose man síi cu'naj Elías gaa naá ro', danj qui'yaj guee Nimán Diose, racuíj ndo'o so' man ta'níi so' a. Ca'mii luj yuvii ga ta'níi yuvii, qui'yaj so', natuna nimán nij síi chi'ii cunō nij so' rihaan Diose, qui'yaj so' nanj á. Juan me síi qui'yaj, ne caraya'anj nu' yuvii che'é se ca'na' síi qui'nij ra'a man ní' adonj. —Nu' nana nihánj cataj xna'anj se-mozó Diose rihaan Zacarías a.

18 Gaa ne cataj Zacarías rihaan se-mozó Diose a:
—Asa' ca'vee cuchuman raj se vaa ya ca'mii so' ga. Chii nga mé 'unj nihánj, ne chana chij me nica 'unj nihánj nanj á —taj Zacarías rihaan se-mozó Diose yo' a.

19 Gaa ne cataj se-mozó Diose rihaan Zacarías a:
—Gabriel síi nicun' rihaan Diose mé 'unj adonj. Ma'an Diose me síi ca'née manj ca'naj ca'mij ga so' adonj. Ca'ne' so' suun rihanj se vaa cataj xna'anj 'unj nana sa' nihánj rihaan so',

20 tzaj ne ne cuchuman rá so' nana nihánj, ne che'é dan me guun ya'mii so' adonj. A 'ó nana se ca'vee ca'mii so' ndaa quisij güii quisij ya nu'

nana nihánj ndaa vaa cataj xna'anj 'unj rihaan so' adonj. Ne ya quisij nana nihánj güii aj cachrón Diose adonj. —Danj cataj se-mozó Diose rihaan Zacarías a.

²¹ Dan me se xe' mán nij yuvii, na'vij nij yuvii a me orá curihanj Zacarías rque nuvií, ne caráya'anj nij so' se vaa guun raan so' rque nuvií a.

²² Dan me se gaa curihanj so' rque nuvií, gaa ne ne ca'vee ca'mii so' ga nij so' a ma'. Che'é dan xcaj nij so' cuentá se vaa naqui'yaa 'o rasuun rihaan Zacarías, qui'yaj Diose, gaa nuu so' rque nuvií a. Daj doj ra'a so' tucunó so' che'é se yo'o guun ya'mii so' a.

²³ Gaa cachén Zacarías se-suun Diose, gaa ne quinan' so' tucúa so' a.

²⁴ Cachén doj güii, gaa ne nari' nica so' Elisabet 'o ne'ej a. 'Un' yavii cayáán no' tucúa no',

²⁵ ne nuchruj raá no' nana nihánj a: “Ga naá guun na'aj uxraj rihaan yuvii che'é se chana ituun mej, tzaj ne ndaa yaj racuíj Diose manj á”. Danj guun rá no' a.

Nana nihánj taj xna'anj se vaa cataj xna'anj se-mozó Diose se vaa ca'ngaa Jesucristó a

²⁶ Gaa quisij vatan' yavii cunuû rque Elisabet, gaa ne ca'née Diose man se-mozó so' síi cu'naj Gabriel ca'anj so' ndaa 'o chuman' naj rihaan estadó Galilea chuman' cu'naj Nazaret a.

²⁷ Ne ca'anj cataj xna'anj so' 'o nana rihaan 'o chana yaan cu'naj Mariá a. Aj guun ya xcaj 'o síi cu'naj José man no', ne 'o ta'níi ta'nij si'no síi guun chij ndo'o gaa naá síi cu'naj David me so' a.

28 Gaa ne dan me se cuchi' se-mozo Diose rihaan Mariá, ne cataj so':

—Racuíj Diose mán so' á. 'O se qui'yaj ndo'o Diose se luj che'é so', ne yo'o yáán Diose ga so' á. Sa' doj cavii uruún so' rihaan cunudanij nij chana, qui'yaj Diose a. —Danj cataj se-mozo Diose rihaan Mariá a.

29 Tzaj ne caráya'anj Mariá nana ca'mii se-mozo Diose, ne ne quene'en no' me che'é ca'mii so' nana vaa danj ma'.

30 Gaa ne cataj uún se-mozo Diose rihaan no' a:

—Se cuchu'ví' so', man Mariá. Aran' rá Diose qui'yaj Diose se luj che'é so' á.

31 Nari' so' 'o ne'ej, ne cuchruij so' 'o ne'ej sno'o adonj. Jesús tucu'náj so' man so' á.

32-33 Síi sa' ndo'o guun so', ne ta'níi Diose síi sa' ndo'o me so' adonj. Guun so' síi guun chij rihaan ní', qui'yaj Diose síi 'nij ra'a man ní' a. Ase vaa guun chij xii so' síi cu'naj David rihaan soj sij israelitá gaa naá ro', danj qui'yaj ma'an so' guun chij so' rihaan soj nu' cavii nu' ca'anj adonj. —Danj cataj Gabriel rihaan Mariá a.

34 Ne cataj Mariá rihaan se-mozo Diose, ne:

—Chana yaan mej á. Asa' ca'vee cuchruij 'unij ne'ej, rá so' ga —taj Mariá, xná'anj no' man se-mozo Diose a.

35 Gaa ne cataj se-mozo Diose rihaan Mariá a:

—Cayáán Nimán Diose ga so', ne racuíj Diose síi nucuaj ndo'o mán so', ne che'é dan cuchruij so' ne'ej sa' rihaan Diose, ne ta'níi Diose me ne'ej cuchruij so' a.

36 Ne xcaj so' cuenta che'é tuvi' chana so' Elisabet se vaa nda' se chana ituun me no', taj nii, ne

nda' se chana hij me no', tzaj ne aj quisij vatan' yavii nuu rque no' cuano nanj á.

³⁷ Diose me sí a'vee 'yaj cunudanj a —taj se-mozó Diose rihaan Mariá a.

³⁸ Ne cataj Mariá rihaan se-mozó Diose a:

—Dan me se nanj chana 'yaj suun che'é sí 'nij ra'a man ní' mej, ne ca'vee qui'yaj so' ndaa vaa cataj so' rihanj á —taj Mariá rihaan se-mozó Diose yo' a.

Gaa ne naxuun se-mozó Diose man so' a.

Nana nihánj taj xna'anj se vaa ca'anj Mariá ca'mii no' ga Elisabet a

³⁹ Cachén doj güii, gaa ne qui'yaj chuvii Mariá si'yaj no', ne yoo ndo'o ca'anj no' 'o chuman' naj estadó Judea, 'o chuman' naj rej xraj a.

⁴⁰ Ne ca'anj no' tucua Zacarías, ne catúj no' rá ve', ne cataj no': “Vaa nucuáá so' na’”, taj no' rihaan Elisabet a.

⁴¹ Nu' cuno Elisabet nana ca'mii Mariá, ne nu' güéj ne'ej rque no' a. Dan me se catúj Nimán Diose nimán Elisabet,

⁴² ne nucuaj ca'mii no' ga Mariá, cataj no':

—Rqué Diose xna'anj ni'yaj uruún so' rihaan cunu' danj chana a. Ne uxrá rque Diose xna'anj ni'yaj ne'ej cuchruj so' a.

⁴³ Ve'é ndo'o quirán' 'unj se vaa ca'na' roj nii sí qui'nij ra'a man ní' tucuj a.

⁴⁴ Nu' cunoj nana cataj so' rihanj, ne nu' guun niha' rá ne'ej, ne nu' güéj ne'ej rquej a.

⁴⁵ Cavii sa' so' che'é se amán rá so' se-nana Diose, se vaa quisij ya nu' nana ca'mii Diose rihaan so' adonj —taj Elisabet rihaan Mariá a.

⁴⁶⁻⁴⁸ Gaa ne cataj Mariá nana nihánj a:

—Nda' se chana yanj rma'an mé 'unj, tzaj ne cunuu 'ee rá Diose ni'yaj so' manj a. Che'é dan me daj cataj ma'an Diose, ne ca'vee qui'yáj a. Nanuj rá Diose manj, ne che'é dan sa' vaa Diose, rá nimanj, ne guun niha' ndo'o rá nimanj ni'yaj nimanj man Diose sí tinanii manj rihaan sayuun nanj adonj. Ne yaj cataj cunudanj yuvii se vaa chana quiri' ndo'o xna'anj ni'yaj mej a.

⁴⁹ Danj cataj nij so' che'é se sa' qui'yaj Diose sí nucuaj ndo'o che'ej a. Ne sí vaa sa' inanj me so' adonj.

⁵⁰ 'Q 'ee rá so' man taran' nij sí uno rihaan so' a.

⁵¹ Qui'yaj Diose suun noco uxrá a. Nu' nij sí xta' nimán ro', qui'yaj canaán Diose rihaan nij so', ne quinavij se-nana nij so' nanj adonj.

⁵² Nu' nij sí rii ta'nga' ro', ca'nee Diose suun ra'a nij so', ne guun nij so' sí noco' nanj adonj. Ne nu' nij sí noco' ro', guun nij so' sí quirii ta'nga' naca, qui'yaj Diose nanj á.

⁵³ Nu' nij sí na'aan rque ro', rque Diose chraa cha nij so', ne nu' nij ru'vee ro', cunuu nique nij so', qui'yaj Diose a.

⁵⁴ Quisij ya nu' nana ca'mii Diose rihaan xii ní' nij sí man gaa naá a. Racuj so' man ní' sij israelitá, che'é se sij noco' man so' me ní' adonj.

⁵⁵ Nanuj rá so' ndaa vaa cataj so' rihaan xii ní' sí cu'naj Abraham, ne che'é dan 'ee rá so' man ní' sij israelitá, che'é se ta'ní ta'nij si'no Abraham me ní' a. —Nu' nana nihánj me nana cataj María a.

⁵⁶ Gaa ne va'nuj yavii cayáán Mariá tucúa Elisabet, gaa ne quinán' no' tucúa no' a.

Nana nihánj taj xna'anj se vaa ca'ngaa Juan sí

cuta' ne man yuvii a

57 Gaa quisíj güii ca'ngaa ta'níi Elisabet, gaa ne dan me se cuchruj no' 'o ne'ej sno'o cunii a.

58 Cuno nij tuví' no' se vaa ve'é uxrá qui'yaj Diose ga no', ne guun niha' uxrá rá nij so' che'é no' a.

59 Gaa quisíj ne'ej tunj güii, gaa ne dan me se cuchí' nij síi cuta' ta'nga' nee man ne'ej ve' a. Ne nij so' me rá tucu'náj Zacarías man ne'ej che'é se Zacarías cu'naj rej ne'ej,

60 tzaj ne ne ca'vej rá nii ne'ej cu'naj ne'ej danj ma'. 'O se cataj no':

—Juan cu'naj se-chuvii ta'níj á —taj no' rihaan nij so' a.

61 Tzaj ne cataj nij síi ca'na' rihaan no' a:

—Tzaj ne a 'ó tuví' soj ne cu'naj Juan ma' —taj nij so' rihaan no' a.

62 Che'é dan xná'anj nij so' man rej ne'ej, daj doj ra'a nij so' tucunó nij so' a. Guun rá nij so' quene'en nij so' daj quinaj se-chuvii ne'ej, qui'yaj rej ne'ej, rá nij so' a.

63 Cachíin Zacarías yanj ga ra'a so', ne cachrón so' letrá rihaan yanj yo', ne: “Juan cu'naj se-chuvii ne'ej”, taj letrá cachrón so' rihaan yanj, ne che'é dan caráya'anj ndo'o nij síi ca'na' a.

64 Nu' cachrón Zacarías letrá, ne nu' ca'vee ca'mii uún so' nanj adonj. Gaa ne guun che'e so' cataj so' se vaa ve'é uxrá qui'yaj Diose a.

65 Ne caráya'anj nij síi yanj nichrun' se vaa quiran' Zacarías se vaa guun ya'mji so', ne ndaa taran' nij síi yanj quij nicun' estadó Judea ro', cuno ndaa vaa quiran' so' a.

⁶⁶ Taran' nij sí cuno ro', nuchruj raá, ne xná'anj nij so' man tuvi' nij so' me suun cata Juan asa' cachij so' a. Danj tu'va nij so' che'é se quene'en nij so' se vaa rqué ndo'o Diose xna'anj ni'yaj Juan a.

Nana nihánj taj xna'anj se vaa cataj xna'anj Zacarías se vaa racuj ndo'o Diose man nij yuvi israelitá a

⁶⁷ Racuj Nimán Diose man rej Juan sí cu'naj Zacarías, ne cataj so':

⁶⁸ —Ca'mii sa' ní' che'é Diose sí noco' ní' sij israelitá a. Ése racuj so' man ní' sij noco' man so', ne tinanii so' man ní' rihaan sayuun a.

⁶⁹ Ca'na' 'o sí nucuaj guun so' sí tinanii sa' man ní' rihaan sayuun, qui'yaj Diose a. 'O ta'ní ta'nij si'no sí guun chij gaa naá sí cu'naj David guun so',

⁷⁰ ndaa vaa cataj nij sí nata' se-nana Diose, qui'yaj Diose gaa naá,

⁷¹ ne dan me se ca'na' sí nucuaj tinanii so' man ní' rihaan nij sí taj ri'yunj man ní', taj nij so', ne se guun nucuaj nij sí taj ri'yunj man ní' qui'yaj chi'ii nij so' man ní' ma', taj nij so' a.

⁷² Dan me se cunuu 'ee rá so' man ní' ndaa vaa cata' tu'va so' rihaan xii ní', ne yo'o nuû rá so' nu' se vaa cataj xna'anj so' se vaa qui'yaj so' che'é ní' do' a.

⁷³⁻⁷⁴ ”Dan me se cataj so' rihaan xii ní' sí cu'naj Abraham se vaa ya ya tinanii so' man ní' rihaan nij sí taj ri'yunj man ní', gaa ne se cuchu'vi' ní' qui'yaj suun ní' che'é so' a.

⁷⁵ Ne gaa nica nimán ní' rihaan Diose nu' güii gaa i'na' ní' adonj —taj Zacarías, gaa ne ca'mii uún Zacarías rihaan ma'an ta'ní so'—

⁷⁶ Ne xa' ma'án so', tzaj ne guún so' sí nata' se-nana Diose, ne Diose me sí sa' ndo'o, rej. Asino so' guun che'e ca'mii natáj, gaa ne ca'na' sí qui'nij ra'a man ní' ei. Dan me se cunu nica nimán yuvi, qui'yáa so', ne caraya'anj yuvi man sí ca'na' qui'nij ra'a man ní', qui'yáa so',

⁷⁷ ne so' qui'yaj xcaj nij sí canoco' man Diose cuentá se vaa ca'vee quinavij cacun' tumé nij so' qui'yaj sí ca'na', ne ca'vee quinanii nij so' rihaan sayuun a.

⁷⁸ Danj qui'yaj Diose che'é nij so' che'é se 'ee uxrá rá Diose man nij so', ne che'é dan ca'nej so' man sí qui'nij ra'a man nij so' asa' quisíj güii ca'vee cavii sa' ní' qui'yaj Diose adonj.

⁷⁹ Gaa ne xa' tuvi' ní' sí ne acaj cuentá do', xa' tuvi' ní' sí chu'vi' ndo'o se vaa cavi' nij so' do', tzaj ne cuchuguun rihaan nimán nij so', gaa ne xcaj nij so' cuentá, gaa ne nari' taran' ní' daj qui'yaj ní', ne cunu xej nimán ní' adonj —taj Zacarías rihaan ta'ní so' a.

⁸⁰ Dan me se cachij xnii cu'naj Juan, ne guun so' sí nucaj nimán, ne inanj rej tacaan yáán so' ndaa se quisíj güii guun che'e so' nata' so' se-nana Diose rihaan nij sí israelitá a.

2

Nana nihánj taj xna'anj se vaa ca'ngaa Jesucristó
a

¹ Maan yo' ca'ngaa Juan ro', cayáán sí cu'naj Augusto sí nicaj suun emperador, ne ca'neé so' nana rihaan nij sí man taran' nij chuman' rii ta'nga' so' rihaan se vaa me rá so' naxcaj so' 'o' yanj documento no se-chuvii 'o' 'o' nij yuvi a.

² Ne cayáán sí cu'naj Cirenio sí nicaj suun gobernador uun chij rihaan estadó Siria gaa naxagaa yanj yo' a.

³ Dan me se ca'anj cunudanj nij yuvij chuman' chiháán xii nij so', gaa ne naxagaa yanj no se-chuvij nij yuvij yo' a.

⁴ Cavii sí cu'naj José chuman' Nazaret chuman' naj estadó Galilea, ne ca'anj so' chuman' Belén chuman' naj estadó Judea a. Chuman' ca'ngaa xii so' sí guun chij gaa naá sí cu'naj David me Belén, ne che'é dan ca'anj José ndaa Belén, che'é se 'o ta'núí ta'nij si'no David me so' a.

⁵ Nicaj so' chana cu'naj Mariá chana aj guun ya xcaj so' man, ca'anj so' cano se-chuvij roj so' rihaan yanj a. Nuú rque Mariá,

⁶ ne gaa caran' roj so' Belén, ne quisíj güii ca'ngaa ne'ej a.

⁷ Taj yan vaa ya'núj caran' roj so' ca'ngaa ne'ej a ma'. Dan me se daj doj rej man scúj vaa ya'núj caran' roj so' a. Ne cuchruj no' 'o ne'ej sno'o cunii ta'núí no' sí chava' a. Qui'yaj yanu' no' man ne'ej, ne ca'née no' man ne'ej rá rihoo yan nuú co'yoo chá scúj a.

Nana nihánj taj xna'anj se vaa curuvi' se-mozó Diose rihaan nij sí tumé matzinj a

⁸ Dan me se mán sí tumé matzinj rej tacaan nichrun' yáj tu'va chuman' Belén, ne nicun' ta'aj nij so' xe' tumé nij so' daán nij so' rej nij a.

⁹ Gaa ne dan me se naqui'yaa 'o se-mozó Diose rihaan nij so', ne cuchuguun uxrá rihaan nij so', qui'yaj Diose, gaa ne kuchu'vi' ndo'o nij so' a.

¹⁰ Gaa ne cataj se-mozó Diose rihaan nij so' a:

—Se cuchu'vi' soj ma'. 'O se ca'ná' 'un̄j nata' 'un̄j 'o nana sa' rihaan soj che'é rasuun qui'yaj guun niha' rá taran' nij yuvij ei.

¹¹ 'O se cuan' me se ca'ngaa 'o ne'ej chuman' chiháán David, ne ne'ej yo' ro', me sí ca'néé Diose tinanii man yuvij rihaan sayuun, ne sí qui'nij ra'a man ní' me so' ei.

¹² Nanj vaa quene'en soj se vaa ya ca'mij rihaan soj a. Ca'anj nij soj chuman' Belén, ne nari' soj 'o ne'ej guun yanu', ne nuu so' rá rihoo chá xcuu co'yoo, ne so' me sí qui'nij ra'a man ní' a. —Danj cataj se-mozó Diose rihaan nij sí tumé matzinj a.

¹³ Dan me se nu' navij ca'mii se-mozó Diose ga nij so', gaa ne veé maan orá dan curuvi' que'ee doj nij se-mozó Diose uún, ne ve'é uxrá ca'mii nij so' che'é Diose, cataj nij so':

¹⁴ —Sa' uxrá vaa Diose, sí nicun' xta', ne gaa xej nimán nij yuvij sij sa' nimán a —taj nij se-mozó Diose rihaan nij sí tumé matzinj a.

¹⁵ Dan me se quinan' nij se-mozó Diose xta', gaa ne cataj nij sí tumé matzinj rihaan tuvi' nij so' a:

—Ca'anj ní' Belén quene'en ní' daj guun se vaa cataj xna'anj Diose rihaan ní' ei —taj nij so' rihaan tuvi' nij so' a.

¹⁶ Yoo ca'anj nij so', ne dan me se nu' cuchi' nij so', ne nu' quinari' nij so' man Mariá ga José, ne dan me se quinari' nij so' man ne'ej, nuu ne'ej rá rihoo a.

¹⁷ Dan me se gaa quene'en nij sí tumé matzinj man ne'ej, gaa ne cataj xna'anj nij so' nana ca'néé Diose rihaan nij so' che'é ne'ej rihaan Mariá ga José do', rihaan nij sí man nichrun' do' a.

18 Gaa ne caráya'anj cunudanj yuvij cuno nana ca'mii nij síi tumé matzinj yo' a.

19 Ne Mariá me se ca'née no' cunudanj nana yo' cúu yave no', ne nuchruj raá no' che'é nana yo' a.

20 Dan me se quinan' nij síi tumé matzinj, gaa ne guun niha' uxrá rá nij so' che'é nu' nana cuno nij so' do', che'é nu' se vaa quene'en nij so' do', ne: "Sa' uxrá qui'yaj Diose á", taj nij so' a. 'O se ase vaa cataj xna'anj se-mozó Diose rihaan nij so' ro', veé danj vaa guun a.

Nana nihánj taj xna'anj se vaa caxrj roj nica José ne'ej ston Diose a

21 Cachén 'o tunj güii gaa ne cuta' nii ta'nga' nee man ne'ej, ne Jesús cu'naj ne'ej, qui'yaj nii, ndaa vaa cataj xna'anj se-mozó Diose gaa ataa nayon so' rque Mariá a.

22 Cachén vij chihaa güii, gaa ne quisij güii cunu sa' Mariá rihaan Diose a. Che'é dan nicaj roj so' man ne'ej ca'anj roj so' nuvií nocoo yanj chuman' Jerusalén, ne caxrj roj so' ne'ej ston Diose a.

23 'O se danj Diose taj se vaa daj a ta'níi nij yuvij israelitá síi chava' guun si'yaj Diose, ne che'é dan qui'yaj roj so' danj a.

24 Dan me se ca'anj roj so' ca'anj go' roj so' xcuu rihaan Diose ndaa vaa taj danj Diose a. Ca'vee go' yuvij vij cha'aan ca'vee go' yuvij vij culuj ca'vee, taj danj Diose a.

25 Dan me se cayáan 'o chii nga cu'naj Simeón chuman' Jerusalén a. Sij vaa nica nimán me so', ne sij nocó' uxrá man Diose me uún so', ne quisij que'ee yo' na'vij uxrá so' se vaa tinanii Diose man

nij yuvij israelitá rihaan sayuun a. Cayáán Nimán Diose ga so',

²⁶ ne aj cataj xna'anj Nimán Diose rihaan so' se vaa se cavi' so' ndaa se aj quene'en ya so' man sí ca'nej Diose a.

²⁷ Dan me se güii cuchi' roj nica José chuman' Jerusalén me se cataj xna'anj Nimán Diose rihaan Simeón se vaa ca'anj so' nuvií nocoo, ne che'é dan ca'anj so' catúj so' rque nuvií a. Gaa ne catúj roj nica José rque nuvií ga ne'ej che'é se guun rá roj so' qui'yaj roj so' ndaa vaa taj danj Diose a.

²⁸ Gaa ne tára'a sí cu'naj Simeón ne'ej, ne nago' so' graciá rihaan Diose che'é ne'ej a. Ne nihánj me nana ca'mii so' a:

²⁹ —Quisíj ya nu' ndaa vaa cataj so' rihanj, ne che'é dan ca'vee cavij yaj, ne gaa xej nimanj, Ataj Chij.

³⁰ Quene'en rihanj man sí ca'née so' man tinanii man núj rihaan sayuun,

³¹ ne quene'en cunudanj yuvij se vaa ca'na' so' qui'yáa so' nanj á.

³² Ase vaa ya'an chuguun gaa so' tihaan so' se-tucuanj so' rihaan nij yuvij yaníj, ne ca'mii sa' nii che'é núj sij israelitá, qui'yaj uún so', ése sí nocoo' mán so' me núj nanj adonj —taj Simeón rihaan Diose a.

³³ Caráya'anj roj nica José se-nana sí cu'naj Simeón se vaa ca'mii so' che'é ne'ej,

³⁴ ne cachín ni'yaj Simeón rihaan Diose se vaa rque Diose xna'anj ni'yaj roj nica José a. Gaa ne cataj so' rihaan Mariá a:

—Cune' Diose man ne'ej nihánj qui'yaj suun so'

rihaan Diose, ne dan me se cavii sa' uxrá que'ee tuvi' ní' sij israelitá, qui'yaj so', tzaj ne que'ee tuvi' ní' tuna, qui'yaj uún so' adonj. Dan me se ca'néé Diose man so' che'é rej xcaj yuvii cuentá che'é Diose, tzaj ne ca'mii chi'ii nii ni'yaj nii man so' adonj.

³⁵ Ne xa' so', tzaj ne quinano ndo'o rá ma'án so' che'é so' vaa güii nanj á. Dan me se ca'vee xcaj ní' cuentá daj vaa nimán que'ee yuvii, qui'yaj so' adonj —taj Simeón rihaan Mariá a.

³⁶ Ne yáán 'o chana hij cu'naj Ana, ne níí nata' se-nana Diose me no', ne ta'níí síí cu'naj Fanuel me no', ne ta'níí ta'nij si'no síí cu'naj Aser me roj rej roj no' a. Xcaj chii man no' gaa naá, ne nicaj tuvi' roj so' hij yo', gaa ne cavi' nica no',

³⁷ ne quináj no' ne ma'an no', ne quisíj no' ndaa ca'anj chihaa ca'anj yo' gaa ca'ngaa ne'ej cu'naj Jesús a. Chana noco' uxrá man Diose me no', ne che'é dan yo'o cayáán no' nuvií noco, ne niganj yaj a'yuj caráj guee no', ne cachín ni'yaj no' rihaan Diose a.

³⁸ Maan orá ca'mii Simeón che'é ne'ej ro', veé maan orá dan vaj chana hij cu'naj Ana, ne catúj no' rque nuvií, gaa ne nago' no' graciá rihaan Diose che'é ne'ej, ne cataj xna'anj no' che'é ne'ej rihaan nij yuvii man na'vij güii tinanii Diose man nij síí man Jerusalén rihaan sayuun a.

Nana nihánj taj xna'anj se vaa canicaj roj nica José quinán' roj so' tucúa roj so' a

³⁹ Dan me se gaa quisíj qui'yaj roj nica José se vaa taj se-tucuanj Moisés, gaa ne quinán' roj so'

estadó Galilea a. Quinan' roj so' chiháán roj so' chuman' Nazaret a.

⁴⁰ Cachij ne'ej guun so' sí nucuaj a. Xnii vaa chij rá me so', ne rqué uxrá Diose xna'anj ni'yaj so' a.

Nana nihánj taj xna'anj se vaa ca'mii Jesucristó rihaan nij sí naqui'yaj cuu se-tucuanj Moisés gaa me Jesucristó xnii a

⁴¹ Daj a yo' ca'anj roj nica José chuman' Jerusalén gaa canuú cha'anj pascua,

⁴² ése danj vaa tucuaán noco' nij sí israelitá a. Dan me se gaa quisíj Jesucristó chuvij yo', gaa ne ca'anj roj nii so' cha'anj ga rej so' a.

⁴³ Cachén cha'anj, gaa ne quinan' roj nica roj so', tzaj ne xnii ro', quináj Jerusalén, ne ne quene'en roj nica roj so' se vaa quináj xnii a ma'.

⁴⁴ Quinan' xnii ga tuvi' roj so', rá roj so', ne che'é dan ca'anj roj so' a. Gaa ne rej ti'nuu guun che'e roj so' nano' roj so' man xnii rihaan tuvi' roj so',

⁴⁵ tzaj ne nuvi' yan vaj xnii a ma'. Che'é dan nanicaj uún roj so' ca'anj uún roj so' Jerusalén, ne nano' uxrá roj so' man xnii a.

⁴⁶ Quisíj va'núj güii nano' roj so' man xnii, gaa ne ca'anj roj so' rque nuvií noco man nij sí naqui'yaj cuu se-tucuanj Moisés, ne man dan ne xnii nanó xrej xnii nana a'mii nij so', ne achíin na'anj xnii nana cuu man nij so',

⁴⁷ ne caráya'anj daj a nij sí cuno nana ca'mii xnii, ése sij nicaj uxrá cuentá me xnii, ne sa' uxrá ca'mii xnii, rá nij so' a.

⁴⁸ Ne caráya'anj roj nica roj so' gaa quene'en roj so' se vaa ne xnii sca'núj nij sij a. Gaa ne cataj nii so' rihaan so' a:

—Ne chihān' qui'yáá dī' man núj, man rej. Nanó ndo'o rá réé dī' dō', nanó ndo'o rá 'un̄j dō', qui'yáá dī', che'é se nuvíi nano' núj mán dī', rej —taj nii so' rihaan so' a.

⁴⁹ Tzaj ne cataj Jesucristó rihaan roj so' a:

—Taj che'é nano' roj soj manj ma'. Me che'é ne ne'en roj soj se vaa nō xcúún 'un̄j qui'yaj suun 'un̄j se-tucuan̄j Réj gā —taj xnii rihaan roj nīcā roj so' a.

⁵⁰ Tzaj ne ne cunō roj so' se-nānā xnii se vaa nō xcúún so' qui'yaj suun so' se-chrej Réj so' Diose a.

⁵¹ Dan me se quinān' Jesucristó chuman' Nazaret gā roj so', ne yo'o yan̄j uno sá' so' rihaan roj so' a. Ne yo'o nuú rá Mariá nu' ndāa vaa guun che'é so' gā ca'ngaa so' dō', nu' nanā cuu sá' a'mii so' dō' a.

⁵² Dan me se cachij Jesucristó guun so' síi cuu raā, ne carān' rá Diose ni'yaj Diose man so', ne carān' rá yuvii uún ni'yaj yuvii man so' nan̄j adon̄j.

3

Nanā nihánj taj xna'an̄j se vaa ca'an̄j Juan síi cuta' ne man yuvii tacaan, ca'mii natáj so' a

¹⁻² Yo' xnu' cayáán síi cu'naj Tiberio síi nicaj suun emperador ro', maan yo' dan me rqué Diose se-nānā Diose rihaan síi cu'naj Juan ta'níi Zacarías gā cachéé so' tacaan a. Veé maan yo' ca'mii Diose rihaan Juan, dan me cayáán síi cu'naj Poncio Pilato síi nicaj suun gobernador uun chij rihaan estadó cu'naj Judea a. Ne veé maan yo' dan cayáán síi cu'naj Herodes síi nicaj suun tetrarca uun chij rihaan estadó cu'naj Galilea, ne cayáán tinúú so' síi cu'naj Felipé síi nicaj suun tetrarca uun chij

rihaan roj estadó cu'naj Iturea ga Traconite a. Ne veé maan yo' dan cayáán síí cu'naj Lisania sís nicaj suun tetarca uun chij rihaan estadó cu'naj Abilinia, ne cayáán roj síí cu'naj Anás ga Caifás xrej ata suun nocoo doj rihaan nij yuvií israelitá a. Taran' nij so' me síí uun chij gaa cuchí' se-nana Diose rihaan Juan gaa cachéé so' tacaan a.

³ Dan me se cachéé Juan nu' rej naj nichrun' tu'va chráá cu'naj Jordán, ne guun che'e so' ca'mii natáj so' rihaan yuvií se vaa nuchran' nimán nij yuvií, ne tanáj nij yuvií chrej chí'íi, ne ca'vee tinavij Diose cacun' tumé nij yuvií, taj Juan adonj.

⁴ Dan me se qui'yaj Juan nu' ndaa vaa taj nana cachrón síí cu'naj Isaías síí nata' se-nana Diose gaa naá rihaan yanj, ne nihánj me nana cachrón so' a: “Nucuj ndo'o ca'mii natáj 'o so' rej tacaan, ne cataj so' se vaa nuchran' nimán yuvií, ne ve'é ca'mii nij yuvií ga síí 'nij ra'a man ní' asa' ca'na' so' adonj.

⁵ Dan me se se ca'vee quinaj a doj se chí'íi nimán ní' caráán chrej rihaan síí 'nij ra'a man ní' ca'na' so' ma'. Maan se quirii ní' nu' se chí'íi, ne caraa ní' nu' se sa' cachiin man nimán ní', ne ve'é inanjanj cunuu nica nimán ní', qui'yaj ní' ei.

⁶ Gaa ne quene'en nu' nij síí man daj a chuman' se vaa ca'vee tinanii Diose man yuvií rihaan sayuun nanj á”. Dan me nana cachrón síí cu'naj Isaías rihaan yanj gaa naá nana taj xna'anjanj che'é síí cu'naj Juan a.

⁷ Dan me se cuchí' que'ee ndo'o yuvií rihaan Juan che'é se guun rá nij so' cuta' ne Juan man nij so' a. Gaa ne caxríj yuvaá Juan man nij so', cataj

so':

—Ase vaa xcuáá yuvaa vaa soj á. Me síí cataj xna'anj rihaan soj cunanj soj, ne quinanii soj rihaan sayuun qui'yaj Diose ga. Asa' ca'vee quinanii soj rihaan sayuun, qui'yaj nanj na cata' ne soj, rá soj ga.

⁸ Sese ya cunuu sa' nimán soj, ne ca'anj soj qui'yaj soj ndaa vaa 'yaj yuvii cunuu sa' nimán ei. Ne tadó soj sese guun che'e soj cataj soj se vaa ta'níí ta'nij si'nó síí cu'naj Abraham síí cane gaa naá me soj, ne ne tumé soj cacun', cataj soj á. Se ca'mii soj daj chihaa mǐj danj ma'. Maan se cataj xna'anj 'unj rihaan soj se vaa nuveé se ya'anj tiha' ta'níí ta'nij si'nó síí cu'naj Abraham me soj a ma'. Maan se sese Diose rá, ne ca'vee nǐcaj Diose náá guun yahij naj rihaan yo'óó nihánj, ne qui'yaj Diose man 'o ta'níí ta'nij si'nó síí cu'naj Abraham adonj. Che'é dan canoco' ya soj man Diose ei.

⁹ Q se nichrun' qui'yaj Diose sayuun man nij síí na'vej rá cunó rihaan so' nanj á. Ase vaa síí oro' aga' a'ne' chruun, ne oro' so' aga' ca'ne' so' chruun ro', danj vaa Diose cuano ei. Che'é dan ase vaa 'yaj nii man chruun ro', ta'nga' danj qui'yaj Diose man nij síí ne uno rihaan so' a. Dan me se a'ne' nii chruun nuvi' chruj sa' raá, ne araa nii man chruun yo' rihaan ya'an a. Ta'nga' danj qui'yaj Diose man nij síí na'vej rá canoco' chrej sa' adonj. —Danj cataj Juan rihaan nij yuvii a.

¹⁰ Gaa ne xná'anj nij yuvii man Juan, cataj nij yuvii:

—Daj qui'yaj núj, rá so' ga —taj nij so' rihaan Juan a.

¹¹ Gaa ne cataj Juan rihaan nij so' a:

—Síí vaa vij se-cotoó ro', caxrii uun so' 'o cotoó ston síí nuvi' se-cotoó á. Ne síí vaa se chá rihaan ro', go' so' doj se chá man nij síí nuvi' se chá rihaan á. —Danj cataj Juan rihaan nij so' a.

¹² Doj tuvi' nij síí a'néj puextó ro', ca'na' rihaan Juan che'é se guun rá nij so' cuta' ne Juan man nij so' a. Ne xná'anj nij so' man Juan, cataj nij so':

—Daj qui'yaj núj, rá so', ga maestro' —taj nij so' rihaan Juan a.

¹³ Ne cataj Juan rihaan nij so' a:

—Inanj sa'anj no xcúún soj ca'neé soj man yuvii ro', ca'vee ca'neé soj á. Se ca'néj soj doj sa'anj man yuvii ma' —taj Juan rihaan nij so' a.

¹⁴ Gaa ne xná'anj doj tanuu man Juan a:

—Daj qui'yaj núj, rá so' ga —taj nij so' rihaan Juan a.

Ne cataj Juan rihaan nij so' a:

—Se qui'yaj soj fuerzá rque yuvii sa'anj rihaan soj a ma'. Se ca'mii ne soj che'é yuvii ne ca'neé soj sa'anj man nij yuvii a ma'. Veé doj sa'anj vaa tu'vee soj ro', guun niha' rá soj nica'j soj nanj á. —Danj cataj Juan rihaan nij tanuu a.

¹⁵ Dan me se nuchruj nij yuvii cuentá sese sij ca'néé Diose tinanii man yuvii rihaan sayuun me Juan, ne che'é dan na'vij ndo'o nij yuvii cataj xna'anj ma'an síí cu'naj Juan daj sij me ma'an so' a.

¹⁶ Ne che'é dan cataj Juan rihaan nij so' a:

—Síí uta' ne na uun man soj mej, tzaj ne ca'na' yo'ó síí guun sca' doj rihanj a. Che'é dan me aj ne nó xcúnj nachej nuj correá 'nij tacanj so' ma'. Ne ca'na' so', ne ca'na' Nimán Diose ga so', ne caxrii

ya'an so' man soj s_{ij} na'vej rá cun_o rihaan Diose, ne cacaa soj adonj.

17 Dan me se ase vaa síi oro' chruun palá vaa so' cuano adonj. Dan me se síi nicaj chruun palá ro', rii nu' 'núú trigó naj rihaan yo'óó, ne naqui'yaj chre' so' man 'núú trigó sa', ne araa so' man 'núú trigó sa' rá ve', ne anicaj so' araa so' squíj ni'ya xraá trigó rihaan ya'an a. Ne ase vaa síi nicaj palá man cuano ro', danj qui'yaj síi ca'na', ne naqui'yaj chre' so' man cunudanj nij síi cunuu sa' nimán, ne caraa so' man nij síi chi'ii rihaan ya'an, ne cacaa nij so' nu' cavii nu' ca'anj, ne daj chihaa m_{ij} se quina'áj ya'an yo' a man adonj. —Danj ca'mii síi cu'naj Juan rihaan nij yuvij yo' a.

18 Ne vaa uxrá doj chrej sa' nago' so' man nij yuvij, ne ve'é nata' so' se-nana Diose nana sa' rihaan nij so' a.

19 Dan me se cataj Juan se vaa ne chihan' qui'yaj síi nicaj suun rey síi cu'naj Herodes che'é se ca'néj so' nica tinúú so' chana cu'naj Herodías ne xcaj so' man no' do', che'é que'ee ndo'o doj se chi'ii qui'yaj Herodes do' a.

20 Che'é se nij ndo'o qui'yaj Herodes ca'néj so' nica tinúú so' cataj Juan, ne ca'maan ndo'o rá Herodes ni'yaj so' man Juan, ne caxr_{ij} so' taga' man Juan nanj á. Maan ta'nga' doj vaa cacun' tumé so' gaa ataa caxrii so' taga' man Juan, tzaj ne yaj caxr_{ij} so' taga' man Juan, ne doj a tumé so' cacun' adonj.

Nana nihánj taj xna'anj se vaa cuta' ne Juan man Jesucristó a

21 Dan me se gaa ataa catuu Juan taga', ne cata' ne taran' nij yuvi, qui'yaj Juan, gaa ne cata' ne Jesucristó, ne nu' nago' Jesucristó graciá rihaan Diose, gaa ne naxra' rej xta' a.

22 Gaa ne nanij Nimán Diose raq Jesucristó, ne ase vaa ruvi' 'o cha'aan ro', danj vaa curuvi' Nimán Diose a. Gaa ne ca'mii Diose síi nicun' xta', cataj Diose:

—Ta'níi 'unj síi 'ee ndo'o raj man mé so', ne niha' ndo'o raj ni'yaj 'unj mán so' adonj —taj Diose síi nicun' xta' a.

Nana nihánj taj xna'anj che'é taran' nij xii Jesucristó a

23 Ndaa quisij Jesucristó ico chi' yo' ta' asuun, gaa ne guun che'e so' qui'yaj suun so' se-suun so' a. Dan me se guun rej Jesucristó man síi cu'naj José, ne ta'nij José me Jesucristó, rá nij yuvi a. Ne ta'níi Elí me José a.

24 Ta'níi Matat me Elí, ne ta'níi Leví me Matat, ne ta'níi Melqui me Leví, ne ta'níi Jana me Melqui, ne ta'níi José me Jana a.

25 Ta'níi Matatías me José, ne ta'níi Amós me Matatías, ne ta'níi Nahum me Amós, ne ta'níi Esli me Nahum, ne ta'níi Nagai me Esli a.

26 Ta'níi Maat me Nagai, ne ta'níi Matatías me Maat, ne ta'níi Semei me Matatías, ne ta'níi José me Semei, ne ta'níi Judá me José a.

27 Ta'níi Joana me Judá, ne ta'níi Resa me Joana, ne ta'níi Zorobabel me Resa, ne ta'níi Salatiel me Zorobabel, ne ta'níi Neri me Salatiel a.

28 Ta'níi Melqui me Neri, ne ta'níi Adi me Melqui, ne ta'níi Cosam me Adi, ne ta'níi Elmodam me Cosam, ne ta'níi Er me Elmodam a.

29 Ta'níí Josué me Er, ne ta'níí Eliezer me Josué, ne ta'níí Jorim me Eliezer, ne ta'níí Matat me Jorim a.

30 Ta'níí Leví me Matat, ne ta'níí Simeón me Leví, ne ta'níí Judá me Simeón, ne ta'níí José me Judá, ne ta'níí Jonán me José, ne ta'níí Eliaquim me Jonán a.

31 Ta'níí Melea me Eliaquim, ne ta'níí Mainán me Melea, ne ta'níí Matata me Mainán, ne ta'níí Natán me Matata a.

32 Ta'níí David me Natán, ne ta'níí Isai me David, ne ta'níí Obed me Isai, ne ta'níí Booz me Obed, ne ta'níí Salmón me Booz, ne ta'níí Naasón me Salmón a.

33 Ta'níí Aminadab me Naasón, ne ta'níí Aram me Aminadab, ne ta'níí Esrom me Aram, ne ta'níí Fares me Esrom, ne ta'níí Judá me Fares a.

34 Ta'níí Jacob me Judá, ne ta'níí Isaac me Jacob, ne ta'níí Abraham me Isaac, ne ta'níí Taré me Abraham, ne ta'níí Nacor me Taré a.

35 Ta'níí Serug me Nacor, ne ta'níí Ragau me Serug, ne ta'níí Peleg me Ragau, ne ta'níí Heber me Peleg, ne ta'níí Sala me Heber a.

36 Ta'níí Cainán me Sala, ne ta'níí Arfaxad me Cainán, ne ta'níí Sem me Arfaxad, ne ta'níí Noé me Sem, ne ta'níí Lamec me Noé a.

37 Ta'níí Matusalén me Lamec, ne ta'níí Enoc me Matusalén, ne ta'níí Jared me Enoc, ne ta'níí Mahalaleel me Jared, ne ta'níí Cainán me Mahalaleel a.

38 Ta'níí Enós me Cainán, ne ta'níí Set me Enós, ne ta'níí Adán me Set a. Ne Adán ro', me síi qui'yaj ma'ān Diose man a. Nu' nij so' me xii Jesucristó cumán gaa naá a.

4

Nana nihánj taj xna'anj se vaa guun ndo'o rá síi chree tiha' yu'unj so' man Jesucristó a

¹ Dan me se naraa Nimán Diose nu' nimán Jesucristó, gaa ne cavii Jesucristó tu'va chráa cu'naj Jordán, ne ca'anj so', vaj so' rej tacaan, qui'yaj Nimán Diose a.

² Ne vij chihaa ya güii guun rá síi chree tiha' yu'unj síi chree man Jesucristó, che'é rej guun rá so' canoco' Jesucristó man so' a. Ne a 'ó xco' chraa ne cha Jesucristó cunu' vij chihaa güii ma'. Gaa quisij nu' vij chihaa güii, gaa ne quina'aan ndo'o rque Jesucristó a.

³ Gaa ne dan me se cataj síi chree rihaan Jesucristó, ne:

—Sese ya ya ta'nij Diose mé so', ne cataj so' rihaan yahij nihánj se vaa guun yo' rachrúun cha so' á —taj síi chree rihaan Jesucristó a.

⁴ Gaa ne cataj Jesucristó rihaan so', ne:

—Danj Diose taj: “Nuveé inanj se chá me se achiin rihaan yuvij, ne ca'vee cayáán sa' yuvij ma’”. Inanj danj taj danj Diose —taj Jesucristó rihaan síi chree yo' a.

⁵ Gaa ne dan me se nicaj síi chree man Jesucristó cavii so' 'o rej xta' ndo'o, gaa ne tihaan so' man cunudanj nij chuman' naj rihaan chumij rihaan Jesucristó rque orún' orá nii a.

⁶ Gaa ne cataj so' rihaan Jesucristó, ne:

—Rque 'unj nu' chuman' nihánj do', nu' se sa' man nij chuman' nihánj do', mán so' a. 'O se aj ca'vej Diose guun chij 'unj rihaan nij chuman' yo',

ne che'é dan ca'vee qui'yáj guun chij náá guun yuvij rihaan chuman' yo' adonj.

⁷ Che'é dan sese canicun' ruj so' rihanj, ne guun sij'yáá so' man nu' nihánj, qui'yáj adonj. —Danj cataj síi chree rihaan Jesucristó a.

⁸ Ne canicaj Jesucristó cataj Jesucristó rihaan síi chree:

—Daj chihaa mǐj se canicun' ruj 'unj rihaan so' a ma'. 'O se danj Diose taj nana nihánj, se vaa: “Rihaan orún' Diose síi 'nij ra'a man ní' canicun' ruj so', ne a 'ó rihaan tuví' so' se ca'vee na'vij so' ma’”. Danj taj danj Diose adonj —taj Jesucristó rihaan síi chree yo' a.

⁹ Gaa ne nicaj síi chree man Jesucristó ca'anj so' chuman' Jerusalén, ne tacavii so' man Jesucristó raa nuvíi nocoo,

¹⁰ ne cataj so' rihaan so', ne:

—Sese ya ta'nij Diose mé so', ne güej so', ne nanij guee so' rihaan yo'óó á. 'O se danj Diose taj: “Ca'ne' Diose suun rihaan nij se-mozó so' se vaa cutumé nij so' mán so' a”, taj danj Diose, ne taj uún yo':

¹¹ “Caráán ra'a nij so' mán so', se gaa nanj cano che'é so' yahij ma’”. Danj a'mii danj Diose —taj síi chree rihaan Jesucristó adonj.

¹² Gaa ne cataj Jesucristó rihaan síi chree a:

—Tzaj ne ne nó xcúnj qui'yáj danj ma'. 'O se taj uún danj Diose a: “Se guun quiri'yunj so' man Diose síi 'nij ra'a man ní', ne tihá' so' man so' ma’”. Inanj danj a'mii danj Diose rihaan ní' adonj —taj Jesucristó rihaan síi chree a.

¹³ Danj qui'yaj síi chree, tzaj ne a doj ne cuchuman rá Jesucristó a man adonj. Gaa ne ca'ne' rá síi chree doj güii ga Jesucristó a.

Nana nihánj taj xna'anj se vaa guun che'e Jesucristó tucu'yón so' se-nana Diose man nij yuvij man estadó Galilea a

14 Dan me se nan' Jesucristó estadó Galilea, ne yo'o racuíj ndo'o Nimán Diose man so', ne cuchí' nana che'é so' rihaan nij yuvij man nu' nij chuman' naj estadó Galilea a.

15 Ca'anj Jesucristó daj a nij ve' tucu'yón nij yuvij israelitá se-tucuanj Moisés, ne tucu'yón so' se-nana Diose man nij yuvij, ne ve'é uxrá ca'mii taran' nij yuvij che'é so' a.

Nana nihánj taj xna'anj se vaa nucui' Jesucristó chiháán so', ne ca'mii natáj so' a

16 Gaa ne dan me se nucui' uún Jesucristó chiháán so' chuman' Nazaret rej cachij so' a. Gaa quisíj güii naránj rá nij yuvij israelitá, ne catúj so' rá ve' tucu'yón nij so' se-tucuanj Moisés, ése danj inanj cu'yón so' qui'yaj so' a. Gaa ne canicun' caya so' nayaá so' danj Diose rihaan nij yuvij a.

17 Síi tumé yanj quirii yanj no nana cachrón síi cu'naj Isaías síi nata' se-nana Diose gaa naá, ne caxríj so' ston Jesucristó a. Nacuchra' Jesucristó yanj, ne nari' so' rej no nana nihánj a:

18 “Yanj Nimán Diose ga 'unj, ne che'é dan narii Diose manj ca'anj ca'mii natáj 'unj nana sa' rihaan nij síi nique a. Ca'née Diose manj ca'mii natáj 'unj rihaan nij síi 'nij taga' cataj 'unj se vaa curihanj nij so' cachee yuun nij so' a. Ne ca'née Diose manj racuíj 'unj man nij síi tuchrij naxra' rihaan nij so', ne ca'née Diose manj racuíj 'unj man nij síi ran' sayuun uún nanj á.

19 Ca'néé Diose manj cataj xna'anj 'uñj se vaa yaj ro', me rá Diose cavii sa' nij síi nocó' man so' qui'yaj so' adonj.”

20 Nu' nihánj me nana nayaa Jesucristó, gaa ne nacué uún so' yanj ne nago' uún so' man síi tumé yanj, gaa ne ca'anj quitaj so' chruun xlá a. Tzaj ne ni'yaj uxrá cunudanj nij yuvii man rque ve' yo' man so',

21 ne che'é dan ca'mii uún so', cataj so':

—Veé cuano nihánj me se aj quisíj ya nu' nana nihánj, ne 'uñj sij nayaa nana nihánj cuno soj me síi qui'yaj nu' se vaa taj nana nihánj adonj —taj Jesucristó rihaan nij so' a.

22 Sa' uxrá ca'mii Jesucristó, cataj nij yuvii, ne caráya'anj nij so' cuno nij so' se vaa ve'é uxrá vaa nana ca'mii Jesucristó a. Gaa ne dan me se xná'anj nij so' man tuvi' nij so' sese nuveé ta'nij José síi ne chiháán ní' me so', xná'anj nij so' man tuvi' nij so' a.

23 Che'é dan me ca'mii Jesucristó nana nihánj rihaan nij so' a:

—Ne'én 'uñj se vaa cataj soj nana nihánj rihanj a: “Sese ya sij 'yaj cono'ó mé so', ne qui'yaj cono'ó so' man ma'án so' á”, cataj soj rihanj che'é se cuno soj se vaa que'ee suun sa' nocoo qui'yaj chuman' Capernaum a. Ne cataj soj rihanj se vaa qui'yaj suun sa' nocoo tuvi' yo' chuman' chiháán ní' nihánj uún a.

24 Tzaj ne vaa nana nihánj nana cataj ma'anj rihaan soj uún a: “Xa' síi nata' se-nana Diose, tzaj ne ne amán rá tuvi' so' ni'yaj nij so' man so' ma'”, me nana taj 'uñj no soj a.

25 ”Dan me se cunō soj ca'mij á. Ne'en soj se vaa gaa cayáán sí cu'naj Elías sí nata' se-nanā Diose gaa naá, ne cachén va'nuj yo' táá yanéé, ne caman', ne che'é dan guun uxrá x'naa nu' chiháán nij sí israelitá, ne yo' dan me se cayáán que'ee chana cavi' nica chiháán nij sí israelitá a.

26 Tzaj ne a 'ó chana nique cayáán chiháán nij sí israelitá ro', ne ca'nej Diose man Elías rihaan no', racuíj so' man no' ma'. Maan se rihaan orún' chana nique ne chuman' Sarepta chuman' noco' man chuman' Sidón ca'néé Diose man Elías, ne nda' se nuveé chana israelitá me no', tzaj ne racuíj Elías man no' adonj.

27 ”Ne ne'en soj se vaa que'ee yuvij quiran' ndo'o luj ri'yuj cayáán chiháán nij sí israelitá gaa cayáán sí cu'naj Eliseo sí nata' se-nanā Diose gaa naá a. Tzaj ne a 'ó nij so' ne nahuun ma'. Maan se orún' sí cu'naj Naamán sí cavii rej yanij cu'naj Siria nahuun, qui'yaj Eliseo adonj. —Danj cataj Jesucristó rihaan nij sí man rá ve' tucu'yón nii se-tucuanj Moisés ve' ne chiháán nij so' a.

28 Cuno nij yuvij ndaa vaa cavii sa' nij sí man chuman' yanij, ne guun xcoj ruvaa rá nij so', gaa ne ca'maan rá nij so' ni'yaj nij so' man Jesucristó a.

29 Naxumaan nij so' nicaj nij so' man Jesucristó ca'anj nij so' tu'va chuman' a. Ne dan me se chuman' yo' ro', naj xráá 'o tacaan ruvaa ndo'o a. Ne nicaj nij so' man Jesucristó ca'anj nij so' rej ruvaa, ne guun rá nij so' tanij nij so' man Jesucristó rej ruvaa a.

30 Tzaj ne cachén Jesucristó sca'núj nij yuvij, ne ca'anj so' nanj adonj.

Nana nihánj taj xna'anj se vaa quirii Jesucristó man yo' o nana chree nimán 'o snó'o a

³¹ Gaa ne ca'anj Jesucristó chuman' Capernaum chuman' naj estadó Galilea, ne güii naránj rá nij yuvii israelitá ca'anj Jesucristó ve' tucu'yón nij so' se-tucañj Moisés, ne tucu'yón so' se-nana Diose man nij yuvii a.

³² Ne caráya'anj nij yuvii se-nana so', che'é rej ase vaa a'mii 'o síi uun chij ndo'o ro', danj ca'mii so' rihaan nij yuvii a.

³³ Ne dan me se yáán 'o síi nuu nana chree nimán rá ve' yo', ne nucuaj ndo'o caguáj so', ne cataj so' se vaa:

³⁴ —Me che'é ra'yunj so' man núj, ga Jesús Nazareno'. 'Ná' so' tarí' so' man núj na'. Ne'enj mán so' se vaa síi guee cavii rihaan Diose mé so' adonj —taj síi nuu nana chree nimán rihaan Jesucristó a.

³⁵ Gaa ne canicaj Jesucristó caxríj yuvaá so' man nana chree nuu nimán snó'o yo', ne cataj so':

—Dínj tu'vá so' curihanj so' cuaj nimán síi nihánj á —taj Jesucristó rihaan nana chree yo' a.

Ndaa naxru' ma'an snó'o rej tanuu nij yuvii, qui'yaj nana chree, gaa ne curihanj nana chree nimán snó'o yo', ne nahuun sa' so', taj a doj chi'ii ran' so' a ma'.

³⁶ Gaa ne ca'anj uxrá rá nij yuvii, ne xná'anj nij so' man tuvi' nij so', cataj nij so':

—Daj sij me síi a'mii nana nihánj, ne uun chij so' rihaan nana chree, ne urihanj nij nana chree nimán yuvii 'yaj síi nihánj ga —taj nij yuvii ni'yaj nij yuvii man Jesucristó a.

37 Gaa ne cuchi' nana che'é Jesucristó rihaan cunudañj nij yuvii man nichrun' chuman' Capernaum yo' a.

Nana nihánj taj xna'anj se vaa nahuun nii chej Simón Pedró, qui'yaj Jesucristó a

38 Dan me se curihañj Jesucristó rá ve' tucu'yón nii se-tucuañj Moisés, ne ca'anj so' tucua' sí cu'naj Simón a. Ne ran' nii chej Simón chi'ij naca yuvaá, ne che'é dan cachín ni'yaj nii rihaan Jesucristó che'é no' a.

39 Gaa ne ca'anj Jesucristó canicun' so' rej tu'va yuvéé naj no', ne ca'ne' so' suun rihaan chi'ij se vaa quix'nee chi'ij xráá no' a. Gaa ne nu' quix'néj chi'ij xráá no', qui'yaj Jesucristó a. Ne veé mañ orá dan naxagaá no', ne qui'yaj chuvii no' chañj so' nanj adonj.

Nana nihánj taj xna'anj se vaa nahuun que'ee sí ran', qui'yaj Jesucristó a

40 Cata' güii, ne nicaj nij yuvii cunudañj tuvi' nij so' sí ran', vaj nij so' rej ne Jesucristó a. Que'ee ndo'o chi'ij ran' nij so' a. Ne ca'anj Jesucristó, cata' so' ra'a so' raá ndaa 'o 'o nij sí ran', gaa ne nahuun taran' nij so', qui'yaj Jesucristó a.

41 Ne que'ee nij sí ran' ro', curihañj nana chree nimán uún, ne caguáj nij nana chree yo', ne cataj nij so' se vaa ta'ní Diose me Jesucristó a. Tzaj ne caxrij yuvaá Jesucristó man nij nana chree, ne ne ca'vej rá Jesucristó ca'mij nij so' nana vaa danj a. 'Q se quene'en nij so' se vaa sij ca'néé Diose tinanii man yuvii rihaan sayuun me Jesucristó, ne ne ca'vej rá Jesucristó guun cuentó che'é so' a.

Nana nihánj taj xna'anj se vaa ca'anj Jesucristó nu' nij ve' tucu'yón nij yuvij israelitá se-tucuñanj Moisés, ca'mii natáj so' a

⁴² Rej taxrej cavii Jesucristó chuman' Capernaum ca'anj so' rej tacaan a. Gaa ne nano' nij síi man Capernaum man so', ne gaa nari' nij so' man Jesucristó, gaa ne caráán nij so' chrej rihaan Jesucristó, ne:

—Se ca'vee ca'anj so' rej yaníj ma' —taj nij so' rihaan Jesucristó a.

⁴³ Tzaj ne cataj Jesucristó rihaan nij so' a:

—Vaa ndo'o suun rihaan 'ujñj ca'anj 'ujñj yo'ó nij chuman' uún, ne nata' 'ujñj nana sa' nihánj rihaan nij síi ne yo'ó chuman' se vaa guun chij Diose rihaan chumij nihánj adonj. 'O se che'é nana sa' nihánj me ca'neé Diose manj ca'naj rihaan chumij nihánj ca'mii natáj 'ujñj rihaan cunudanj nij yuvij adonj —taj Jesucristó rihaan nij síi man Capernaum a.

⁴⁴ Gaa ne ca'ne' rá nij so', ne ca'anj Jesucristó nu' nij ve' tucu'yón nij yuvij israelitá se-tucuñanj Moisés ve' yanj estadó Judea, ne ca'mii natáj so' nana sa' a.

5

Nana nihánj taj xna'anj se vaa quiri' uxrá nij tuvij Simón Pedró xcuaj, qui'yaj Jesucristó a

¹ Dan me se 'o güii canicun' Jesucristó tu'va na lacuaná cu'naj Genesaret, ne cuchi' uxrá yuvij rej nicun' so', ne cunuu chre' ndo'o nij so' che'é se guun rá nij so' cunonj so' se-nana Diose a. Dan me se ndaa raan ma'an man nij so' x'núú Jesucristó a.

² Dan me se quene'en Jesucristó vij rihoo naj tu'va na lacuaná, ne síi uta xcuj me nij síi si'yaj rihoo yo', ne tanáj nij so' se-rihoo nij so' 'o orá nií, ne ca'anj na'nu' nij so' xnánj nij so' a.

³ Dan me se catúj Jesucristó rá 'o rihoo, ne se-rihoo síi cu'naj Simón me yo', ne cachíin ni'yaj Jesucristó rihaan Simón se vaa qui'yaj so' se ndo'o cuxuun so' rihoo ca'anj rihoo yo' doj rihaan na a. Gaa ne cayáan Jesucristó rque rihoo, ne tucu'yón so' se-nana Diöse man nij yuvii man tu'va na a.

⁴ Quisíj tucu'yón Jesucristó man nij yuvii, gaa ne cataj so' rihaan Simón, ne:

—Nícaj so' rihoo ca'anj so' rej cunuú doj na, gaa ne tiguíj soj nanj rá na á —taj Jesucristó rihaan so' a.

⁵ Tzaj ne cataj Simón rihaan Jesucristó, ne:

—Nigan' qui'yaj suun uxrá núj, tiguíj ndo'o núj nanj rá na, tzaj ne a 'o xcuj ne quirí' núj, man maestro. Tzaj ne maan che'é se ma'án so' cataj, ne ca'anj tiguíj uún núj nanj rá na nanj á —taj Simón rihaan Jesucristó a.

⁶ Dan me se ca'anj tiguíj uún nij tuvi' Simón nanj rá na, ne quiri' uxrá nij so' xcuj ndaa quisin' ma'an xnánj nij so', qui'yaj xcuj a.

⁷ Che'é dan canacúun nij so' man tuvi' nij so' síi nuu rque yo'ó rihoo, che'é rej guun rá nij so' racuíj tuvi' nij so' man nij so' a. Dan me se ca'na' nij tuvi' nij so' yan nicun' nij so', ne caraa uxrá nij so' xcuj rque roj rihoo a. Ne uxrá caraa roj rihoo, ne daj doj se ca'anj nij roj rihoo rque na nanj á.

⁸ Dan me se quene'en Simón Pedró se vaa qui'yaj Jesucristó, gaa ne ca'anj canicun' ruj so' rihaan Jesucristó, cataj so':

—Nuveé sij canicun' nichrun' rihaan so' mej a ma'. Sij atá ndo'o cacun' mej nanj á —taj Simón rihaan Jesucristó a.

⁹ Dan me se ca'anj ndo'o rá nij tuvı' Simón se vaa quiri' uxrá nij so' xcuj a.

¹⁰ Ne ca'anj rá síi cu'naj Jacobo do', síi cu'naj Juan do', che'é xcuj a. Ne tuvı' Simón me roj so', ne ta'núı' síi cu'naj Zebedeo me roj so' a. Ne dan me se cataj Jesucristó rihaan Simón, ne:

—Se cuchu'ví' so' ma'. 'O se rej rihaan ní' me se guún so' síi naqui'yaj chre' yuvıı canoco' yuvıı manj á —taj Jesucristó rihaan Simón a.

¹¹ Gaa ne nicaj nij so' se-rihoó nij so' ca'anj nij so' ndaa tu'va na a. Gaa ne tanáj nij so' cunudanj nij rasuun yo', ne canoco' nij so' man Jesucristó, ne ca'anj nij so' ga so' a.

Nana nihánj taj xna'anj se vaa nahuun sa' 'o síi ran' luj ri'yuj, qui'yaj Jesucristó a

¹² Dan me se 'o güııi caran' Jesucristó 'o chuman', ne cuchi' 'o síi ran' ndo'o luj ri'yuj rihaan so' a. Gaa quene'en síi ran' yo' man Jesucristó, gaa ne canicun' ruj so' rihaan Jesucristó, ne cachıın ni'yaj so' rihaan Jesucristó, cataj so':

—Sese me rá so', ne ca'vee ca'nee so' chi'ııi xráj, Señor —taj so' rihaan Jesucristó a.

¹³ Gaa ne cuta' Jesucristó ra'a Jesucristó raá síi ran', ne cataj Jesucristó:

—Me raj qui'yáj danj ei. Nahuún so', qui'yáj adonj —taj Jesucristó rihaan so' a.

Nu' danj cataj Jesucristó, ne nu' quinavııj luj xráá síi ran' a.

14 Dan me se ca'ne' Jesucristó suun rihaan síi nahuun yo', ne se cataj xna'anj so' rihaan a'ó yuvii che'é se vaa quiran' so' ma'. Gaa ne cataj uún Jesucristó rihaan so' a:

—Ca'anj so' rihaan xrej, ne tiháan so' mán so' rihaan xrej se vaa nahuún so', ne rque so' rihaan Diose se vaa cataj síi cu'naj Moisés gaa naá ndaa vaa no xcúún so' rque so' rihaan Diose che'é yan nahuún so' adonj. Gaa ne xcaj nij xrej cuentá se vaa nahuún so' qui'yáj adonj —taj Jesucristó rihaan síi nahuun yo' a.

15 Tzaj ne cha'nuu ndo'o nana che'é se vaa quiran' síi nahuun yo', ne che'é dan cunuu chre' ndo'o nij yuvii rej vaj Jesucristó a. Guun rá nij so' cunō nij so' se-nana Jesucristó, ne guun rá nij síi ran' x'nee chi'ii xraá nij so' uún a.

16 Tzaj ne naxuun Jesucristó man so' rihaan nij yuvii, ne ca'anj so' rej tacaan, ne cachíin ni'yaj ndo'o so' rihaan Diose a.

Nana nihánj taj xna'anj se vaa nahuun sa' 'o síi na'vee cachee, qui'yaj Jesucristó a

17 'O güii me se ne Jesucristó rá 'o ve', ne tucu'yón so' se-nana Diose man yuvii, ne ne doj síi fariseo ga síi naqui'yaj cuu se-tucuanj Moisés rá ve' yo', ne mán síi cavii chuman' Jerusalén do', yo'ó nij chuman' naj estadó Judea do', nij chuman' naj estadó Galilea do', mán ga nij so' rá ve' yo' a. Ne Diose síi 'nij ra'a man ní' ro', racuíj ndo'o man Jesucristó, ne nahuun ndo'o nij síi ran', qui'yaj Jesucristó a.

18 Dan me se táá 'o síi na'vee cachee rihaan yuvéé, ne táá chihā nii man so' ca'na' nii rihaan

Jesucristó a. Tzaj ne man ndo'o yuvij rá ve' ne Jesucristó, ne nano' nij so' rej catuu nij so' rá ve' cuchruj nij so' man sí ran' rihaan Jesucristó a.

19 Tzaj ne taj se qui'yá' ca'vee cachēn nij so' sca'núj nij yuvij a. Che'é dan cavii nij so' xráá ve', ne caya' nij so' yu'uj xráá ve', che'é rej ca'vee tinanij nij so' man sí ran' rihaan Jesucristó a.

20 Gaa quene'en Jesucristó se vaa cuchumán uxrá rá nij tuvij' sí ran' yo' se vaa ca'vee nahuun so' qui'yaj Jesucristó, gaa ne cataj Jesucristó rihaan sí ran' yo', ne:

—Navij cacun' xráá so', nanj tinuj —taj Jesucristó rihaan so' a.

21 Ne cuno nij sí fariseo cuno nij sí naqui'yaj cuu se-tucuanj Moisés cuno nana ca'mii Jesucristó, gaa ne nuchruj raá nij so' nana nihánj ga tuvi' nij so' a:

—Daj sij me sí nihánj, ne a'mii so' nana vaa nij rihaan Diose ga. Orún' Diose uun nucuaj tinavij cacun' xráá yuvij nanj á —taj nij so' ga tuvi' nij so' a.

22 Quene'en Jesucristó daj nuchruj raá nij so', ne che'é dan cataj so' rihaan nij so' a:

—Me che'é nuchruj raá soj nana nanj ga.

23 Tu'va rma'án 'unj se vaa navij cacun' xráá sí nihánj, rá soj a na'. Ca'vee cataj uun ní' navij cacun' xráá sí nihánj na'. Ase ca'vee doj cataj ní' naxagaa so', ne cachee so' cuaj, cataj ní' xa'.

24 Dan me se me rá 'unj xcaj soj cuentá se vaa sí ca'née Diose nīcaj yu'unj man yuvij mej ne no xcúún 'unj tinavíi 'unj cacun' xráá nij yuvij man rihaan chumii nihánj adonj —taj Jesucristó rihaan nij so' a.

Dan me se cataj Jesucristó rihaan síí na'vee cachee a:

—Rihaan so' sij na'vee cachee taj 'unj, ne nacue so' tuvée so', ne nán' so' tucúa so' á —taj Jesucristó rihaan síí naj rihaan yuvéé yo' a.

²⁵ Nu' danj tu'va Jesucristó, gaa ne nu' naxagaa síí ran' yo' ni'yaj taran' nij yuvii a. Gaa ne nacué so' tuvée so', gaa ne nan' so' tucúa so', ne ve'é uxrá ca'mii so' che'é Diose a.

²⁶ Dan me se ca'anj rá taran' nij yuvii man rá ve' yo', ne cataj nij yuvii se vaa ve'é uxrá qui'yaj Diose a. Ne chucu'vi' ndo'o nij yuvii, ne cataj nij yuvii se vaa:

—Nihá' uxrá vaa suun sa' nocoo quene'en ní cuan' adonj —taj nij yuvii yo' a.

Nana nihánj taj xna'anj se vaa nacúún Jesucristó man Leví, ne canoco' Leví man so' a

²⁷ Quisíj nahuun síí ran' yo', gaa ne curihanj Jesucristó xe', ne quene'en so' man 'o síí a'néj puextó cu'naj Leví a. Ne ne síí cu'naj Leví 'o ve' a'néj nii puextó man yuvii a. Gaa ne cataj Jesucristó rihaan so', ne:

—Canocó' so' manj, ca'anj ní á —taj Jesucristó rihaan so' a.

²⁸ Gaa ne tanáj Leví man cunudanj rasuun nicaj so', ne naxumaan so', canoco' so' man Jesucristó, ca'anj so' a.

Nana nihánj taj xna'anj se vaa me rá Jesucristó racuíj so' man níí tumé cacun' a

²⁹ Gaa ne canuû ndo'o cha'anj nocoo tucúa Leví che'é Jesucristó, qui'yaj Leví a. Ne man que'ee ndo'o tuvi' so' síí a'néj puextó do', que'ee yo'ó

yuvij do', mán tucuá Leví, ne ne nij so' ga nij tuví Jesucristó a.

³⁰ Dan me se mañ nij síi fariseo do', síi naqui'yaj cuu se-tucuañj Moisés noco' man nij síi fariseo do', gaa ne ca'mii chi'ii nij so' che'é Jesucristó rihaan nij síi tucu'yón se-nana Jesucristó a. Dan me se cataj nij síi fariseo ga nij síi naqui'yaj cuu se-tucuañj Moisés:

—Me che'é chá soj chraa ne 'o soj na ga nij síi a'néj puextó do', ga yo'ó nij síi tumé cacun' do', ga —taj nij so', xna'anj nij so' man nij síi tucu'yón se-nana Jesucristó a.

³¹ Gaa ne dan me se cataj ma'an Jesucristó rihaan nij so' a:

—Síi vaa nucuaj ro', ne nano' nij so' man doctor ma'. Maan se síi ran' ro', me síi nano' man doctor adonj. Gaa ne ase vaa síi ran' ro', danj vaa nij síi nihánj adonj.

³² 'O se ne ca'na' 'unj canacunj 'unj man síi sa' ma'. Che'e nij síi tumé cacun' ca'naj se vaa canicaj nimán nij so' ne canoco' nij so' se-nanañ adonj. Tzaj ne sese síi sa' me soj, rá soj, ne nuveé sij canacunj 'unj man me soj ma' —taj Jesucristó rihaan nij so' a.

Nana nihánj taj xna'anj me che'é ne toco' nij síi tucu'yón se-nana Jesucristó x'naa man ma'an nij so' a

³³ Gaa ne nij síi fariseo ga nij síi naqui'yaj cuu se-tucuañj Moisés me se cataj nij so' rihaan Jesucristó a:

—Me che'é, ne nij síi tucu'yón se-nana Juan síi uta' ne man yuvij me se toco' nij so' x'naa man ma'an nij so' do', na'víj nij so' do', ne veé danj 'yaj

nij sí tucu'yón se-nanā núj sij fariseo dō', tzaj ne nij sí tucu'yón se-nanā so' me se ne toco' nij so' x'naa man ma'an nij so' dō', ne na'vúj nij so' dō', rihaan Diose ga —taj nij so' rihaan Jesucristó a.

³⁴ Ne cataj Jesucristó rihaan nij so':

—Ase vaa síi cuchruj sa'anj vaa 'unj, ne asa' ca'vee toco' nij síi man gaj x'naa man ma'an nij so', rá soj ga. Ase vaa síi cataj xcaj man chanā ne man tuvi' so' dō', danj vaa nij síi man nihánj cuano, ne anuū ndo'o cha'anj man nij so', ne se ca'vee toco' nij so' x'naa man ma'an nij so' cuano ma'.

³⁵ Tzaj ne vaa güii, ne guun yaníj 'unj rihaan nij so', qui'yaj yuvií, gaa ne nano rá nij síi nihánj, gaa ne toco' nij so' x'naa man ma'an nij so' adonj —taj Jesucristó rihaan nij síi fariseo ga nij síi naqui'yaj cuu se-tucuanj Moisés yo' a.

³⁶ Gaa ne ca'mii Jesucristó yo'ó nana rihaan nij so', cataj so':

—Ase vaa yatzíj sin' vaa tucuáán nga noco' soj, ne se guun cusin' ní' yatzíj naca ne na'nej ní' man yatzíj nga ma'. Sese danj qui'yaj ní', gaa ne quirí' nu' yatzíj naca yo', qui'yaj yatzíj nga nanj adonj. Gaa ne ino uxrá gaa yatzíj naca, qui'yaj yatzíj nga yo' nanj adonj.

³⁷ Ne dan me se ase vaa nuj nga nuj araa nii na vinó vaa uún soj a. Ne se ca'vee tucu'yón 'unj se-tucuanj 'unj man soj ma'. 'Q se ase vaa na vinó naca vaa nana tucu'yón 'unj, ne se guun caraa yuvií na vinó naca rque nuj nga ma'. Sese danj qui'yaj yuvií, ne cuyan na vinó cunu xee na vinó, ne se cacua nuj nga ma'. Che'é dan canuu yo', ne cayan na vinó rihaan yo'ó a.

38 Che'é dan araa nii na vinó naca rque nuj naca, ne 'o mán sa' na vinó rque nuj yo' a. Che'é dan inanj rihaan síi naca síi ne noco' tucuáán nga tucu'yón 'unj se-nanaj nanj adonj.

39 Ne taj síi guun rá co' o na vinó naca, sese aj co' o so' na vinó nga ma'. 'O se sa' doj vaa na nga, cataj so' nanj á. Ne danj vaa guee soj, inanj tucuáán nga noco' soj, ne che'é dan na'vej soj canoco' soj tucuáán naca nanj adonj. —Danj cataj Jesucristó rihaan nij síi fariseo do', rihaan nij síi naqui'yaj cuu se-tucuanj Moisés do' a.

6

Nana nihánj taj xna'anj che'é güii naránj rá ní' a

1 'O güii naránj rá nij yuvií israelitá cachén Jesucristó ga nij síi tucu'yón se-nana so' rque 'o naa 'núu trigó a. Ne cuta nij síi tucu'yón se-nana Jesucristó doj caa trigó, ne tuguáj ra'a nij so' caa, gaa ne chá nij so' doj trigó a.

2 Gaa ne xná'anj ta'aj síi fariseo man nij so', cataj nij so':

—Me che'é 'yaj soj danj ga. Ne nó xcúún ní' cuta ní' trigó güii naránj rá ma' —taj nij síi fariseo rihaan nij síi tucu'yón se-nana Jesucristó a.

3 Tzaj ne cataj ma'an Jesucristó rihaan nij síi fariseo a:

—Me che'é, ne ne nayaa soj rihaan danj Diose daj qui'yaj síi cu'naj David gaa naá a. Gaa quina'aan rque nij tuvi' nij so',

4 gaa ne catúj so' rá nuvíí, ne chá so' rachrúún taj rihaan se-mesa Diose a. Ne go' uún so' chá nij tuvi' so' uún a. Ne ne nó xcúún nij so' chá nij so'

rachrúún yo', maan se orún' nij xrej nó xcúún cha rachrúún yo' a. Tzaj ne maan che'é se rque nij so' na'aan uxrá, gaa ne chá nij so' rachrúún yo' nanj adonj. Tzaj ne ne cataj Diose se vaa tumé síí cu'naj David cacun' ma' —taj Jesucristó rihaan nij síí fariseo a.

⁵ Gaa ne canicaj so', cataj uún so' a:

—Síí ca'née Diose nicaj yu'unj man yuvii mej, ne no xcúnj quirii ta'ngaj daj qui'yaj yuvii güii naránj rá yuvii adonj —taj Jesucristó rihaan nij síí fariseo a.

Nana nihánj taj xna'anj se vaa nahuun sa' 'o síí nacoo ra'a, qui'yaj Jesucristó a

⁶ Dan me se yo'ó güii naránj rá nij yuvii israelitá ro', catúj Jesucristó rque 'o ve' tucu'yón nij so' se-tucuanj Moisés, ne tucu'yón so' se-nana Diose man nij yuvii a. Ne dan me se yáán 'o snó'o rá ve' yo', ne nacoo ra'a so' rej nuva' so' a.

⁷ Ne nij síí naqui'yaj cuu se-tucuanj Moisés rihaan yuvii do', nij síí fariseo do', yáán nij so' rá ve', ne tumé uxrá nij so' man Jesucristó sese nahuun yuvii qui'yaj so' gaa güii naránj rá nij so' a. Danj qui'yaj nij so' che'é rej guun rá nij so' cuta' nij so' cacun' xráá Jesucristó a.

⁸ Tzaj ne quene'en Jesucristó se vaa guun rá nij so', gaa ne cataj so' rihaan síí nacoo ra'a a:

—Naxumaan so' canicun' cayá so' sca'núj á —taj Jesucristó rihaan so' a.

Gaa ne naxumaan so', ne canicun' cayá so' sca'núj nij yuvii a.

⁹ Gaa ne cataj Jesucristó rihaan nij síí nanó chi'ii rá a:

—Cuanō nihánj me se xná'anj 'unj man soj che'é güii naránj rá xa'. Nō xcúún ní' račuíj ní' tuvi' ní' na'. Ase nō xcúún ní' qui'yaj chí'ii ní' man tuvi' ní' xa'. Daj qui'yaj ní' rá soj gaa güii naránj rá ní' ga. Ne nó xcúún ní' tinanii ní' man tuvi' ní' rihaan sayuun gaa güii naránj rá gaa a na'. Ni'yaj un ní' cavi' so' gaa güii naránj rá gaa a na'. —Danj taj Jesucristó rihaan nij so' a.

¹⁰ Gaa ne ni'yaj Jesucristó man cunudanj nij yuvij man rque ve' yo', gaa ne cataj so' rihaan síi nacoq ra'a a:

—Tucuá so' ra'á so' á —taj Jesucristó rihaan so' a.

Ne tucuá so' ra'a so', ne cunuu sa' ra'a so' adonj.

¹¹ Tzaj ne ca'maan ndo'o rá nij síi naqui'yaj cuu se-tucuanj Moisés ga nij síi fariseo, ne guun rá nij so' ga tuvi' nij so' daj gaa qui'yaj chí'ii nij so' man Jesucristó a.

Nana nihánj taj xna'anj se vaa narii Jesucristó chuvij apóstol ca'anj nata' se-nana so' a

¹² Dan me se cachén doj güii, gaa ne ca'anj Jesucristó rej quij, ca'anj cachinj ni'yaj so' rihaan Diose a. Nigan' quináj so' quij cachín ni'yaj so' rihaan Diose a.

¹³ Ranga', gaa ne canacúún Jesucristó man cunudanj nij síi tucu'yón se-nana so' ca'na' nij so' rihaan so', gaa ne narii Jesucristó man chuvij nij so' guun nij so' apóstol nata' rihaan yuvij che'é so' a.

¹⁴ 'Q so' me síi cu'naj Simón, ne tucu'náj Jesucristó Pedró man so' a. Yo'ó so' me tinúú Pedró síi cu'naj Andrés a. Yo'ó nij so' me Jacobo do', Juan do', Felipé do', Bartolomé do',

15 Mateo do', Tomás do', Jacobo ta'núí Alfeo do' a. Yo'ó so' uún me Simón, ne tuvi' nij síí me rá cunu' ga gobiernó ne Romá me so' a.

16 Yo'ó so' me Judas tinúú Jacobo, ne yo'ó so' uún me Judas Iscariote síí tacuachén man Jesucristó rihaan nij síí taj ri'yunj man Jesucristó a.

Nana nihánj taj xna'anj se vaa nago' Jesucristó chrej man 'o x'ne' nocoo yuvií a

17 Dan me se nanij Jesucristó ga chuvij nij apóstol yo' taa rque doj, ne cuchi' nij so' 'o rej vaa taa, ne nocoo doj síí tucu'yón se-nana so' mán ga so' a. Ne ca'na' ndo'o yuvií cavii chuman' Jerusalén do', yuvií cavii yo'ó nij chuman' naj estadó Judea do', yuvií cavii rej tu'va na ya'anj rej naj chuman' Tiro ga chuman' Sidón do' a.

18 Ne guun rá nij yuvií cunó nij so' se-nana Jesucristó, ne guun rá nij síí ran' nahuun nij so' a. Ne vaa nij yuvií nuu nana chree nimán, ne sayuun ndo'o quiran' nij yuvií, qui'yaj nana chree, tzaj ne quirii Jesucristó nana chree nuu nimán nij so', ne cunuu sa' nij so', qui'yaj Jesucristó a.

19 Gaa ne guun rá cunudanj nij yuvií canó ra'a nij so' xráá Jesucristó che'é se cavii ndo'o se nucaj man Jesucristó, ne nahuun sa' cunudanj nij yuvií, qui'yaj Jesucristó a.

Nana nihánj taj xna'anj me yuvií cavii sa' doj ne me yuvií quiran' sayuun a

20 Gaa ne naxcaj Jesucristó rihaan so' ni'yaj so' man nij síí tucu'yón se-nana so', gaa ne cataj so':

—Cavii sa' taran' soj sij nique, ne soj me síí cayáán ga Diose gaa güii guun chij Diose rihaan chumii nihánj adonj.

21 "Cavii sa' taran' soj sij na'aan rque cuano adonj. Vaa güii quiri' soj se cha soj adonj.

"Cavii sa' taran' soj sij ta'vee cuano adonj. Vaa güii ca'nga' ndo'o soj adonj.

22 "Ne cavii sa' ndo'o soj sese quitaj ri'yunj yuvii man soj do', sese quiri' yaníj yuvii man soj do', sese ca'mii yuvii nana nij rihaan soj do', sese nachri' yuvii ni'yaj yuvii man soj se vaa sij chi'ii me soj do', che'é se me soj síi noco' manj sij ca'neé Diose nica'j yu'unj man yuvii adonj. Ne quene'en soj se vaa ya cavii sa' soj adonj.

23 Gaa ne güii quira' soj danj me se no xcúun soj guun niha' uxrá rá soj ne güej ndo'o soj, che'é se uxrá naru'vee Diose rihaan soj asa' cuchí' soj rej xta' adonj. 'O se ase vaa 'yaj nij yuvii man soj ro', ta'nga' danj qui'yaj xii nij yuvii man nij síi nata' se-nana Diose gaa naá uún adonj.

24 "Tzaj ne nique ndo'o soj sij ru'vee nanj á. Soj sij ru'vee me se aj quiri' soj nu' se sa' nica'j soj, ne taj vaj doj se sa' rque Diose man soj a ma'.

25 "Nique soj sij vaa raan rque cuano nanj á. Vaa güii quina'aan rque soj adonj.

"Nique soj sij a'nga' cuano nanj á. Vaa güii quina' ndo'o rá soj do', ta'vee soj do', adonj.

26 "Ne nique soj sij ve'é inanj a'mii cunudanj yuvii che'é nanj á. 'O se ase vaa ve'é inanj a'mii nij yuvii che'é soj ro', ta'nga' danj ca'mii xii nij yuvii che'é nij síi tiha' yu'unj se vaa sij nata' se-nana Diose me nij so' gaa naá a —taj Jesucristó rihaan cunudanj nij síi tucu'yón se-nana so' a.

Nana nihánj taj xna'anj se vaa gaa 'ee rá ní' man nij síi taj ri'yunj man ní' a

27 Canicaj Jesucristó, cataj so' a:

—Tzaj ne rihaan soj sij man nanó xrej ro', cataj xna'anj 'unj se vaa gaa 'ee rá soj man nij síí taj ri'yunj ni'yaj man soj, ne qui'yaj soj se luj che'é nij síí nachri' ni'yaj man soj ei.

28 Ve'é ca'mii soj rihaan nij síí a'mii quij rihaan soj, ne cachinj ni'yaj soj rihaan Diose che'é nij síí 'yaj se nij man soj a.

29 Sese vaa síí coxro nichrej xruú so', ne ca'ne' rá so' coxro so' nichrej xruú so' uún a. Sese vaa síí ca'néj se-roto so', ne ca'ne' rá so' ca'nee so' se-cotoó so' uún a.

30 Ne me ma'an yuvii achíin ni'yaj rasuun rihaan soj, ne go' soj rasuun yo' man nij so' ei. Sese vaa yuvii ca'néj si'yaj soj, ne se nachin' soj si'yaj soj ma'.

31 Dan me se daj se uun rá soj qui'yaj sa' yuvii rihaan soj ro', ta'nga' danj qui'yaj sa' soj rihaan yuvii á.

32 ”Dan me se gaa 'ee rá soj man cunudanj yuvii ei. Sese 'ee rá soj man inanj nij síí 'ee rá man soj, gaa ne me che'é naru'vee Diose rihaan soj, rá soj ga. 'O se ndaa nij síí chi'ii ro', 'ee rá nij so' man nij síí 'ee rá man nij so' nanj á.

33 Ne qui'yaj soj se luj rihaan cunudanj yuvii ei. 'O se sese qui'yaj soj se luj rihaan inanj síí 'yaj se luj rihaan soj, gaa ne me che'é naru'vee Diose rihaan soj, rá soj ga. 'O se ndaa nij síí chi'ii ro', 'yaj nij so' se luj rihaan tuvi' nij so' sij 'yaj se luj rihaan nij so' nanj adonj.

34 Me ma'an yuvii racuíj soj sa'anj, ne se guun rá soj nacaj uún soj se-sa'anj soj ma'. Sese racuíj soj sa'anj man inanj síí naru'vee rihaan soj, gaa ne

me che'é naru'vee Diose rihaan soj, rá soj ga. 'O se ndaa ma'an nij sí chí'ii ro', racuíj nij so' sa'anj man nij tuvi' so' sij naru'vee rihaan so' adonj.

³⁵ "Dan me se gaa 'ee rá soj man nij sí taj ri'yunj ni'yaj man soj, ne qui'yaj soj se luj rihaan nij sí nachri' man soj, ne racuíj soj sa'anj man yuvii, ne se guun rá soj nacaj uún soj se-sa'anj soj ma'. Ne vaa güii, ne narque uxrá Diose se sa' man soj, ne ta'núí Diose sí sa' ndo'o me soj gaa adonj. 'O se Diose me sí 'yaj se luj rihaan ndaa sí ne ne'en me se uun se luj do', rihaan ndaa sí chí'ii do', adonj.

³⁶ Ase vaa 'ee rá Rej ní' Diose man daj a nij yuvii ro', danj gaa 'ee rá soj man daj a nij yuvii uún adonj. —Danj cataj Jesucristó rihaan nij sí tucu'yón se-naṇa so' a.

Nana nihánj taj xna'anj daj qui'yaj ní' gaa ca'mii ní' ga tinúú ní' che'é cacun' tumé tinúú ní' a

³⁷ Ne canicaj Jesucristó cataj so' a:

—Se guun niha' rá soj cuta' soj cacun' xráá tinúú soj, gaa ne taj cacun' cuta' Diose xráá ma'an soj man adonj. Maan se caraa x'naa soj rihaan tinúú soj, ne caraa x'naa Diose rihaan ma'an soj uún adonj.

³⁸ Go' soj rasuun man tuvi' soj, ne Diose me sí narque rasuun rihaan soj uún adonj. So' me sí sa' ndo'o rá, ne adi' se 'yaj sí sa' rá tu'vej 'núú ne araa navii so' rihaan tanej ro', danj qui'yaj guee Diose ga soj, ne doj a narque Diose rasuun sa' man soj adonj. Ase vaa 'yaj guee soj ga tuvi' soj ro', danj qui'yaj guee Diose ga soj uún adonj. —Danj cataj Jesucristó rihaan nij sí tucu'yón se-naṇa so' a.

³⁹ Gaa ne nanó Jesucristó se-cuento roj síi tuchrii rihaan nij síi tucu'yón se-nana so' a:

—Ne ca'vee tihaan 'o síi tuchrii chrej rihaan tuvi' tuchrii so', rá soj na'. Taj ma'. Sese danj qui'yaj so', gaa ne quinij roj so' rá yu'uj nanj adonj.

⁴⁰ Danj nanj uún, ne 'o xnii tucu'yón se guun nucuaj so' quene'en so' doj rihaan se-maestro so' ma'. Ne ca'vee se uxrá tucu'yón so', tzaj ne veé ase vaa ne'en se-maestro so' ro', veé danj quene'en ma'an so' nanj adonj.

⁴¹ Me che'é guun chree rá so' ni'yaj so' ni'ya nuu rihaan tinúú so' ga. Ne ne ni'yaj so' chruun manj nuu rihaan ma'an so' a.

⁴² Asa' ca'vee cataj so' rihaan tinúú so': “Rque so' rihaan so' quirii 'unj ni'ya á”. Se guun a doj cataj so' danj tihá' so' man tinúú so' ma'. Asino quirii so' chruun manj nuu rihaan so', gaa ne aj ruvi' sa' rihaan so', gaa ne ca'vee quirii so' ni'ya nuu rihaan tinúú so' adonj. Dan me se ase vaa aráán ni'ya rihaan yuvii ro', danj vaa aráán rihaan yuvii 'yaj cacun' ata yuvii ne na'vee xcaj sa' nij yuvii cuentá man adonj —taj Jesucristó rihaan nij síi tucu'yón se-nana so' a.

Nana nihánj taj xna'anj se vaa ase vaa nimán yuvii ro', danj vaa a'mii yuvii a

⁴³ Gaa ne canicaj Jesucristó, cataj so':

—Chruun sa' ro', se guun cumān chruj nij raā ma'. Ne chruun nij ro', se guun cumān chruj sa' raā ma'. Ase vaa chruun yo' ro', danj vaa nimán yuvii, ne ase vaa chruj yo' ro', danj vaa se vaa 'yaj nij yuvii adonj.

44 Maan chruj man raá chruun ro', 'yaj ne'en ní' daj chruun me yo' adonj. Taj rutzi' mán raá chruun tanj yangíj ma'. Ne taj rcoo mán raá chruun tanj xcuáa ma'.

45 Dan me se síi sa' ro', man ndo'o se sa' nimán so', ne a'mii so' inanjanana sa' adonj. Síi chí'ii ro', man ndo'o se quij nimán so', ne a'mii so' inanjanana chí'ii adonj. 'O se ase vaa se man nimán yuvií ro', danj vaa nana a'mii yuvií nanj á —taj Jesucristó rihaan nij síi tucu'yón se-nana so' a.

Nana nihánj taj xna'anj se vaa ase vaa síi 'yaj ve' sa' ro', danj vaa síi uno sa' rihaan Jesucristó a

46 Canicaj Jesucristó, cataj so' nana nihánj a:

—Me che'é taj soj se vaa síi 'nij ra'a man soj mej, tzaj ne ne uno soj rihanj ga. Ne chihan' 'yaj soj ma'.

47 Cuanó nihánj me cataj xna'anj 'unjanrihaan soj daj sij me síi 'na' nanó xrej nana a'mij, ne 'yaj so' ndaa vaa taj se-nanaj a.

48 Ase vaa 'o síi cune' ve' tucua rihaan 'o yuvej vaa so' a. Cunuu ndo'o váán so' rej cuchruj so' tacóo ve', ne raan ndo'o yáán ve', 'yaj so' a. Ca'vee se maan nana yuvaá curihanj go' xraá ve', ne ca'vee se cavii chraá, ne ca'na' na xee go' na xee tacóo ve', tzaj ne se naxru' ve', qui'yaj na xee ma'. Danj vaa síi uno se-nanaj a.

49 Tzaj ne ino vaa síi nanó xrej nana a'mij tzaj ne ne 'yaj ndaa vaa taj se-nanaj ma'. Ase vaa 'o síi 'yaj ve' nij vaa so' a. Ne váán cunuu so' rej cuchruj so' tacóo ve' rihaan yo'óo ma'. Che'é dan yáán cuan' uun tucua so' a. Sese curihanj maan nana yuvaá, ne go' yo' xraá ve', ne sese cavii chraá, ne ca'na' na xee go' na xee tacóo ve', gaa ne canee guee ve' nanj

á. Nu' canēē ve' yo', ne daj chihāa mίj se cunuu sa' yo' a ma'. Danj vaa síí ne uno se-nānāj adonj —taj Jesucristó rihaan nij síí tucu'yón se-nānā so' a.

7

Nanā nihánj taj xna'anj se vaa nahuun se-mozó tanuu capitán, qui'yaj Jesucristó a

¹ Quisίj ca'mii Jesucristó nu' nanā yo' cuno nij yuviī, gāa ne ca'anj so' chuman' Capernaum a.

² Dan me se yáán 'o tanuu capitán chuman' yo', ne síí rii ta'nga' rihaan 'o cientó tanuu me so' a. Ne vaa 'o se-mozó so' síí 'eē uxrá rá so' man, ne ran' uxrá mozó yo', ne daj doj cavi' so' a.

³ Dan me se cuno tanuu capitán se vaa ca'na' Jesucristó chuman' yo', ne ca'née so' doj síí uun chij rihaan nij yuviī israelitá cuchī' nij so' rihaan Jesucristó, ne cachīnj ni'yaj nij so' rihaan Jesucristó se vaa ca'na' so' tinahūun so' se-mozó tanuu capitán yo' a.

⁴ Dan me se cuchī' nij síí uun chij yo' rihaan Jesucristó, gāa ne cachíín ni'yaj uxrá nij so' rihaan Jesucristó, cataj nij so':

—Síí sa' me tanuu capitán yo', ne che'é dan vaa che'é račuíj so' man so' adonj.

⁵ 'Eē rá so' man ní' sīj israelitá, ne ma'an so' qui'yaj ve' nuu chre' núj tucu'yón núj se-tucuanj Moisés adonj —taj nij so' rihaan Jesucristó a.

⁶ Ne ca'anj Jesucristó gā nij so', ne daj doj cuchī' nij so' ve', gāa ne ca'née tanuu capitán man tuvi' so' ca'anj carān' man Jesucristó, ne cataj nij so':

—Se caráyá'áán so', man maestro. 'O se nuveé sij sa' me so', taj so' ma'. Ne nó xcúún so' catuú so' rá ve' tucúa so', taj so' ma'.

⁷ Che'é dan ne quisij rá ma'an so' ca'na' so' rihaan so', taj so' ma'. Maan se ca'ne' uun so' suun se vaa nahuun se-mozó so', gaa ne nahuun ma'an se-mozó so', taj so' nanj á.

⁸ Ne cataj so' se vaa vaa síi rii ta'nga' rihaan so', ne rii ta'nga' so' rihaan tanuu, ne taj xna'anj so' rihaan tanuu se vaa ca'anj nij so', ne 'anj nij so', ne taj xna'anj so' rihaan nij tanuu se vaa ca'na' nij so', ne 'na' nij so' rihaan so', ne taj xna'anj so' daj qui'yaj nij tanuu, ne veé danj 'yaj nij tanuu adonj. Ne ne'en so' se vaa ase vaa rii ta'nga' so' rihaan nij tanuu noco' man so' ro', danj rii ta'nga' guee so' rihaan chi'ii anó man yuvij, taj so' nanj á —taj nij tuvi' tanuu capitán rihaan Jesucristó a.

⁹ Dan me se gaa cuno Jesucristó nana ca'mii tuvi' tanuu capitán yo', ne ca'anj rá Jesucristó, ne canicaj so' cataj so' rihaan nij síi noco' rej xco so' a:

—Cuanō nihánj me cataj xna'anj 'unj rihaan soj se vaa taj vaj a 'ó rej ne narij man yo'ó síi israelitá síi cuchumán ndo'ó rá nana a'mii 'unj ndaa vaa amán rá tanuu capitán nihánj a ma' —taj Jesucristó rihaan nij so' a.

¹⁰ Dan me se canicaj uún nij tuvi' tanuu capitán ca'anj nij so' tucúa so', ne gaa cuhí' nij so', ne aj nahuun se-mozó tanuu capitán yo', qui'yaj Jesucristó a.

Nana nihánj taj xna'anj se vaa cunuu i'na' uún ta'nú' 'o chana cavi' nica, qui'yaj Jesucristó a

11 Dan me se cachén doj güii, gaa ne ca'anj Jesucristó chuman' cu'naj Naín gā nij síi tucu'yón se-nana so' gā 'o x'ne' nocoo yuvií a.

12 Quinichrun' nij so' tu'va chuman', gaa ne dan me se nari' tuvi' Jesucristó gā nij síi ca'anj cachin' 'o xngá a. Ne síi cavi' me se orún' so' me ta'níi chana cavi' nica, ne vaj 'o x'ne' nocoo yuvií man chuman' yo' gā nii so' rihaan santó a.

13 Dan me se quene'en Jesucristó man chana yo', gaa ne cunuu 'ee rá so' man no', gaa ne cataj so':

—Se ta'veé so' ma' —taj so' a.

14 Gaa ne dan me se ca'anj Jesucristó canó ra'a so' man chrúun taj xngá, gaa ne canicun' nij síi taj chihá xngá a. Gaa ne cataj Jesucristó rihaan síi cavi' a:

—Cunó so' a'mij, ne naxagaa so', xnii —taj Jesucristó rihaan síi cavi' yo' a.

15 Gaa ne cunuu i'na' ya uún xnii, ne naxagaa so', gaa ne guun che'e xnii ca'mii so' a. Gaa ne:

—Nihánj 'na' ta'níi so' á —taj Jesucristó rihaan nii xnii a.

16 Gaa ne dan me se ca'anj rá taran' nij yuvií se vaa qui'yaj Jesucristó, gaa ne guun niha' rá nij so' se vaa ve'é qui'yaj Diose, gaa ne canicaj nij so' cataj nij so' se vaa ca'née Diose 'o síi nata' se-nana so' rihaan nij so' a. Ne cataj uún nij so' se vaa ca'na' Diose racuíj so' man nij so' sji noco' man Diose a.

17 Gaa ne cuchi' nana rihaan nij yuvií man estadó Judea do', rihaan nu' nij yuvií man anicaj estadó Judea che'é se vaa qui'yaj Jesucristó a.

Nana nihánj taj xna'anj che'é nana ca'mii Jesucristó che'é síi cu'naj Juan síi cuta' ne man yuvií a

18 Dan me se cuno nij sí tucu'yón se-nana Juan nu' se vaa qui'yaj Jesucristó, gaa ne cataj xna'anj nij so' rihaan Juan a. Gaa ne canacúun Juan man vij sí tucu'yón se-nana so' ca'na' roj so' rihaan so', gaa ne dan me se ca'née so' man roj so' cuchì roj so' rihaan sí 'nij ra'a man ní' a.

19 Ne nana nihánj ro', xna'anj roj so' man Jesucristó, taj sí cu'naj Juan rihaan roj so' a: “So' me sí ca'na' tinanii man yuvii rihaan sayuun na'. Ase na'vij ní' ca'na' yo'ó so' xa'”. Dan me nana me rá sí cu'naj Juan xna'anj roj so' man Jesucristó a.

20 Dan me se cuchì roj so' rihaan Jesucristó, ne cataj roj so':

—Vij ran' rój me sí ca'née Juan sí uta' ne man yuvii ca'na' rihaan so' a. Me rá Juan quene'en so' sese ma'án so' me sí ca'na' tinanii man yuvii rihaan sayuun ni', ase na'vij ní' ca'na' yo'ó so' a —taj roj so' rihaan Jesucristó a.

21 Gaa ne veé maan orá ca'na' roj sí ca'née Juan man ro', nahuun que'ee ndo'o sí ran' do', curihanj nana chree nimán que'ee yuvii do', nachuguun rihaan que'ee sí tuchrii do', qui'yaj Jesucristó a.

22 Gaa ne cataj xna'anj Jesucristó rihaan roj so' a:

—Cavii roj soj cuchì uún roj soj rihaan sí cu'naj Juan, ne cataj xna'anj roj soj rihaan so' nu' nana cuno roj soj do', nu' se vaa quene'en roj soj do' á. Dan me se nij sí tuchrii ro', naxra' rihaan, ne nij sí na'vee cachee ro', chée nij so', ne nij sí ran' luj ri'yuj ro', nahuun sa', ne nij sí so'o ro', nachuguun xrée nij so', ne nij sí cavi' ro', cuuu i'na' uún, ne nij sí nique ro', uno nij so' nana sa' a. Nu' nihánj cataj xna'anj roj soj rihaan sí cu'naj Juan yo' á.

23 Ne cataj uún roj soj rihaan síi cu'naj Juan se vaa cavii sa' so' qui'yaj Diose, sese se guun na'aj so' ni'yaj so' manj a. Danj ca'mii roj soj rihaan síi cu'naj Juan yo' ei —taj Jesucristó rihaan roj síi tucu'yón se-nana Juan yo' a.

24 Dan me se gaa ca'anj roj síi ca'anj suun che'é Juan, gaa ne guun che'e Jesucristó ca'mii so' rihaan cunudanj nij yuvii che'é síi cu'naj Juan síi cuta' ne man yuvii a:

—Asij ca'anj soj rej tacaan quene'en soj man síi cu'naj Juan ro', ne daj gaa so' quene'en soj, rá soj ga. Ase vaa yo'o rcoo naan ndo'o 'yaj nana vaa so', rá soj na'. Guun vij nimán so' che'é tucuáán noco' so', rá soj na'. Taj ma'.

25 Maan se daj gaa so' rá soj, asij ca'anj soj quene'en soj man so' ga. Sij nuu yatzij laruu ndo'o me so', rá soj na'. Taj ma'. 'O se nij síi nuu yatzij sa' ndo'o do', nij síi utun' ndo'o sa'anj do', yanj rá ve' tucuá síi nicaj suun rey adonj.

26 Maan se daj gaa síi cu'naj Juan rá soj, asij ca'anj soj quene'en soj man so' ga. Sij nata' se-nana Diose me so', rá soj na'. Ya uxrá ei. Ne cataj xna'anj 'unj rihaan soj se vaa sa' doj vaa so' rihaan cunudanj nij síi nata' se-nana Diose adonj.

27 "'O se nana nihánj nana no rihaan danj Diose ro', taj xna'anj che'é síi cu'naj Juan a: “Vaa síi ca'anj suun che'é 'unj, ne ca'nej 'unj man so' quitaj yaan so' rihaan so', ne nuchran' nimán yuvii ve'é ca'mii nij yuvii ga so', qui'yaj so' a”. Danj taj danj Diose che'é síi cu'naj Juan se vaa nuchran' nimán yuvii ve'é ca'mii nij yuvii ga síi ca'na' tinanii man nij yuvii rihaan sayuun, qui'yaj so' a. Ne danj qui'yaj so' adonj.

28 "Cuanō nihánj me se cataj xna'anj 'un̄j rihaan soj se vaa s̄ij sa' doj rihaan cunudanj nij yuviī man̄ rihaan chumīj me síí cu'naj Juan a. A 'ó yuviī ne vaa sa' doj rihaan so' ma'. Tzaj nē cuanō ro', uun̄ chij Diosē nimán yuviī man̄ rihaan chumīj nihánj, nē naj guun̄ yuviī guun̄ chij Diosē nimán ro', me síí sa' doj rihaan síí cu'naj Juan a. —Dan̄j cataj Jesucristó rihaan nij yuviī yo' a.

29 Dan me se nu'̄ nij yuviī mán nē ndaā nij síí a'néj puextó ro', gaā cunō nij so' se-nanā Jesucristó, nē cataj nij so' se vaa sa' uxrá qui'yaj Diosē a. 'O se s̄ij cata' ne qui'yaj Juan me nij so' a.

30 Nē nij síí naqui'yaj̄ cuū se-tucuan̄j Moisés do', nij síí fariseo do', ne ca'vej rá nij so' cunō nij so' daj me rá Diosē qui'yaj Diosē che'é̄ nij so' ma'. 'O se nuveé s̄ij cata' ne qui'yaj Juan me nij síí na'vej rá ma'.

31 Gaā nē cataj uún̄ Jesucristó rihaan nij yuviī a: —Nē daj vaa nij soj s̄ij man̄ rihaan chumīj nihánj cuanō, rá soj gā. Dan me se cataj xna'anj 'un̄j rihaan soj ei.

32 Ase vaa xniī ca'an̄j rihaan yu'veē nē tico gā tuvi' ro', vaa soj s̄ij man̄ rihaan chumīj nihánj adon̄j. Dan me se yáán̄ nij xniī yo' rihaan yo'óó, nē aguáj̄ nij xniī rihaan tuvi' xniī, taj nij xniī: "Nicāj núj rihuū núj, go' núj chra' choco', tzaj nē me che'é̄ ne ra'an̄j soj gā. Nē go' núj chra' xngá, tzaj nē me che'é̄ ne ta'veē soj gā. Me che'é̄ ne tico soj gā núj gā", taj nij xniī rihaan tuvi' nij so' a.

33 'O se ca'na' Juan síí cuta' ne man̄ yuviī, gaā nē ne chā so' chraa do', ne co'ō so' na vinó gā tuvi' so' do', gaā nē che'é̄ dan̄ taj soj se vaa nuū nanā chreē nimán so', taj soj a.

³⁴ Ne ca'ná' 'un̄j sij ca'néé Diosē n̄icaj yu'un̄j man yuv̄ij, gaā nē niha' rá 'un̄j chá 'un̄j do', co'lo 'un̄j do', gaā nē che'é dan taj uún soj se vaa síí cachén chá do', síí cachén co'lo do', mé 'un̄j, taj uún soj a. Nē taj uún soj se vaa tuví' 'un̄j me síí tiha' yu'un̄j man yuv̄ij che'é puextó do', yo'ó nij síí tumé cacun' do', taj soj a. D̄anj tu'va soj, tzaj̄ nē ne ne'en uxrá soj ma'.

³⁵ Sese xcaj soj cuentá d̄aj vaa 'yaj rój, nē guun ya rá soj se vaa sij̄ cuu rāa me rój ḡa síí cu'naj Juan yo' adon̄j —taj Jesucristó rihaan nij yuv̄ij a.

Nanā nihánj taj xna'an̄j se vaa na'nu' 'ō chanā tacóó Jesucristó a

³⁶ Dan me se canacúún 'ō síí fariseo man Jesucristó chá Jesucristó chraa tucúa so', gaā nē ca'an̄j cayáán Jesucristó tucúa so' chá so' chraa a.

³⁷ Nē dan me se yáán 'ō chanā niha' rá ḡa chii chuman' yo', gaā nē cuno no' nanā se vaa cuchi' Jesucristó chá so' chraa tucúa síí fariseo yo', gaā nē che'é dan n̄icaj no' 'ō aga' catzii ve'é ndo'lo vaa nuu casté gun' d̄aj, ca'an̄j no' tucúa síí fariseo yo' a.

³⁸ Gaā nē ca'an̄j can̄e rūj no' nichrun' tacóó Jesucristó, nē ta'vee uxrá no', nē na'nu' no' na rihaan no' tacóó Jesucristó a. Gaā nē maan̄ yuvé rāa no' na've no' tacóó Jesucristó a. Cachrón tu'va no' tacóó Jesucristó, gaā nē caxr̄ij no' casté gun' d̄aj tacóó so' uún a.

³⁹ Dan me se gaā quene'en síí tucuā se vaa qui'yaj chanā man Jesucristó, gaā nē guun rá so' nanā nihánj ni'yaj so' man Jesucristó a: “Sese yā sij̄ nata' se-nanā Diosē me síí nihánj, nē aj ne'en so' d̄aj chanā me chanā nihánj, se vaa chanā atā

cacun' me no', ne ne ca'vej rá so' qui'yaj no' danj ga so' tzaj man adonj", guun rá sí tucua yo' a.

⁴⁰ Gaa ne cataj Jesucristó rihaan so' a:

—Vaa nana me raj cataj 'unj rihaan so', Simón —taj Jesucristó rihaan so' a.

—Ca'mij so', maestro —taj sí tucua yo' a.

⁴¹ Gaa ne nanó Jesucristó se-cuento vij sí 'yaj xcúun a:

—Vij sí 'yaj xcúun sa'anj rihaan 'o ru'vee me roj so' a. 'O so' ro', 'yaj xcúun 'un' cientó sa'anj denario, ne yo'ó so' ro', 'yaj xcúun vij chihaa chi' sa'anj denario a.

⁴² Tzaj ne taj sa'anj rihaan roj so' naruvee roj so' rihaan ru'vee, gaa ne che'é dan cunuu 'ee rá ru'vee man roj so', ne quinavij un xcúun xráa roj so', qui'yaj ru'vee a. Me tuvi' roj so' caran' doj rá ni'yaj man ru'vee, rá so' ga —taj Jesucristó, xná'anj so' man sí cu'naj Simón yo' a.

⁴³ —Caran' doj rá sí navij nocoo doj xcúun xráa ni'yaj so' man ru'vee, che'é rej nocoo doj se luj qui'yaj ru'vee che'é so', raj a —taj sí cu'naj Simón yo' a.

—Veé danj vaa ya —taj Jesucristó rihaan so' a.

⁴⁴ Gaa ne canicaj Jesucristó ni'yaj Jesucristó man chana, gaa ne cataj so' rihaan sí cu'naj Simón yo' a:

—Xcaj so' cuentá se vaa qui'yaj chana nihánj ei. Ca'ná' 'unj tucua so', tzaj ne taj na rqué so' na'nuj tacój ma'. Tzaj ne chana nihánj me ní na'nu' na rihaan no' tacój, ne maan yuvé raá no' na've no' tacój nanj á.

⁴⁵ Ca'naj tucua so', tzaj ne ne cachron tu'vá so' ra'aj ma'. Tzaj ne chana nihánj ro', nu' catúj 'unj rá

ve', ne nu' cachrón tu'va no' tacój, ne veé 'o achrón tu'va no' tacój nanj á.

⁴⁶ Taj vaj casté caxrój so' raj ma'. Tzaj ne chana nihánj me ní caxrój casté gun' daj tacój adonj.

⁴⁷ Cunó so' ca'mij á. Ase vaa síi navij uun xcúún 'un' cientó sa'anj denario xráá ro', danj vaa no' a. 'O se nda' se níi tumé uxrá cacun' me no', tzaj ne che'é se caráya'anj ndo'o no' ni'yaj no' manj ro', che'é dan ne'en ní se vaa x'néj nu' cacun' xráá no' nanj adonj. Ne xa' síi x'néj doj cacun' xráá, tzaj ne doj aráya'anj so' ni'yaj so' manj nanj adonj —taj Jesucristó rihaan síi cu'naj Simón yo' a.

⁴⁸ Gaa ne cataj Jesucristó rihaan chana yo' a:

—Navij cacun' tumé so' ei —taj Jesucristó rihaan no' a.

⁴⁹ Gaa ne guun che'e nij síi chá chraa tucúa Simón ca'mii nij so' ga tuvi' nij so', cataj nij so' a:

—Daj sij me síi nihánj, ne síj rá so' cataj so' se vaa navij cacun' xráá yuvi, rá soj ga —taj nij so', xná'anj nij so' man tuvi' nij so' a.

⁵⁰ Tzaj ne canicaj uún Jesucristó, cataj so' rihaan chana a:

—Quinanij so' rihaan sayuun, che'é se amán rá so' ni'yaj so' manj adonj. Ve'é ca'anj so', ne dínj gaa nimán so' á —taj Jesucristó rihaan chana yo' a.

8

Nana nihánj taj xna'anj che'é nij chana racuj man Jesucristó a

¹ Dan me se cachén doj güii, gaa ne ca'anj Jesucristó que'ee chuman', ca'mii natáj so' rihaan yuvi che'é güii guun chij Diosé rihaan chumii

nihánj, ne ca'anj chuvij nij sí tucu'yón se-nana so' ga so' a.

² Ne ca'anj chana nahuun sa' qui'yaj Jesucristó ga nij so' a. Dan me se ta'aj no' me ní nahuun qui'yaj Jesucristó, ne yo'ó ta'aj no' me ní curihanj nana chree nimán qui'yaj Jesucristó a. Chana cu'naj Mariá Magdalena me 'o no', ne no' me ní curihanj chij nana chree nimán qui'yaj Jesucristó a.

³ Ne yo'ó no' ro', me ní cu'naj Juana, ne nica no' ro', me sí cu'naj Chuza sí nicun' rihaan sí nica suun rey cu'naj Herodes a. Ne yo'ó chana ca'anj ga Jesucristó ro', me ní cu'naj Susana a. Ne vaa que'ee doj nij chana ca'anj ga nij so' a. Nu' nij chana nihánj ro', me ní racúj man nij tuvì' Jesucristó se vaa rqué nij no' si'yaj nij no' rasuun cachiin man nij tuvì' Jesucristó a.

Nihánj me cuentó nanó Jesucristó che'é 'núú trigó tix'nuu yo'ó so' a

⁴ Dan me se cavii que'ee ndo'o nij yuvii daj a chuman', ca'anj ni'yaj nij so' man Jesucristó, ne dan me se quisíj cunuu chre' nij yuvii, ga ne guun che'e Jesucristó nanó so' se-cuento 'núú trigó rihaan nij so' a.

⁵ Cataj Jesucristó nana nihánj a:

—Dan me se curihanj 'o sí me rá cuchruj naa 'núú trigó, ne tix'nuu so' 'núú trigó rihaan yo'ó, ne cayuu doj 'núú trigó yo' rá chrej chéé yuvii, ne curu'maan che'é yuvii man yo', ne ca'na' xtâj, chá xtâj man 'núú trigó naj rá chrej yo', ne dan me se navij nu' 'núú trigó yo', qui'yaj nij xtâj nanj adonj.

⁶ Ne yo'ó ta'aj 'núú trigó yo' ro', cayuu rihaan yuvej rej taj catun' yo'ó a. Xra' 'núú, tzaj ne cuchrii naa le'ej che'é se taj nocoo 'yoo táá xráá yuvej yo' nanj adonj.

⁷ Ne yo'ó ta'aj 'núú trigó yo' ro', cayuu sca'núj coj tanj, ne dan me se yoo doj cachij coj tanj yo' rihaan naa le'ej, ne quinavij nu' naa le'ej, qui'yaj coj tanj nanj adonj.

⁸ Ne yo'ó ta'aj 'núú trigó yo' ro', cayuu rihaan yo'óo sa', ne naa yo' ro', cachij sa', ne cientó ya 'núú cavii, qui'yaj 'o 'o 'núú le'ej nii quiniy rihaan yo'óo sa' yo' nanj adonj. —Danj cataj Jesucristó rihaan nij so' a.

Gaa ne guun che'e so' ca'mii nucuaj so', cataj so':

—Sese taj yu'uj xréé soj, ne cunoo soj nana nihánj ei —taj Jesucristó rihaan nij so' a.

Nana nihánj taj xna'anj me che'é nanó ndo'o Jesucristó cuentó che'é nij rasuun rihaan nij yuviij a

⁹ Gaa ne xná'anj nij síi tucu'yón se-nana Jesucristó man so' me che'é nanó so' cuentó che'é 'núú trigó yo' a.

¹⁰ Gaa ne cataj Jesucristó rihaan nij so' a:

—Xa' soj, tzaj ne tihaan Diose nana rihaan soj daj qui'yaj Diose gaa guun chij Diose rihaan chumii nihánj adonj. Tzaj ne rihaan yo'ó nij yuviij me se inanj cuentó che'é nij rasuun nanó 'unj rihaan nij so', gaa ne ni'yaj nij so' do', nano xrej nij so' do', tzaj ne se quene'en nij so' do', se xcaj nij so' cuentá do', a man adonj —taj Jesucristó rihaan nij síi tucu'yón se-nana so' a.

Nana nihánj taj xna'anj me taj se-cuento 'núú trigó yo' a

11 Canicaj Jesucristó, cataj so':

—Nihánj me cataj xna'anj 'un̄j che'é se-cuento 'núú trigó, ne ase vaa 'núú trigó yo' ro', danj vaa se-n̄an̄a Diose adonj.

12 Ne ase vaa 'núú cayuu rá chrej ro', danj vaa ta'aj nij síi uno se-n̄an̄a Diose, ne dan me se uno nij so' doj tzin', tzaj ne 'na' síi chree, ne a'néj síi chree se-n̄an̄a Diose nimán nij so' che'é se na'vej rá síi chree cuchuman rá nij so' ne quinaniij nij so' rihaan sayuun qui'yaj Diose adonj.

13 Ne ase vaa ta'aj 'núú trigó cayuu rihaan yuvej ro', danj vaa yo'ó ta'aj nij síi uno se-n̄an̄a Diose, ne uun niha' rá nij so', ne doj orá nii gaa chumán xa' rá nij so', tzaj ne nu' 'na' sayuun rihaan nij so', ne nu' tanáj nij so' se-n̄an̄a Diose, ne ne noco' raan nij so' se-n̄an̄a Diose ma'.

14 Ne ase vaa ta'aj 'núú cayuu sca'núj tanj ro', danj vaa yo'ó ta'aj nij síi uno se-n̄an̄a Diose uún, ne dan me se achén güii, gaa ne anicaj nij so' niganj nanó rá nij so' che'é rasuun achiin man nij so' do', che'é sa'anj do', che'é se niha' ndo'o vaa rasuun man rihaan chumij nihánj rá nij so' do', ne che'é dan me tanáj xco nij so' se-n̄an̄a Diose, ne ne 'yaj nij so' se sa' a ma'.

15 Ne yo'ó ta'aj nij síi uno se-n̄an̄a Diose me se ase vaa 'núú cayuu rihaan yo'óó sa' ne sa' uxrá cachij yo' ro', danj vaa síi sa' uno se-n̄an̄a Diose, ne sa' uxrá vaa nij so', ne ve'é nanó xrej nij so' se-n̄an̄a Diose, ne noco' raan nij so' se-n̄an̄a Diose, ne inan̄j se sa' 'yaj nij so', ne ne a'ne' rá nij so' ga se-n̄an̄a Diose ma' —taj Jesucristó rihaan nij síi tucu'yón se-n̄an̄a so' a.

Nihánj me cuentó nanó Jesucristó che'é aga' ya'an a

16 Dan me se guun che'e Jesucristó cataj so':

—Nuvi' a 'ó síí achrón ya'an raā aga' ya'an, ne axríj yuve so' aga' rque xruj do', rque yuvée do' ma'. Tananj toco' nūi aga' ya'an rej xta', gaa ne chuguun yo' rihaan cunudanj nij síí atúj rá ve' adonj.

17 Dan me se a 'ó rasuun caxríj yuve yuvij se qui'nij yuve ma'. Ya nurihanj yo', vaa güii, ne cunudanj yuvij quene'en, vaa güii adonj.

18 Che'é dan nuchruj raā soj nana ca'mij nihánj ei. 'Q se síí nari' nana ro', doj a nari' so', qui'yaj Diose, ne síí na'vej rá nari' sa' nana ro', tananj doj a ca'nee Diose nana nari' so' man so', ne quinaj uun so' nanj adonj —taj Jesucristó rihaan nij so' a.

Nana nihánj taj xna'anj se vaa ase vaa nii Jesucristó do', ase vaa tinúú Jesucristó do', vaa nij síí uno se-nana Diose a

19 Dan me se cuchi' nii Jesucristó cuchi' nij tinúú Jesucristó cuchi' ndaa rej vaj Jesucristó, tzaj ne ne ca'vee quinichrun' nij so' rihaan Jesucristó, che'é se man ndo'lo yuvij a.

20 Ne cataj 'o so' rihaan Jesucristó a:

—Nicun' níí so' nicun' tinúú so' nicun' xe', ne me rá nij so' quene'en nij so' man so', Jesús —taj so', cataj xna'anj so' rihaan Jesucristó a.

21 Tzaj ne cataj Jesucristó rihaan nij yuvij a:

—Ase vaa níí 'unj do', ase vaa tinúú 'unj do', vaa nij síí nihánj adonj. 'Q se nanó xrej nij so' se-nana Diose, ne 'yaj nij so' ndaa vaa taj nana yo' adonj —taj Jesucristó rihaan nij yuvij a.

Nana nihánj taj xna'anj se vaa ca'ne' Jesucristó suun rihaan na do', rihaan nana do', se vaa canicun' yo' a

²² Dan me se 'o güii catúj Jesucristó rque 'o rihoo ga cunudanj nij síi tucu'yón se-nana so', ne cataj Jesucristó rihaan nij so' se vaa ca'anj cunudanj nij so' ndaa yo'ó níchrej tu'va na lacuaná a. Gaa ne guun che'e rihoo chée rihoo rihaan na, qui'yaj nij so' a.

²³ Doj ca'anj rihoo, ne cotoj Jesucristó a. Cachén 'o orá nii, gaa ne guun che'e nana yuvaá cavii uxrá yo' go' ndo'o yo' rihaan na, ne dan me se catúj ndo'o na rque rihoo, ne daj doj ca'anj nij rihoo rque na a.

²⁴ Gaa ne guun che'e nij síi tucu'yón se-nana Jesucristó narii nij so' nej rihaan so', ne:

—Daj doj cavi' ní, nanj maestro —taj nij so' rihaan Jesucristó a.

Gaa ne canicun' caya so', ne caxrój yuvaá so' man nana do', man na do' a. Gaa ne canicun' nana canicun' na do', ne canicun' dínj rihaan na lacuaná yo', qui'yaj Jesucristó nanj adonj.

²⁵ Gaa ne xná'anj Jesucristó man nij síi tucu'yón se-nana so', cataj so':

—Me che'é ne amán rá soj ni'yaj soj man Dioso ga —taj so' rihaan nij so' a.

Tzaj ne ca'anj rá nij so', ne cuchu'vi' nij so', ne cataj nij so' rihaan tuvi' nij so':

—Daj sij me síi nihánj ga. Ndaa rihaan nana do', ndaa rihaan na do', a'ne' so' suun, ne uno roj yo' a'mii so' ason —taj nij so' rihaan tuvi' nij so' a.

Nana nihánj taj xna'anj se vaa quirii Jesucristó man nij nana chree nimán 'o snó'o a

26 Dan me se guun gan' rihoo nuu Jesucristó ga estadó Galilea, ne cachén yo' ca'anj yo' ndaa níchrej tu'va na lacuaná yo', ndaa rej ne nij síi man chuman' Gadara a.

27 Cuchi' nij so' yo'óo yo', ne nanij Jesucristó rihoo, gaa ne nari' tuvi' so' ga 'o síi chihanj chuman' yo', ne so' me síi nuu nana chree nimán, ne taj yatzij nuu so' do', na'vej rá so' cayáán so' ve' tucua' so' do', inanj rihaan santó ne so' do' a.

28-29 Dan me se ca'ne' Jesucristó suun rihaan nana chree se vaa curihanj nana chree nimán so' a. 'O se quisij que'ee canó nana chree man so' a. Dan me se ndaa aga' ne' numij nii ra'a so' do', tacóo so' do', tzaj ne xuun so', ne x'ne' yo', qui'yaj so', gaa ne nicaj nana chree man so' ca'anj nij so' quij nanj adonj. Dan me se gaa quene'en so' man Jesucristó, ne caguáj so', ne canicun' ruj so' rihaan Jesucristó, ne nucuaj ca'mii so', cataj so':

—Veé ne'én 'unj se vaa ta'nij Diosé síi sa' ndo'o mé so', Jesús. Me che'é 'ná' so' rej né 'unj ga. Cataj xna'anj sa' 'unj rihaan so' se vaa se qui'yáá so' sayuun manj ma' —taj so' rihaan Jesucristó a.

30 Gaa ne xná'anj Jesucristó man nana chree yo', cataj so':

—Daj cu'naj so' ga —taj Jesucristó, xná'anj so' man nana chree a.

Ne dan me se cataj nana chree yo':

—X'ne' nocoo me núj á —taj nij so' che'é rej aj catúj que'ee ndo'o nij so' nimán snó'o yo' a.

31 Gaa ne cachín ni'yaj nij nana chree rihaan Jesucristó se gaa nanj ca'nej so' man nij so' rej cunuuj rej nuu ya'an, ne:

—Achíín ni'yaj ndo'o núj rihaan so' se ca'née so' man núj rej nuu ya'an, man Jesús —taj nij so' rihaan Jesucristó a.

³² Ne dan me se chée 'o x'ne' nocoo xcáá rej tacaan rej yo', chá nij xo' coj, ne dan me se cachíín ni'yaj nij nana chree rihaan Jesucristó se vaa ca'vej rá Jesucristó catuu nij so' nimán xcáá, ne cayáán nij so' nimán xcáá a. Ne ca'vej rá Jesucristó catuu nij so' nimán xcáá a.

³³ Che'é dan me curihanj nij nana chree nimán snó'o, ne catúj nij so' nimán xcáá, ne dan me se ruvaá uxrá tacaan nicun' tu'va na lacuaná rej vaj nij xcáá yo', ne gaa catúj nij nana chree nimán xcáá yo', gaa ne cunánj ndo'o nij xo' ca'anj nij xo', ne veé danj vaj nij xo', ne quiniij nij xo' rque na, ne canó xráá nij xo' nanj adonj.

³⁴ Dan me se quene'en nij síí tumé xcáá se vaa guun, gaa ne cunánj nij so' ca'anj cataj xna'anj nij so' rihaan nij yuviij man chuman' do', rihaan nij yuviij man tacaan do' a.

³⁵ Gaa ne dan me se ca'na' ni'yaj nij yuviij se vaa guun, gaa ne ca'na' nij so' rej nicun' Jesucristó, gaa ne quene'en nij so' man síí curihanj nana chree nimán a. Aj nanuú so' sagan' so', ne dínj ne so' rihaan Jesucristó a. Ne aj ti'inj se snúú so', ne nuu sa' so' a. Gaa ne cuchu'vi' ndo'o nij yuviij se vaa qui'yaj Jesucristó a.

³⁶ Gaa ne cataj xna'anj nij síí quene'en rihaan nij yuviij daj qui'yaj Jesucristó ne nahuun sa' síí nuu nana chree nimán a.

³⁷ Che'é dan cuchu'vi' ndo'o nij síí man chuman' Gadara, ne che'é dan cachíín ni'yaj taran' nij so'

rihaan Jesucristó se vaa ca'anj yanj Jesucristó rihaan nij so' a. Gaa ne dan me se catúj Jesucristó rque rihoo, ne canicaj so' ca'anj so' a.

³⁸ Gaa ne dan me se cachín ni'yaj sí nahuun sa' rihaan Jesucristó se vaa ca'vej rá Jesucristó ca'anj so' ga Jesucristó, tzaj ne ne ca'vej rá Jesucristó ma'.

³⁹ —Canicaj so' nán' so' tucúa so', ne cataj xna'anj so' rihaan tuví' so' che'é se sa' ndo'o qui'yaj Diöse che'é so' á —taj Jesucristó rihaan so' a.

Gaa ne canicaj sí nahuun sa' yo' quinan' so', ne ca'mii natáj so' rihaan taran' nij yuvij yanj chuman' yo' che'é se sa' qui'yaj Jesucristó rihaan so' a.

Nana nihánj taj xna'anj che'é chala cunii do', che'é chana chij do', nahuun sa', qui'yaj Jesucristó a

⁴⁰ Nanicaj Jesucristó, namán uún so' tu'va na lacuaná a. Gaa ne man ndo'o yuvij na'vij man so', ne guun niha' rá nij yuvij se vaa namán uún so' a.

⁴¹ Gaa ne dan me se ca'na' 'o so' rihaan Jesucristó, ne Jairo cu'naj so', ne so' me sí 'nij ra'a 'o ve' tucu'yón nij yuvij israelitá se-tucuanj Moisés, ne dan me se canicun' ruj so' rihaan Jesucristó, ne cachín ni'yaj so' rihaan Jesucristó se vaa ca'anj Jesucristó tucúa so' a.

⁴² Ne orún' raá ta'nij chana so' chala cunii vaj chuvij yo', tzaj ne ran' ndo'o yo', ne daj doj caví' yo', ne che'é dan guun rá so' ca'anj Jesucristó tucúa so' a.

Veé dan me ca'anj Jesucristó ga so', ne ca'anj ndo'o yuvij ga so', ne ndaa raan ma'an chrej vaj yuvij ga so' a.

⁴³ Dan me se sca'núj nij so' vaj 'o chana ran' ndo'o, ne quisíj chuvij ya yo' xra' ton man no', ne cutun' no' cunudanj sa'anj vaa rihaan no', tzaj ne taj vaj a 'ó síi guun nucuaj qui'yaj nahuun sa' no' ma'.

⁴⁴ Dan me se quinichrun' no' rej xco Jesucristó, ne canó ra'a no' doj tu'va sagan' so' a. Dan me se nu' canó ra'a no' tu'va sagan' so', ne nu' canicun' se xra' ton man no' nanj adonj.

⁴⁵ Gaa ne xná'anj Jesucristó se vaa me síi canó ra'a sagan' so', tzaj ne a 'ó nij yuvij ne cano ra'a sagan' so' ma', taj nu' nij yuvij a. Gaa ne cataj Pedró rihaan Jesucristó:

—Maan che'é se raan vaj nij yuvij, ne canó rma'an ra'a 'o so' sagan' so', maestro —taj Pedró rihaan Jesucristó a.

⁴⁶ Tzaj ne cataj Jesucristó rihaan so' a:

—Vaa 'o yuvij canó ra'a sagan' unj adonj. Ne'enj se vaa nahuun yuvij qui'yáj adonj —taj Jesucristó rihaan so' a.

⁴⁷ Gaa ne xcaj chana cuentá se vaa quene'en Jesucristó se vaa qui'yaj no', gaa ne ril'j man no', ne ca'na' no', ne canicun' ruj no' rihaan so', gaa ne cataj xna'anj no' rihaan nu' nij yuvij se vaa maan se canó ra'a no' sagan' Jesucristó, ne nu' maan orá dan nahuun sa' no' ne canicun' se xra' ton man no', taj no' rihaan cunudanj nij yuvij a.

⁴⁸ Gaa ne cataj Jesucristó rihaan no', ne:

—Nahuún so' che'é se amán rá so' ni'yaj so' manj, nocoj. Ve'é ca'anj so', ne dínj gaa nimán so' ca'anj so' á —taj Jesucristó rihaan no' a.

⁴⁹ Ataa navij ca'mij Jesucristó, ne ca'na' 'o síi cavii tucúa Jairo, ne cataj so' rihaan Jairo a:

—Aj cavi' ta'níí so', ne taj che'é caraa chrúú so' rihaan maestró a ma' —taj síí 'na' cataj xna'anj rihaan Jairo a.

50 Dan me se cuno Jesucristó nana ca'mii síí ca'na', gaa ne cataj so' rihaan síí cu'naj Jairo a:

—Se cuchu'ví' so' ma'. Maan se cuchuman ya rá so' ni'yaj so' manj, ne quinahuun ta'níí so' nanj adonj —taj Jesucristó rihaan so' a.

51 Dan me se cuchi' Jesucristó tucúa Jairo, ne ne ca'vej Jesucristó catuu nij yuvii rá ve' ga so', ne maan Pedró do', Juan do', Jacobo do', roj nica Jairo do', ca'vej so' catuu rá ve' ga so' a.

52 Dan me se ta'vee ndo'o nij síí cunuu chre' rá ve' che'é chala cunii cavi', ne nanó uxrá rá nij so', ne go' nij so' cuxru' rucuaa nij so' a. Tzaj ne cataj Jesucristó rihaan nij so':

—Se ta'vee soj ma'. 'O se ne cavi' no' ma'. Maan se otoj uun no' nanj á —taj Jesucristó rihaan nij so' a.

53 Gaa ne ca'nga' nacoo nij so' ni'yaj nij so' man Jesucristó che'é se aj quene'en nij so' se vaa aj cavi' ya no' a.

54 Tzaj ne catúj Jesucristó rá quartó naj no', ne quita'aa so' ra'a no', ne nacúún so' man no', cataj so':

—Naxagaa so', chala cunii —taj so' rihaan no' a.

55 Ne cunuu i'na' uún no', gaa ne nu' naxagaa no', ne nu' ca'ne' Jesucristó suun rihaan roj nica Jairo se vaa go' roj so' doj se chá cha chala cunii, taj Jesucristó rihaan roj nica Jairo a.

56 Dan me se ca'anj rá roj so' se vaa qui'yaj Jesucristó, gaa ne cataj Jesucristó rihaan roj so' a:

—A 'ó yuvii se cataj xna'anj roj soj rihaan daj qui'yáj che'é chala cunii ma' —taj Jesucristó rihaan roj nica roj so' a.

9

Nana nihánj taj xna'anj se vaa ca'née Jesucristó man chuvij nij sí tucuyón se-nana so' ca'anj ca'mii natáj nij so' a

¹ Dan me se canacúun Jesucristó man chuvij nij sí tucuyón se-nana so', ne cunuu chre' nij so', ne go' so' se nucuaj man nij so', gaa ne ca'vee qui'yáj canaán nij so' rihaan me ma'an nana chree do', ca'vee ca'nee nij so' chi'ii xráá sí ran' do' a.

² Gaa ne ca'née so' man nij so' ca'anj ca'mii natáj nij so' che'é güii guun chij Diöse rihaan chumii nihánj, ne ca'nee nij so' chi'ii xráá nij sí ran' do' a.

³ Ne cataj so' rihaan nij so' a:

—A 'ó rasuun se nicaj soj ca'anj soj ma'. Chruun garroté do', nanj do', se chá do', sa'anj do', se nicaj soj ma'. Orún' niqee yatzíj nuu soj ca'anj ga soj á.

⁴ Ne me ma'an ve' cuchi' soj ne ca'vej 'o so' cane soj ro', ne veé ve' yo' yo'o cane soj ne veé ve' yo' cavii soj ca'anj soj ca'mii natáj soj se-nana Diöse á.

⁵ Ne me ma'an 'o chuman' se ca'vej rá nij sí chihanj cuno nij so' se-nana soj, tanáj soj chuman' yo', ne cavii soj tu'va chuman' yo', ne nacunan' soj tacóo soj cayuu yo'óo tachruu man chuman' yo' tacóo soj á. Ndaa dan, gaa ne xcaj nij sí chihanj yo' cuentá se vaa tumé nij so' cacun' se vaa ne ca'vej rá nij so' cuno nij so' se-nana soj man adonj —taj Jesucristó rihaan chuvij nij so' a.

⁶ Gaa ne dan me se ca'anj nij so' nij chuman', ne ca'mii natáj nij so' se-nana Diose nana sa', ne me rej ma'an vaj nij so' ca'néj nij so' chi'ii xraá nij síi ran' a.

Nana nihánj taj xna'anj se vaa xcaj síi nicaj suun cu'naj Herodes cuentá che'é Jesucristó a

⁷ Dan me se cuno síi nicaj suun cu'naj Herodes nu' se vaa qui'yaj Jesucristó, gaa ne guun rá Herodes quene'en so' me síi me Jesucristó a. 'O se ta'aj yuvii cataj se vaa cunuu i'na' uún Juan síi cuta' ne man yuvii,

⁸ ne yo'ó ta'aj yuvii cataj se vaa curuvi' uún síi cu'naj Elías síi cayáan gaa naá, ne yo'ó ta'aj uún yuvii cataj se vaa cunuu i'na' uún 'o síi nata' se-nana Diose gaa naá a.

⁹ Tzaj ne ma'an síi cu'naj Herodes cataj, ne:

—Aj cavi' Juan, ne x'ne' chihá Juan, qui'yáj a. Tzaj ne ne ne'enj me yuvii me síi nihánj, ne tu'va nii danj che'é so' rihanj ma' —taj Herodes a.

Gaa ne guun uxrá rá Herodes quene'en so' man Jesucristó a.

Nana nihánj taj xna'anj se vaa ca'vee quirii Jesucristó se chá 'un' mǐj snó'o a

¹⁰ Dan me se namán chuvij nij síi tucu'yón se-nana Jesucristó rihaan Jesucristó, ne nata' nij so' rihaan Jesucristó che'é nu' nij suun sa' nocoo qui'yaj suun nij so' rej ca'anj nij so' a. Gaa ne nicaj Jesucristó man taran' nij so', ca'anj nij so' ndaa tu'va chuman' cu'naj Betsaida rej yaníj a.

¹¹ Tzaj ne quene'en 'o x'ne' nocoo yuvii rej ca'anj Jesucristó, gaa ne canoco' nij so' man Jesucristó, ca'anj nij so' a. Gaa ne ve'é ca'mii Jesucristó ga

x'ne' noc̄o yuvīi canoco' man so', ne ca'mii natáj so' che'é güii gūun chij Diose rihaan chumīi nihánj, ne quinahuun nij síi ran', qui'yaj so' do' a.

¹² Dan me se nichrun' cata' güii, ne dan me se quinichrun' chuvij nij síi tucu'yón se-nana Jesucristó rihaan so', ne cataj nij so':

—Qui'yáá so' se ndo'o, ne na'nej so' chrej man nij yuvīi, ca'anj nij so' rej chuman' noc̄o chuman' ra'a do', gaa ne man ve' caran' nij so' do', man se chá quirí' nij so' chá nij so' do' a. Tzaj ne rej man ní' nihánj me se rco' quiij me nihánj, ne taj rej caran' nij so', taj se chá chá nij so' do', nihánj ma' —taj nij so' rihaan Jesucristó a.

¹³ Tzaj ne cataj Jesucristó rihaan nij so' a:

—Go' ma'an soj se chá chá nij yuvīi ei —taj Jesucristó rihaan nij so' a.

—Tzaj ne taj se chá rihaan núj ma'. Maan se orún' 'un' rachrúun ne vij guee xcuaj ne, vaa rihaan núj nanj á. Tzaj ne ca'vee ca'anj núj, ne quiraan núj se chá chá cunudanj nij yuvīi nihánj nanj á —taj nij so' rihaan Jesucristó a.

¹⁴ Dan me se 'un' mój snó'o mán rej yo' ta' asuun, ne ino me chana ga xnii adonj. Tzaj ne cataj Jesucristó rihaan nij síi tucu'yón se-nana so' a:

—Cayáán nij yuvīi rihaan yo'óo, qui'yaj soj, ne dan me se cunuu chre' 'o vij chihaa chí' vij chihaa chí' yuvīi cane 'o 'o rej, qui'yaj soj á —taj Jesucristó rihaan nij so' a.

¹⁵ Ne veé danj qui'yaj nij so', ne ca'anj cane cunudanj nij yuvīi a.

¹⁶ Gaa ne dan me se quita'aa Jesucristó 'un' nij rachrúun ga roj xcuaj yo', gaa ne ni'yaj so' rej xta',

ne nago' so' graciá rihaan Diose che'é se chá yo', gaa ne cuxra' ta'aj so' rachrúun do', nee xcuaj do', ne caxrij so' ston nij sí tucu'yón se-nana so', che'é rej caxrij nij so' ston nij yuvij a.

¹⁷ Gaa ne chá taran' nij yuvij, ne caraa rque nij so' ne ndaa quináj ndo'o se chá a. Gaa ne naqui'yaj chre' nij so' nu' se quináj tu'va yuvij, ne caraa nij so' yo'ó cunu' chuvij scaa a.

Nana nihánj taj xna'anj se vaa cataj xna'anj Pedró me sí me Jesucristó a

¹⁸ Dan me se 'o güii ca'anj Jesucristó 'o rej yanij cachín ni'yaj so' rihaan Diose, ne nij sí tucu'yón se-nana so' ro', mán rej yo' ga so', ne xná'anj so' man nij so', cataj so', ne:

—Me sij mé 'unj, taj nij yuvij ga —taj Jesucristó, xná'anj so' man nij so' a.

¹⁹ —Vaa sí taj se vaa sí cu'naj Juan sí cuta' ne man yuvij mé so' ei. Ne vaa sí taj uún se vaa sí cu'naj Elías sí nata' se-nana Diose gaa naá me uún so' chuguanj. Ne vaa sí taj uún se vaa yo'ó sí nata' se-nana Diose gaa naá me uún so' xa'. Danj taj 'o 'o ta'aj nij yuvij nanj á —taj nij so' a.

²⁰ Gaa ne cataj Jesucristó rihaan nij so':

—Ne ma'an soj, gaa ne me sij mé 'unj, rá soj uún ga —taj Jesucristó, xná'anj so' man nij sí tucu'yón se-nana so' a.

Gaa ne cataj Pedró:

—Sí ca'née Diose tinanii man yuvij rihaan sayuun mé so' ei —taj so' rihaan Jesucristó a.

²¹ Gaa ne cataj xna'anj Jesucristó rihaan nij so' a:

—Se cataj nij soj nana vaa danj rihaan a 'ó nij yuvij ma' —taj Jesucristó rihaan nij so' a.

Nana nihánj taj xna'anj se vaa cataj xna'anj Jesucristó se vaa cavi' so' ne cunu u'na' uún so' a

²² Gaa ne cataj uún Jesucristó rihaan nij sí tucu'yón se-nana so' a:

—Xa' 'unj sij ca'née Diose nıcaj yu'unj man yuvij, tzaj ne no xcuún 'unj quiran' ndo'o 'unj sayuun qui'yaj nij sí uun chij do', qui'yaj nij xrej ata suun nocoo doj do', qui'yaj nij sí naqui'yaj cuu se-tucañj Moisés rihaan yuvij do', ne nachri' ndo'o nij so' ni'yaj nij so' mán 'unj, ne ticavi' nii mán 'unj, ne cachén va'núj güii, gaa ne cunu u'na' uún 'unj adonj —taj Jesucristó rihaan nij so' a.

²³ Gaa ne dan me se cataj so' rihaan cunudanj nij yuvij a:

—Sese me rá yo'o so' canoco' so' manj, ne se guun rá so' qui'yaj so' se vaa me rá ma'an so' qui'yaj so' ma'. Ne ca'vee se quiran' uxrá so' sayuun do', ca'vee se ndaa cachron nii man so' rihaan rcutze do', tzaj ne daj a 'o 'o güii me se yo'o qui'yaj suun so' che'ej, ne yo'o canoco' raan so' manj adonj.

²⁴ Tzaj ne sese vaa 'o sí me rá tinanii man ma'an rihaan sayuun, ne vaa güii yo'o cavi' nimán so' adonj. Tzaj ne sese cavi' yo'o so' che'é se me so' sí nocoo' manj, ne vaa güii cunu u'na' uún so' adonj.

²⁵ Ne a me se quirı' 'o so' sese qui'yaj canaán so' nu' rasuun man rihaan chumij nihánj, ne ca'anj ni'ya nimán ma'an so', rá soj ga. Daj chihaa míj se ca'vee cavi' sa' so', qui'yaj rasuun man rihaan chumij nihánj a ma'.

26 Dan me se xa' sí uun na'aj ni'yaj manj ne uun na'aj ni'yaj se-nanaj, tzaj ne vaa güii guun na'aj 'unj sij ca'née Diose nıcaj yu'unj man yuvii ni'yaj 'unj man so' asa' ca'na' uún 'unj rihaan chumii nihánj adonj. Ne güii yo' me se ve'é ndo'o guun chij 'unj, qui'yaj Réj Diose, ne cavii sa' 'unj, qui'yaj se-mozó Diose nij síı guee adonj.

27 Nihánj me se cataj yá 'unj rihaan soj se vaa xa' ta'aj soj sij nicun' nihánj cuano me se gaa ataa a cavı' ta'aj soj, ne ya quene'en ta'aj soj asa' guun che'e Diose guun chij Diose rihaan chumii nihánj nanj adonj —taj Jesucristó rihaan cunudanj nij so' a.

Nana nihánj taj xna'anj se vaa chuguun ndo'o man Jesucristó ni'yaj nij síı tucu'yón se-nana so' a

28 Quisıj ca'mii Jesucristó nana vaa danj, gaa ne cachén 'o tunj güii ta' asuun, gaa ne nicaj Jesucristó man Pedró ga Juan ga Jacobo, ne cavii so' raa 'o quij xcaan, ca'anj cachınj ni'yaj so' rihaan Diose a.

29 Gaa cachıın ni'yaj so' rihaan Diose, ne yo'o cunuu ino rihaan so', ne yuun che'e cunuu catzii sagan' so', ne ndaa raan lá ma'an sagan' so' a.

30 Gaa ne dan me se naqui'yaa vij snó'o rihaan nij so', ne nanó roj so' cuentó ga Jesucristó, ne Moisés do', Elías síı nata' se-nana Diose gaa naá do', me roj so' a.

31 Dan me se ve'é ndo'o curuvi' roj so', ne ca'mii roj so' ga Jesucristó che'é se vaa quiran' Jesucristó chuman' Jerusalén, ne cavii so' chumii nihánj, ndaa vaa guun rá Diose qui'yaj so' a.

32 Dan me se ca'na' ndo'o nej rihaan nij tuvi' Pedró, tzaj ne ne cotoj nij so' ma'. Quene'en nij so'

ndāa vaa chuguun sagan' Jesucristó do', ndaa vaa chuguun sagan' roj síi nicun' ga so' do' a.

³³ Gaa ne dan me se guun che'e roj síi nicun' ga Jesucristó ca'anj yaníj roj so' ga Jesucristó, gaa ne cataj Pedró rihaan Jesucristó:

—Cunaj uxrá vaa mán núj nihánj ga so', maestro. Ne qui'yaj núj va'núj ve' yacataj canē soj nanj á. 'O ve' canē so', ne yo'ó ve' canē síi cu'naj Moisés, ne yo'ó ve' canē síi cu'naj Elías ei —taj Pedró rihaan Jesucristó, tzaj ne ne quene'en uxrá so' daj me che'é ca'mii so' rihaan Jesucristó danj a ma'.

³⁴ Quisíj ca'mii so' nana vaa danj, gaa ne ca'na' 'o ngaa rej xta', ne caráán ngaa xráá nij so' ne naxíj nij so' rque ngaa, ne cuchu'vi' va'núj nij síi tucu'yón se-nana Jesucristó yo' a.

³⁵ Gaa ne Diose ro', ca'mii nana cuno nij so' rque ngaa yo' a. Ne cataj Diose:

—Síi nihánj me ta'níj síi 'ee raj adonj. Cuno soj rihaan so' ei —taj Diose cuno nij so' a.

³⁶ Quisíj ca'mii Diose, gaa ne taj orún' Jesucristó nicun', quene'en nij so' a. Tzaj ne yo'ó caráán tu'va nij so' se vaa quene'en nij so', ne güii guun danj me se a 'ó yuvií ne cataj xna'anj nij so' rihaan a.

Nana nihánj taj xna'anj se vaa nahuun sa' 'o xnií nuu nana chree nimán, qui'yaj Jesucristó a

³⁷ Dan me se cachén 'o yan', ne quisíj güii, gaa ne ca'anj Jesucristó ga nij síi tucu'yón se-nana so' rej rque a. Gaa ne nari' tuvi' nij so' ga 'o x'ne' nocoo yuvií a.

³⁸ Gaa ne dan me se nucuaj ndo'o ca'mii yo'ó síi 'na' sca'núj nij yuvií rihaan Jesucristó, ne cataj so':

—Achíín nì'yáj rihaan so' se vaa cunu 'ee rá so' nì'yaj so' ta'níj che'é se orún' raa so' me ta'níj, maestro —taj so' rihaan Jesucristó, ne—

³⁹ Dan me se naruvi' nana chree nimán ta'níj, ne taj ni'yón snúú so', ne aguáj so', ne avii yatan' tu'va so', 'yaj nana chree yo', ne 'yaj chi'ii ndo'o nana chree yo' man ta'níj, ne sayuun uxrá curihanj nana chree yo' nimán ta'níj adonj.

⁴⁰ Ne dan me se cachíín nì'yáj rihaan nij síi tucu'yón se-nana so' se vaa quirii nij so' nana chree nimán ta'níj, tzaj ne ne ca'vee quirii nij so' nana chree nimán ta'níj ma'. —Danj cataj snó'o yo' rihaan Jesucristó a.

⁴¹ Gaa ne cataj Jesucristó a:

—Dan me se síi ne amán rá me soj sij man rihaan chumii nihánj cuano, ne chi'ii vaa nimán soj, ne a me daj cachej ga soj, ne a me daj gaa naj nimanj nì'yaj 'unj man soj, gaa ne ca'vee qui'yaj canaán soj ga. Nìcaj so' man xnii ca'na' so' rihanj cuaj á —taj Jesucristó a.

⁴² Dan me se gaa 'na' xnii, ne nu' snúú xnii, ne naxru' xnii, qui'yaj nana chree yo', tzaj ne ca'ne' Jesucristó suun rihaan nana chree se vaa curihanj so' nimán xnii, ne dan me se curihanj nana chree yo' nimán xnii, ne nahuun sa' xnii, qui'yaj Jesucristó, ne nago' Jesucristó man xnii rihaan rej xnii a.

⁴³ Gaa ne quene'en nij yuvij se vaa nucuaj ndo'o Diose síi qui'yaj suun sa' nocoo yo', ne caráya'anj nu' nij so' a.

Nana nihánj taj xna'anj se vaa cataj xna'anj uún Jesucristó se vaa vaa güii cavi' so' a

Dan me se caráya'anj cunudanj yuvij se vaa qui'yaj Jesucristó a. Gaa ne cataj Jesucristó rihaan nij sí tucu'yón se-nana so' a:

⁴⁴ —A 'ó xco' se quini'yón soj nana nihánj nana cataj xna'anj 'unj rihaan soj cuano ma'. Dan me se 'unj sij ca'née Diose nicaj yu'unj man yuvij me se vaa güii nago' nii mán 'unj rihaan yuvij adonj —taj Jesucristó rihaan nij sí tucu'yón se-nana so' a.

⁴⁵ Tzaj ne ne cunō nij so' nana ca'mii Jesucristó, ne ne ca'vej rá Diose xcaj nij so' cuentá ma'. Ne cuchu'vi' nij so' xna'anj nij so' man Jesucristó che'é nana yo' a.

Nana nihánj taj xna'anj me sí me sí guun chij doj a

⁴⁶ Dan me se guun che'e nij sí tucu'yón se-nana Jesucristó ca'mii cunu' nij so' me nij so' guun chij doj a.

⁴⁷ Tzaj ne xcaj Jesucristó cuentá daj vaa nimán nij so', ne che'é dan quita'aa so' ra'a 'o ne'ej, ne nicaj so' cachrón so' x'núú so',

⁴⁸ gaa ne cataj Jesucristó rihaan nij so' a:

—Me ma'an 'o sí aráj cochroj ne a'mii sa' so' ga 'o ne'ej nihánj che'ej, ne adi' ma'anj me aráj cochroj ne a'mii sa' so' ga vaa nanj adonj. Dan me se sí a'mii sa' ga 'unj me se nuveé orún' 'unj me a'mii sa' so' ga ma'. Maan Diose ya sí ca'née mán 'unj me aráj cochroj ya so' ne a'mii sa' ya so' ga vaa nanj adonj. 'O se sí nica' doj rihaan taran' soj ro', me sí sa' doj rihaan taran' soj a —taj Jesucristó rihaan nij sí tucu'yón se-nana so' a.

Nana nihánj taj xna'anj se vaa cataj xna'anj Jesucristó se vaa me ma'an sí ne unu' ga so' me tuvi' so' a

⁴⁹ Gaa ne cataj sí cu'naj Juan rihaan Jesucristó a:

—Quene'en núj man 'o sí ata' tu'va se-chuvií so', ne urihanj nana chree nimán yuvií, 'yaj so', nanj maestro. Tzaj ne caráán núj chrej ca'mii so' ne se qui'yaj so' danj, che'é se nuveé sij chéé ga ní' me so', taj núj, nanj maestro —taj Juan rihaan Jesucristó a.

⁵⁰ Tzaj ne cataj Jesucristó rihaan so' a:

—Ca'ne' sa' guee rá soj qui'yaj ma'an so' danj ei. 'O se xa' sí ne unu' ga soj, tzaj ne tuvi' soj me so' adonj —taj Jesucristó rihaan Juan do', rihaan yo'ó nij sí tucu'yón se-nana so' do' a.

Nana nihánj taj xna'anj se vaa cataj xna'anj Jesucristó rihaan sí cu'naj Jacobo do', rihaan sí cu'naj Juan do', se vaa nij ca'mii roj so' a

⁵¹ Dan me se gaa nichrun' güii quinan' Jesucristó xta', gaa ne yo'ó ca'neé nucuaj nimán so' ca'anj so' chuman' Jerusalén a.

⁵² Dan me se ca'ne' so' suun rihaan doj sí chéé ga so' quitaj yaan nij so' nano' nij so' ve' caran' nij tuvi' nij so', gaa ne ca'anj nij sí ca'anj suun, ne cuchi' nij so' 'o chuman' yanj nij sí samaritano a.

⁵³ Tzaj ne quira'aan nij sí samaritano ve' tucua' nij so' rihaan Jesucristó, che'é se guun rá so' ca'anj so' chuman' Jerusalén a.

⁵⁴ Dan me se gaa quene'en roj sí tucu'yón se-nana Jesucristó roj sí cu'naj Jacobo ga Juan, se vaa quira'aan nij sí samaritano ve', gaa ne xná'anj roj so' man Jesucristó, cataj roj so':

—Me rá so' cachin̄j ni'yaj núj rihaan Diose, ne ca'nej Diose ya'an, ne cacaā nij sí samaritano na' —taj roj so', xná'anj roj so' man Jesucristó a.

⁵⁵ Tzaj ne ni'yaj Jesucristó man roj so', ne caxríj yuvāa Jesucristó man roj so', ne cataj Jesucristó a:

—Ne ne'en soj daj sij me soj ne guun danj rá soj a. Xa' 'un̄j, tzaj ne ne ca'na' 'un̄j ticaví' 'un̄j man yuvī ma'. Che'é yan tinanii 'un̄j man yuvī rihaan sayuun ca'ná' 'un̄j adonj —taj Jesucristó rihaan roj so' a.

⁵⁶ Gaa ne ca'an̄j nij tuví' Jesucristó yo'ó chuman' caran' nij so' a.

Nanā nihánj taj xna'an̄j daj ca'mii Jesucristó rihaan va'n̄uj sí tihaj guun rá canoco' man so' a

⁵⁷ Gaa vaj nij so' chrej, gaa ne ca'na' 'o so', ca'mii so' ga Jesucristó a:

—Canocó' 'un̄j mán so' daj rej ma'an̄ vaj so' ei —taj so' rihaan Jesucristó a.

⁵⁸ Gaa ne cataj yā Jesucristó se vaa ran' so' chéé so' a:

—'O se nij chunee ro', otoj sa' nij xo' rá yu'uj taj rque yo'óó, ne nij xtâj chéé xtâ' ro', vaa saca' nij xo' a. Ne xa' 'un̄j sij ca'néé Diose n̄icaj yu'un̄j man yuvī, tzaj ne taj a doj rej quináá 'un̄j cotoj 'un̄j a ma' —taj Jesucristó rihaan so' a.

⁵⁹ Ne dan me se cataj Jesucristó rihaan yo'ó so' a:

—Canocó' so' manj ca'an̄j ní' á —taj Jesucristó rihaan so' a.

—Ca'vej so' nanj tucuāj, ne ndaa cavi' réj, gaa ne cachin' 'un̄j man réj, gaa ne canocó' 'un̄j mán so' ei —taj so' rihaan Jesucristó a.

⁶⁰ Tzaj ne cataj Jesucristó rihaan so' a:

—Ca'ne' rá so' cachin' ma'an nij sí cavi' nimán man tuvi' so' xngá á. Ne ca'anj so', ca'mii natáj so' che'é güii guun chij Diose rihaan chumii nihánj ei —taj Jesucristó rihaan so' a.

⁶¹ Ne dan me se cataj yo'ó so' uún rihaan Jesucristó a:

—Me raj canocoj mán so', Señor. Tzaj ne asino ca'vej so' ca'anj cataj xna'anj 'unj rihaan nij tuvij, gaa ne ca'naj, ne ca'anj ní' ei —taj so' rihaan Jesucristó a.

⁶² Tzaj ne cataj Jesucristó rihaan so' a:

—Sí oró' nee ni'yaj rej xco ro', daj chihaa mǐj se cavii nica tucuáán qui'yaj so' ma'. Ne sí me rá canoco' manj me se se guun canicaj uún so' rej xco so' ma'. Ne sese danj qui'yaj so', ne daj chihaa mǐj se ca'vee guun chij Diose nimán so' ma'. Ne ase vaa sí oró' nee rii tucuáán ro', vaa sí me rá canoco' manj adonj —taj Jesucristó rihaan so' a.

10

Nana nihánj taj xna'anj se vaa ca'née Jesucristó man va'nuj chihaa chi' sí tucu'yón se-nana so' ca'anj ca'mii natáj nij so' a

¹ Cachén doj, gaa ne narii Jesucristó man ya'núj chihaa chi' snó'o, ne ca'née so' man vij vij nij so' quitaj yaan nij so' rihaan Jesucristó ca'anj nij so' daj a chuman' cachén Jesucristó,

² ne cataj Jesucristó rihaan nij so' a:

—Ya uxrá, ne vaa ndo'o suun rihaan ní', ne nij sí 'yaj suun me se doj nij so' nanj adonj. Ne cachinj ni'yaj ní' doj nij sí qui'yaj suun rihaan Diose sí uun chij 'nij ra'a suun, gaa ne ca'nej so' doj yuvii qui'yaj suun se-suun so' adonj.

3 Dan me se ca'anj ca'mii natáj soj rihaan nij yuvi, tzaj ne xcaj soj cuentá se vaa ca'na' sayuun rihaan soj ei. 'O se ase vaa matzinj vaj rej man xca'yanj ca'nu' ro', danj gaa soj chuguanj.

4 Se nicaj soj vitó nuu sa'anj se nicaj soj nanj se nicaj soj yo'ó tacoj canj se nicaj soj ca'anj soj ma'. 'O rej ca'anj soj, ne 'o rej canicaj soj, ne se canicun' soj nano soj cuentó ga yuvi ma'.

5 "Asa' catúj soj rá 'o ve', ne asino cataj soj rihaan nij sí yanj rá ve' yo' se vaa dínj gaa cumán nij so', qui'yaj Diose a.

6 Ne sese yanj 'o sí cayáán sa' ga Diose rá ve' yo', gaa ne ya ve'é cayáán so', qui'yaj Diose a. Tzaj ne sese nuvi' sí cayáán sa' ga Diose yáán rá ve' yo', ne canicaj uún nana sa' ca'mii soj rihaan ma'an soj, qui'yaj Diose, tzaj ne se cavii sa' nij sí tucua yo' a ma'.

7 Caran' soj ve' yanj sí sa' yo', ne me ma'an se rque sí yanj yo', ne cha soj co'o soj do', ne no xcúun yuvi rque yuvi chraa cha soj che'é suun sa' 'yaj suun soj a. Se ca'anj soj caran' soj yo'ó yo'ó ve' ma'.

8 Asa' cuchi' soj 'o chuman', ne sese ve'é ca'mii nij sí man chuman' yo' ga soj, gaa ne cha soj me ma'an se chá rque nij so' man nij soj a.

9 Ca'nee soj chi'ij xráá nij sí ran' man chuman' yo', ne ca'mii natáj soj rihaan yuvi se vaa nichrun' guun chij Diose chiháán nij so' a.

10 "Tzaj ne asa' cuchi' soj 'o chuman', ne sese ne ca'vej rá nij yuvi cunō nij yuvi se-nana soj, gaa ne canicun' soj tanuu rá callé chuman', gaa ne cataj soj rihaan nij yuvi man chuman' yo' a:

11 “Asa' curihañj núj chuman' nihánj, ne nancuñan' núj tacóo núj, ne tucuayuu núj yo'óo tachruu avii chiháán soj tacóo núj cayuu yo' rihaan ma'an soj a. Gaa ne xcaj soj cuentá se vaa guun rá Diose guun chij Diose chiháán soj, tzaj ne ne ca'vej rá soj a”. Danj cataj soj rihaan nij síi na'vej rá cuno nana ca'mii soj a.

12 Ne cataj xna'anj 'unj rihaan soj cuano se vaa vaa güii ca'ne' 'unj cacun' che'é nij yuvi, gaa ne quiran' nij yuvi man chuman' yo' doj sayuun rihaan nij síi chi'ii man chuman' Sodoma adonj —taj Jesucristó rihaan nij síi ca'née so' a.

Nana nihánj taj xna'anj se vaa cataj xna'anj Jesucristó che'é sayuun quiran' yuvi man va'nuj chuman' yuvi ne ca'vej rá cuno se-nana so' a

13 Gaa ne dan me se cataj uún Jesucristó a:

—Nique soj sij man chuman' Corazín a. Nique soj sij man chuman' Betsaida a. 'O se quiran' uxrá soj sayuun nanj á. Dan me se nij síi man chuman' Tiro do', nij síi man chuman' Sidón do', me síi chi'ii nimán nanj á. Tzaj ne sese ca'anj 'unj chiháán nij so', ne sese qui'yáj suun sa' nocoo ni'yaj nij so', ne cuno nij so' se-nanaj ne guun ya rá nij so' se vaa tumé nij so' cacun', ne canicaj nimán nij so', ne quinano ndo'o rá nij so' che'é cacun' tumé nij so', ne ndaa yatzíj ya' cunuú nij so', ne ndaa yaj chruun acaa ruvaj caraa nij so' raaj nij so', che'é yan quinano rá nij so' che'é cacun' tumé nij so' asuun saj adonj. Nihánj, ne ne ca'anj 'unj ma'. Maan se inanj chiháán soj 'naj, ne qui'yáj suun sa' nocoo quene'en ma'an soj, tzaj ne ne canicaj nimán nij soj a ma'.

14 Dan me se güii ca'ne' 'ujj cacun' che'é nij yuvij ro', doj a gaa sayuun quirañ' soj rihaan sayuun quirañ' nij síi chi'ii man chuman' Tiro do', man chuman' Sidón do' adonj.

15 Ne vaa soj sij man chuman' Capernaum uún a. Ne síi sa' inanj me ma'an soj, rá soj na'. Nuveé sij sa' me soj ma'. Síi ca'anj rihaan ya'an guun soj adonj —taj Jesucristó a.

16 Ne cataj uún Jesucristó rihaan nij síi tucu'yón se-nana so' a:

—Síi nanó xrej se-nana soj ro', so' me síi nanó xrej se-nana ma'anj a. Tzaj ne síi uun nacoó rá ni'yaj man soj ro', so' me síi uun nacoó rá ni'yaj man ndaa ma'anj a. Ne síi uun nacoó rá ni'yaj man ma'anj ro', so' me síi uun nacoó rá ni'yaj man Diose síi ca'née manj adonj —taj Jesucristó rihaan nij síi tucu'yón se-nana so' a.

*Nana nihánj taj xna'anj se vaa namán va'núj
chihaa chi' nij síi ca'née Jesucristó a*

17 Quisíj qui'yaj va'núj chihaa chi' nij so' ndaa vaa cataj Jesucristó, gaa ne namán uún nij so' a. Niha' rá nij so', ne cataj nij so' rihaan Jesucristó a:

—Ndaa nij nana chree uno rihaan núj, Señor. Che'é se se-chuvií so' táa tu'va núj, ne urihanj nij so' nimán yuvij nanj á —taj nij so' rihaan Jesucristó a.

18 Ne cataj Jesucristó rihaan nij so' a:

—Ne'en yaj cayuu se nucuaj nicaj Satanás, ne ase uun raan ro', me cayuu se nucuaj nicaj Satanás adonj.

19 Cuno soj ca'mij á. 'Uñj ro', me síi qui'yaj guun nucuaj soj qui'yaj canaán soj rihaan daj a

se chi'ii a. Ca'vee se ru'maan che'é soj 'o xcuáa do', 'o xcuun do', tzaj ne taj se qui'yaj xo' man soj ma'. Qui'yaj canaán soj rihaan nu' se nucuaj nicaj Satanás síi taj ri'yunj ni'yaj man ní', ne a 'ó xco' se qui'yaj chi'ii a 'ó rasuun man soj ma'.

²⁰ Tzaj ne taj che'é guun niha' rá soj che'é se uno nij nana chree rihaan soj ma'. Guun niha' rá soj, tzaj ne che'é se aj cachrón Diose se-chuvii soj rej xta' ro', che'é dan guun niha' rá soj á —taj Jesucristó rihaan va'núj chihaa chi' nij so' a.

Nana niha'nj taj xna'anj se vaa guun niha' rá Jesucristó, qui'yaj Nimán Diose a

²¹ Maan güii yo' ro', guun niha' rá Jesucristó, qui'yaj Nimán Diose, ne cataj Jesucristó rihaan Diose a:

—Síi 'nij ra'a chumii do', síi 'nij ra'a xta' do', mé so', Ataj Chij. Ne sa' uxrá qui'yáa so' caráán so' rihaan nij síi avii raá do', rihaan nij síi acaj cuentá do', se vaa se cuno nij so' se-nanaj ma'. Maan nij síi vaa nica' nimán ro', ve'é cuno nij so', qui'yáa so' a. Danj inanj qui'yáa so', che'é yan danj me rá so' qui'yáa so', Ataj —taj Jesucristó rihaan Rej so' Diose a.

²² Canicaj Jesucristó, ca'mii so' rihaan nij yuvii, cataj so' a:

—Aj rqué Réé 'unj Diose cunudanj rasuun rihanj á. Ne a 'ó síi ne ne'en daj vaa 'unj, maan se orún' Réj ne'en a. 'O se ta'níi so' mej adonj. Ne a 'ó síi ne ne'en daj vaa Réj ma'. Maan se orún' 'unj ne'en daj vaa so' adonj. Ne sese me rá 'unj cataj xna'anj 'unj rihaan yo'ó nij yuvii daj vaa Réj,

ne quene'en yo'ó nij so' uún adonj —taj Jesucristó rihaan nij yuvii a.

²³ Gaa ne ni'yaj Jesucristó man nij síi tucu'yón se-nana so', ne cataj so' rihaan inanjan ma'an nij so' a:

—Vaa che'é gaa niha' rá soj che'é rihaan soj á. 'O se aj quene'en soj se vaa qui'yáj nanj á.

²⁴ 'O se cataj xna'anj 'unjan rihaan soj cuano se vaa man ndo'o síi man gaa naá síi nata' se-nana Diose do', síi nicaj suun rey do', guun rá quene'en se vaa quene'en nij soj, tzaj ne ne quene'en nij so' ma'. Ne guun rá nij so' cunonij so' se vaa cuno nij soj, tzaj ne ne cunonij so' a man adonj —taj Jesucristó rihaan nij síi tucu'yón se-nana so' a.

Nana nihanj me cuentó nanó Jesucristó che'é síi samaritano racuj man síi ran' chi'ii a

²⁵ Gaa ne dan me se canicun' caya 'o síi naqui'yaj cuu se-tucuanjan Moisés rihaan yuvii, ne xna'anj so' 'o nana man Jesucristó, che'é rej guun rá so' quiri' so' rej caraa so' cacun' xraá Jesucristó a.

—Daj qui'yáj, gaa ne ca'vee cayánjan ga Diose nu' cavii nu' ca'anjan, ga maestro' —taj so' rihaan Jesucristó a.

²⁶ Gaa ne cataj Jesucristó rihaan so' a:

—Ne'én so' me nana no rihaan yanjan no se-tucuanjan Moisés na'. Daj taj yanjan yo' nayaa so' ga —taj Jesucristó, xna'anjan Jesucristó man so' a.

²⁷ Gaa ne cataj so' rihaan Jesucristó a:

—“Ndaa nimán yá so' guun rá so' ni'yaj so' man Diose síi 'nij ra'a man ní', ne ndaa nu' se nucuaj yá so' caraa cochroj rihaan Diose, ne yo'o ndaa cúu yave mán so' cuchuman rá ni'yaj man Diose nanjan

adonj.” Ne, “Adi' se 'ee rá so' man ma'an so' ro', danj gaa 'ee rá so' man tuví' so' á”, taj se-tucuanj Moisés adonj —taj sí naqui'yaj cuu se-tucuanj Moisés yo' a.

²⁸ Gaa ne cataj Jesucristó rihaan so' a:

—Ya uxrá a'mii so' á. Danj quí'yáá so', gaa ne cayáán so' ga Diose nu' cavii nu' ca'anj nanj á —taj Jesucristó rihaan so' a.

²⁹ Tzaj ne sí sa' inanj me sí tucu'yón se-tucuanj Moisés, rá ma'an so' a. Che'é dan xná'anj so' nana nihánj man Jesucristó a:

—Me sí me tuví' 'unj ga —taj so' a.

³⁰ Gaa ne canicaj Jesucristó, nanó so' se-cuento sí samaritano a:

—Dan me se cavii 'o sí israelitá chuman' Jerusalén, ca'anj so' chuman' Jericó a. Vaj so' chrej, gaa ne caráán sí ituu man so' chrej, ne go' uxrá nij sí ituu man so', ne quirii nij sí ituu sagan' so', ne daj doj se cavi' so', gaa ne tanáj nij sí ituu man so' a.

³¹ Gaa ne dan me se vaj 'o xrej nicun' rihaan ní' sij israelitá chrej yo' a. Quene'en so' man sí quiran' chi'ij naj tu'va chrej, tzaj ne cachén yaníj so' ca'anj so' a.

³² Gaa ne dan me se vaj 'o ta'níi ta'nij si'no Leví sí racuíj man xrej uún a. Quene'en so' man sí quiran' chi'ij yo', tzaj ne cachén yaníj so' ca'anj so' uún a.

³³ Gaa ne dan me se ca'na' 'o sí samaritano uún a. Nuveé sij israelitá me so' ma'. Sij yaníj avii rej Samaria me so' a. Quene'en so' man sí quiran' chi'ij yo', gaa ne cunuu 'ee rá so' man sí quiran' chi'ij yo' a.

34 Ca'anj so' qui'yaj cono'ó so' man síi quiran' chi'ii yo', ne cuta' so' rmedió rej quiran' chi'ii, ne nacutáj so' mantá rej quiran' chi'ii yo' a. Gaa ne cuta' síi samaritano yo' man síi quiran' chi'ii yo' xráá daán so' xcuu vaj gá so', ne ca'anj roj so' ve' aran' yuvii chée chrej, ne taj ya'anj síi samaritano yo' man síi quiran' chi'ii yo' a.

35 Cachén 'o yan', ne yo'ó güii me se guun rá síi samaritano ca'anj so', ne quirii so' vj sa'anj denario, ne caxrij so' ston síi tucua ve' se vaa taj ya'anj so' man síi ran', gaa ne cataj so' rihaan síi tucua: “Asa' ca'na' uún 'unj, ne naru'vee 'unj me daj ma'an sa'anj me gaa tu'vee so', rá so'”, taj síi samaritano rihaan síi tucua a. —Veé danj síj cuentó nanó Jesucristó rihaan síi naqui'yaj cuu se-tucuanj Moisés yo' a.

36 Gaa ne xná'anj Jesucristó nana nihánj man síi naqui'yaj cuu se-tucuanj Moisés yo' a:

—Va'nuj nij síi vaj rá chrej yo', gaa ne me so' me tuvi' síi quiran' chi'ii yo', rá so' gá —taj Jesucristó, xná'anj Jesucristó man so' a.

37 —Síi cunuu 'ee rá man so' ro', me tuvi' so', raj a —taj síi naqui'yaj cuu se-tucuanj Moisés rihaan Jesucristó a.

Ne cataj uún Jesucristó rihaan so' a:

—Ase vaa qui'yaj síi cunuu 'ee rá man síi quiran' chi'ii yo' ro', veé danj qui'yaj guee so', ca'anj so' ei —taj Jesucristó rihaan síi naqui'yaj cuu se-tucuanj Moisés yo' a.

Nana nihánj taj xna'anj se vaa ca'anj Jesucristó tucua roj chu'vij Marta a

³⁸ Dan me se vaj Jesucristó chrej g̃a nij síi tucu'yón se-n̄aṇa so', ne cuchi' so' 'o chuman', ne dan me se ca'vej rá 'o chana cu'naj Marta yanj chuman' yo' caran' Jesucristó tucúa no',

³⁹ ne yáan chu'vij no' chana cu'naj Mariá g̃a no', ne dan me se ca'anj cayáan chu'vij no' Mariá tacóo Jesucristó, ne nanó xrej no' se-n̄aṇa so' a.

⁴⁰ Tzaj ne Marta ro', daj a suun caraya'anj no' a. Dan me se quinichrun' Marta rihaan Jesucristó, ne cataj no' rihaan so' a:

—Me che'é ne rihuun rá so' se vaa dínj ne chu'vij 'unj, ne orún' ma'anj 'yaj chuvii, g̃a Señor'. Cataj so' rihaan no' se vaa racuj no' manj á —taj Marta rihaan Jesucristó a.

⁴¹ Tzaj ne cataj Jesucristó rihaan no' a:

—Xa' che'é suun man rihaan chumii nihánj, tzaj ne taj che'é caraya'áan so' ndaa vaa 'yáa so', man Marta. Snúú rá so', 'yaj suun vaa rihaan so' á. 'O se taj che'é caraya'anj ní' rasuun man rihaan chumii nihánj ma'.

⁴² 'O se doj a vaa suun achiin qui'yaj ní', ne vaa orún' suun sa' ya ya achiin rihaan ní' nanj á. Ne Mariá nihánj, tzaj ne cunaj 'yaj no' se vaa me rá no' cunō no' se-n̄aṇaj, ne taj che'é cataj ní' se vaa nij 'yaj no' uno no' se-n̄aṇaj ma' —taj Jesucristó rihaan Marta a.

11

Nana nihánj taj xna'anj daj ca'mii ní' gaa achíin ni'yaj ní' rihaan Diose a

¹ Gaa ne dan me se cachíin ni'yaj Jesucristó rihaan Diose 'o güii, ne gaa quisíj cachíin ni'yaj so'

rihaan Diose, gaa ne cataj 'o sí tucu'yón se-nana so' rihaan so' a:

—Tucu'yón so' man núj daj ca'mii núj gaa cachinj ni'yaj núj rihaan Diose, Señor. 'O se xa' sí cu'naj Juan sí cuta' ne man yuvi, tzaj ne tucu'yón so' rihaan nij sí tucu'yón se-nana so' daj ca'mii nij so' gaa cachinj ni'yaj nij so' rihaan Diose, ne danj inanj qui'yáa so' che'é núj, rá núj a —taj so' rihaan Jesucristó a.

² Gaa ne dan me se ca'mii Jesucristó nana nihánj rihaan nij so' a:

—Nanj cataj soj gaa cachinj ni'yaj soj rihaan Diose á: “Ataj Chij, me rá núj xcaj yuvi cuentá se vaa inanj sa' 'yáa so' a. Ne me rá núj quisj güi guun chij so' rihaan chumii nihánj a.

³ Ne 'o 'o güi me se rque so' nu' rasuun achiin man núj cha núj á.

⁴ Ne caraá x'naa so' che'é cacun' taj xráa núj á. 'O se ma'an núj me sí aráj x'naa che'é cacun' 'yaj tuvi' núj rihaan núj nanj adonj. Dan me se caráan ra'á so' xráa núj rihaan chrej chi'ii á”. Danj cataj soj gaa cachinj ni'yaj soj rihaan Diose ei —taj Jesucristó rihaan nij sí tucu'yón se-nana so' a.

Nana nihánj taj xna'anj se vaa no xcúun ní cachinj ni'yaj ní rihaan Diose che'é rasuun achiin man ní a

⁵ Gaa ne canicaj Jesucristó, nanó so' 'o se-cuento sí cachín rasuun rihaan tuvi' rej nij a:

—Dan me se cataj ní, ne cuchí' 'o so' tucua' tuvi' so' yan', ne cataj so' rihaan tuvi' so': “Qui'yáa so' se ndo'o, ne racuíj so' va'núj chraa manj, tinuj.

6 Ca'na' 'o tuvij sí achén chrej, ne caran' so' tucuj, tzaj ne taj vaj chraa rihanj goj chá so' ma'", cataj so' rihaan tuvi' so' a.

7 Ne daj cataj tuvi' so' rihaan so', rá soj ga. Cataj tuvi' so': "Se narii so' nej rihanj, man tinuj. Aj naqui'yaj raan 'unj ta'yaa, ne aj otoj nij ta'nij núj, ne rmij naxagaj rquej chraa mán so' ei", cataj tuvi' so' rihaan so', rá soj na'. Daj chihaa míj se ca'mii so' danj ma'.

8 Dan me se cataj xna'anj 'unj rihaan soj cuano se vaa sí otoj yo' ro', nda' se na'vej rá so' naxagaa so' go' so' chraa man tuvi' so', tzaj ne che'é se ne uun na'aj tuvi' so' achín achín so' chraa, ne che'é dan guun rmii xréé sí naj otoj, gaa ne naxagaa so', ne go' so' me ma'an rasuun achiin man sí nicun' ta'yaa yo' adonj.

9 "Ne 'unj nihánj me sí cataj xna'anj rihaan soj se vaa cachinj soj se vaa achiin man soj rihaan Diose, ne so' me sí rque man soj, ne nano' soj rasuun achiin man soj, ne nari' soj rasuun yo', ne ase vaa 'yaj sí tica'mii ta'yaa tucua' tuvi' ro', danj qui'yaj soj ga Diose, ne ca'nuu Diose ta'yaa yo', ne rque Diose rasuun achiin man soj adonj.

10 'O se sí achín rasuun rihaan Diose ro', quiri' so' rasuun achiin man so', ne sí nano' rasuun achiin man ro', quiri' so' rasuun yo', ne sí tica'mii ta'yaa rej yanj Diose ro', ca'nuu Diose ta'yaa, ne quiri' sí tica'mii ta'yaa rasuun achiin man so' adonj.

11 Xcaj soj cuentá se vaa ma'an soj, nanj yuvii me soj, tzaj ne sese achín ta'nii yo' o' tuvi' soj chraa chá yo' man soj, ne se ca'vee nano' soj yahij ne caxrii soj ston yo' ma'. Ne sese achín ta'nii soj nee xcuaaj

ch̄a yo' man soj, ne se ca'vee nano' soj xcuáá ne caxrii soj ston yo' ma'.

12 Ne sese achíín ta'níi soj xrúú chuchee ch̄a yo' man soj, ne se ca'vee nano' soj xcuun ne caxrii soj ston yo' ma'.

13 Dan me se danj nanj soj, ne síi chi'ii nimán me soj, tzaj ne ne'en soj rque soj se sa' ch̄a ta'níi soj ei. Che'é dan táá a Rej soj síi nicun' xta', ne sij sa' inanj me so', ne so' me síi rque ya Nimán man nij síi achíín Nimán Diöse rihaan so' nanj adonj. —Danj cataj Jesucristó rihaan nij síi tucu'yón se-nana so' a.

Nana nihánj taj xna'anj se vaa cuta' nij síi fariseo cacun' rmi' xráá Jesucristó se vaa ca'mii Jesucristó ga síi chree a

14 Dan me se 'o güii quirii Jesucristó yo'o nana chree nimán 'o síi ya'mii, ne dan me se ya'mii so', qui'yaj nana chree yo', tzaj ne curihanj nana chree nimán so', ne guun che'e so' ca'mii so' adonj. Ne caráya'anj uxrá nij yuvii quene'en nij so' se vaa qui'yaj Jesucristó,

15 ne ta'aj nij yuvii cataj se vaa a'mii Jesucristó ga síi chree cu'naj Beelzebú síi uun chij rihaan nij nana chree, ne che'é dan rii so' man nij nana chree nimán yuvii, taj ta'aj nij yuvii, ni'yaj nij yuvii man Jesucristó a.

16 Ne yo'ó ta'aj nij yuvii guun rá cuta' cacun' xráá Jesucristó, ne che'é dan cachíín ni'yaj nij so' rihaan Jesucristó se vaa qui'yaj so' 'o suun sa' nocoo 'na' rej xta' ni'yaj nij so', taj nij so' a.

17 Dan me se quene'en ma'an Jesucristó daj vaa nimán nij yuvii, ne che'é dan cataj so':

—Ne'en soj se vaa sese vaa 'o nación, ne sese xra' ta'aj nij sí uun chij rihaan nación yo' ne cunu' ma'an nij so' ga tuvi' nij so', ne vaa güii, ne nu' nación yo' quirí' nu' nanj adonj. Ne sese cunu' ta'aj nij yuvií man 'o barrió ga tuvi' yuvií sí man ma'an barrió yo' ro', ne vaa güii, ne quirí' nu' barrió yo', qui'yaj nij so' nanj adonj.

18 Che'é dan me sese racuj sí chree sí cu'naj Satanás manj rii 'unj man tuvi' so' nana chree nimán nij yuvií, ga ne asa' ca'vee guun chij ndo'o so' rihaan nij yuvií man rihaan chumií nihánj, rá soj ga. Nana nihánj xná'anj 'unj man soj che'é se me rá soj cataj soj se vaa sí chree cu'naj Beelzebú ro', me sí racuj manj rij man nana chree nimán nij yuvií, rá soj vaa nanj á.

19 Dan me se rii 'unj man nij nana chree nimán nij yuvií, 'yaj sí chree cu'naj Beelzebú, che'é se a'mii 'unj ga so', rá soj a. Tzaj ne nij sí tucu'yón se-nana soj me se veé danj rii uún nij so' man nij nana chree nimán nij yuvií uún ei. Ne asa' a'vee 'yaj nij so' danj, rá soj ga. Ne vaa nij so' vaa, veé danj a'mii nij so' ga sí chree, rá soj ga na'. Che'é nana ca'mii soj me se ma'an nij sí tucu'yón se-nana soj cuta' cacun' xraá soj se vaa ca'mii ne soj adonj.

20 Tzaj ne 'unj me se ya ma'an ra'a Diose racuj manj rii 'unj man nij nana chree nimán nij yuvií adonj. Che'é dan xcaj soj cuentá se vaa aj guun che'e Diose guun chij Diose rihaan chumií nihánj adonj.

21 "Dan me se sese 'o sí ru'vee yanj rá ve' me se vaa aga' sihaa do', vaa mixté do', rihaan so', ne

tumé so' si'yaj so' yáán so', ne taj sí ca'nee si'yaj so' ma'.

²² Tzaj ne sese ca'na' yo'ó sí vaa doj fuerzá rihaan, gaa ne qui'yaj canaán so' rihaan sí yanj raan, gaa ne ca'nee so' nu' saga' so' do', nu' si'yaj so' do', ne cuxra' ta'aj so' ga tuvi' so' nanj adonj. Ta'nga' danj 'yáá 'unj ga sí chree, ne 'yaj canaán 'unj man so' adonj.

²³ "Naj guun sí na'vej rá qui'yaj suun ga 'unj ro', sí taj ri'yunj manj me so' a. Ne naj guun sí ne racuuj manj naqui'yaj chre' 'unj man yuvii canoco' man Diose ro', so' me sí ticha'nuu man nij yuvii, ne aráán so' rihaan nij yuvii se canoco' nij yuvii man Diose ei —taj Jesucristó rihaan nij yuvii a.

Nana nihánj taj xna'anj daj 'yaj nana chree gaa anicaj uún nana chree nimán yuvii a

²⁴⁻²⁵ Gaa ne cataj uún Jesucristó rihaan nij yuvii a:

—Ne gaa tihaj avii yuun yo'ó nana chree nimán snó'o, ne chée rma'an nana chree yo' nano' so' rej cayáán so', tzaj ne taj se qui'yá' quirj' nana chree yo' rej cayáán so', gaa ne me rá uún nana chree yo' canicaj so' rej cavii so' gaa naá a. Dan me se taj nana chree yo': "Canicaj uún 'unj nán' 'unj rej cavii 'unj a. Ve'é nanj vaa tucuj, ne naruvii rá ve' tucuj cuano, ne uun yâj yanj rá ve' tucuj cuano adonj", taj nana chree yo' a.

²⁶ Gaa ne dan me se anicaj uún nana chree yo' nimán snó'o yo', ne nano' nana chree yo' yo'ó chij tuvi' nana chree yo' sí chi'ii doj, ne 'na' nique uún so' nimán snó'o yo', gaa ne cayáán taran' nij nana chree yo' a. Dan me se gaa naá gaa cayáán orún' nana chree yo', gaa ne maan ta'nga' quij vaa

nimán snó'o yo', tzaj gaa namán yo'ó chij nana chree yo', gaa ne doj a tico nana chree man so', ne doj a quij vaa nimán snó'o yo', 'yaj nana chree yo' a adonj —taj Jesucristó rihaan nij yuvij a.

Nana nihánj taj xna'anj me síi me nij síi cavii sa' ga Diose a

²⁷ Dan me se gaa ca'mii Jesucristó nana vaa danj, gaa ne nucuaj ca'mii 'o chana nicun' sca'núj nij yuvij, cataj no':

—Cavii sa' níi so', che'é se cuchruj no' mán so', ne tucutzii no' mán so' á —taj chana yo', caguáj no' rihaan Jesucristó a.

²⁸ Tzaj ne cataj Jesucristó a:

—Síi cavii sa' ya ro', me síi uno se-nana Diose ne 'yaj ndaa vaa taj nu' nana yo' adonj —taj Jesucristó rihaan nij yuvij yo' a.

Nana nihánj taj xna'anj me suun sa' nocoo me qui'yaj Jesucristó, yan guun ya rá nij yuvij se vaa ya vaa nana ca'mii so' a

²⁹ Dan me se cunuu chre' doj yuvij rihaan Jesucristó, ne che'é dan guun che'e so' ca'mii so' nana nihánj a:

—Inanj che'é se yuvij vaa chi'ii nimán me soj ro', che'é dan me rá soj qui'yáj suun sa' nocoo á. Tzaj ne se qui'yáj suun sa' nocoo che'é soj ma'. Maan se quene'en soj se vaa ase vaa quiran' síi cu'naj Jonás gaa naá ro', danj quiran' 'unj, vaa güii nanj á.

³⁰ Dan me se qui'yaj Diose suun sa' nocoo ga síi cu'naj Jonás quene'en nij síi man chuman' Nínive gaa naá, ne danj inanj qui'yaj uún Diose ga 'unj sij ca'née so' nıcaj yu'unj man yuvij, quene'en soj adonj.

31 "Ne güii ca'ne' Diose cacun' che'é yuvii ro', cuchí' chana nicaj suun reiná guun chij rihaan chuman' naj gan' ndo'o rej sur, ne canicun' no' rihaan soj, qui'yaj Diose, ne cuta' no' cacun' xráá soj adonj. 'O se gan' ndo'o cachéé no' cuchí' no' rihaan síí cu'naj Salomón, ne cuno no' nana cuu tucu'yón Salomón man no' adonj. Ne xa' 'unj sij nicun' rihaan soj cuano, tzaj ne sa' doj vaa 'unj rihaan síí cu'naj Salomón yo' adonj. Tzaj ne na'vej rá soj cuno soj nana a'mii 'unj rihaan soj a man adonj.

32 Ne nij síí man chuman' Nínive ro', canicun' nij so' ga ma'an soj sij vaa i'na' rihaan chumii nihánj cuano asa' quisíj güii ca'ne' Diose cacun' che'é yuvii, ne cuta' nij síí man chuman' Nínive yo' cacun' xráá soj adonj. Cuno nij so' nana ca'mii natáj síí cu'naj Jonás, ne nuchran' nimán nij so', ne canoco' nij so' man Diose adonj. Ne xa' 'unj sij nicun' rihaan soj cuano, tzaj ne sa' doj vaa 'unj rihaan síí cu'naj Jonás yo', tzaj ne taj se qui'yá' naqui'yaj sa' soj nimán soj ma' —taj Jesucristó rihaan nij yuvii yo' a.

Nana nihánj taj xna'anj se vaa no xcúún ní' xcqj ní' cuentá daj qui'yaj ní' a

33 Ne cataj uún Jesucristó rihaan nij so' a:

—Gaa rmi', ne a 'ó yuvii ne uta' ya'an raá aga' ya'an ne axríj yuve nij so' rque 'o chrúún ma'. Sese rmi', ne achrón nii ya'an raá aga' ya'an ne uta' nii aga' yo' rej xta', ne daj a nij yuvii atúj rá ve' ro', chuguun ni'yaj nij so' adonj.

34 "Rlij rihaan ní' me ya'an nicaj yu'unj man ní' ei. Dan me se sese rlij rihaan ní' ro', ni'yaj yo' ne

uun sa' rá yo', gaa ne nu' nee man ní' ro', sa' vaa, ne adi' se chuguun aga' ya'an ro', danj chuguun man ní' gaa sa' rihaan ní' adonj. Tzaj ne sese rlij rihaan ní' ro', ni'yaj yo' ne inanj uun chi'ii rá yo', gaa ne nu' nee man ní' ro', uun chi'ii rá, gaa ne adi' síí nicun' yan rmi' ne cunudanj man so' ro', rmi', ne danj vaa síí uun chi'ii rá adonj.

³⁵ Xcaj ndo'o soj cuentá se gaa nanj quina'aj ya'an nicaj yu'unj man soj ne guun soj 'o se rmi' a.

³⁶ Dan me se sese cunudanj man ní' nuû ya'an, gaa ne taj a doj se rmi' nuu man ní', gaa ne cunudanj man ní' ro', chuguun, ne adi' gaa o' cachun' ya'an xráá nii ne chuguun nu' man nii ro', danj vaa ní' adonj —taj Jesucristó rihaan nij yuvii yo' a.

Nana nihánj taj xna'anj che'é cacun' tumé nij síí fariseo a

³⁷ Dan me se gaa ca'mii Jesucristó rihaan nij yuvii, ne canacúun 'o síí fariseo man so' cha so' chraa tucúa síí fariseo yo', gaa ne dan me se ca'anj cayáán roj so' rihaan mesá a.

³⁸ Dan me se xcaj síí fariseo yo' cuentá se vaa ne noco' Jesucristó se-tucuanj nij síí fariseo se vaa ne na'ya' so' gaa cha so' chraa, gaa ne caráya'anj ndo'o síí fariseo yo' a.

³⁹ Che'é dan cataj síí 'nij ra'a man ní' rihaan so':

—Xa' soj sij fariseo, tzaj ne ase vaa rasuun, ne sa' uxrá na'nu' nii xráá yo', tzaj ne rque yo' ro', me se vaa nacaj guee yo', ta'nga' danj vaa guee soj, ne xráá soj me se ve'é naruvii, tzaj ne nimán soj me

quij vaa, ne niha' uxrá rá soj ca'nee soj si'yaj tuvi' soj, ne noco' ndo'o soj chrej chi'ii adonj.

40 Nuveé sij acaj cuentá me soj a ma'. Ne'en soj se vaa Diose ro', me síi qui'yaj ra'a soj, ne na'ya' ndo'o soj, ne veé so' me síi qui'yaj nimán soj uún a.

41 Dan me se go' soj ta'aj se chá do', ta'aj sa'anj do', man nij síi nique, gaa ne xcaj soj cuentá se vaa síi sa' nimán me soj adonj.

42 "Tzaj ne nique soj sij fariseo nanj á. 'O se quiran' uxrá soj sayuun nanj adonj. 'O se sese vaa nuu xlá do', coj ruda do', me ma'an cuêj do', rihaan soj, ne rque soj 'o nánj rasuun yo' rihaan Diose che'é 'o 'o chi' nánj rasuun vaa rihaan soj nanj á. Tzaj ne ne a'ne' nica soj cacun' che'é tuvi' soj ma'. Ne aráj cochroj soj rihaan Diose ma'. Tzaj ne me rá Diose qui'yaj soj nu' nana nocoo nihánj, ne na'vej rá Diose tanáj xco soj yo'ó nana le'ej doj yo' a ma'.

43 "Nique soj sij fariseo nanj á. Quiran' uxrá nij soj sayuun adonj. 'O se niha' rá soj quitaj soj chruun xlá sa' doj nicun' rá ve' tucu'yón ní' se-tucañj Moisés, ne niha' rá soj caraya'anj yuvii man soj gaa chéé soj yu'vee a.

44 "Nique soj che'é sayuun quiran' soj á. Ne ase vaa chraan naj xngá rihaan santó ro', vaa soj, ne xráá soj ro', vaa catzii, tzaj ne nimán soj me se adi' se vaa cúu ri'yuj ro', vaa nimán soj adonj. Ne vaa chraan naj xngá rihaan santó, ne xráá yo' me se sa' uxrá vaa yo', ne rque yo' me se cúu ri'yuj inanj man rque yo', ne nij yuvii me se chéé nij yuvii yo' xráá chraan, ne taj nij so' se vaa sa' ndo'o vaa chraan yo', taj nij so', tzaj ne ne ne'en nij so' se vaa inanj cúu ri'yuj man rque yo' a man adonj. Ta'nga'

danj vaa guee soj adonj —taj Jesucristó rihaan nij síí fariseo yo' a.

Nana nihánj taj xna'anj che'é cacun' tumé nij síí naqui'yaj cūu se-tucuanj Moisés rihaan yuvii a

⁴⁵ Gaa ne ca'mii 'o síí naqui'yaj cūu se-tucuanj Moisés rihaan yuvii, ne cataj so' rihaan Jesucristó a:

—Tzaj ne nachrí' so' ni'yaj so' man ma'an núj gaa a'mii so' nana vaa danj á —taj so' rihaan Jesucristó a.

⁴⁶ Gaa ne cataj Jesucristó rihaan so' a:

—Ne nique ma'an soj sij naqui'yaj cūu se-tucuanj Moisés rihaan yuvii a. Ma'an soj uún quiran' uxrá sayuun nanj adonj. 'O se a'ne' uxrá soj suun rihaan yuvii daj qui'yaj nij yuvii canoco' nij yuvii man Diose, tzaj ne dan me se ase vaa yuvii araa ndo'o rasuun 'ee xráa tuvi' vaa nij soj, ne a doj ne racuj soj man yuvii cata yuvii rasuun 'ee yo' a ma'. A 'ó raá ra'a nij soj ne racuj soj man yuvii a man adonj.

⁴⁷ "Nique soj che'é sayuun quiran' soj a. Ve'é une' soj chraan yan naj cúu man nij síí nata' se-nana Diose gaa naá, tzaj ne ma'an xii soj ro', me síí ticavi' man nij so' adonj.

⁴⁸ Dan me se che'é se ne'en ní' se vaa 'yaj ma'an soj, ne che'é dan xcaj ní' cuenta se vaa 'o vaa rá soj ga xii soj síí man gaa naá, ne cyaan 'yaj soj ga xii soj adonj. Dan me se nij so' ro', ticavi' man nij síí nata' se-nana Diose, ne soj ro', une' chraan yan naj cúu man nij so' adonj.

⁴⁹ "Che'é dan cavii 'o nana cūu raá Diose, cataj Diose: "Xa' yuvii nihánj, tzaj ne ca'nej 'unj síí nata'

se-nanaj rihaan nij so' a. Dan me se ticavi' nij so' man ta'aj nij sí ca'nej 'unj, ne yo'ó ta'aj nij so' me se me rej ma'an vaj nij so', ne quitaj ri'yunj uxrá nij so' man nij sí ca'nej a.

⁵⁰ Ndaa síj, gaa ne nu' ton cayanj man nij sí nata' se-nana Diose asij gaa guun che'e chumi ro', nu' cacun' yo' ro', nata' xráá nij so' a.

⁵¹ Dan me se asij ton cayanj man sí cu'naj Abel ne ndaa ton cayanj man sí cu'naj Zacarías gaa cavi' so' rihaan nuví yan nicun' mesá altar xij ro', nu' cacun' yo' ro', nata' xráá nij so' a", taj Diose a. Dan me se cataj xna'anj 'unj rihaan soj cuano se vaa quiran' ma'an nij tuvi' nij soj sayuun che'é nu' cacun' yo' adonj.

⁵² "Nique soj sij naqui'yaj cuu se-tucuanj Moisés rihaan yuvi a. Quiran' uxrá soj sayuun adonj. Taj se qui'yá' xcaj yuvi cuentá, 'yaj soj ma'. Dan me se ma'an soj ro', na'vej rá catuu se-tucuanj Diose, ne nij sí me rá catuu me se aráán soj chrej rihaan nij so', ne na'vej rá soj catuu nij so' a man adonj —taj Jesucristó rihaan nij sí naqui'yaj cuu se-tucuanj Moisés rihaan yuvi a.

⁵³ Dan me se curihanj Jesucristó ve' yo', ne guun che'e nij sí naqui'yaj cuu se-tucuanj Moisés do', nij sí fariseo do', táá ri'yunj uxrá nij so' man Jesucristó, ne guun che'e nij so' xná'anj nij so' man so' che'é que'ee rasuun a.

⁵⁴ Dan me se nanó xrej uxrá nij so' nana ca'mii Jesucristó che'é rej guun ndo'o rá nij so' cuta' nij so' cacun' xráá Jesucristó che'é nana tu'va so' a.

Nana nihánj taj xna'anj se vaa ne ca'vej rá Jesucristó qui'yaj nij síi tucu'yón se-nana so' ndaa vaa qui'yaj nij síi fariseo a

¹ Dan me se cunuu chre' uxrá yuvii rej vaj Jesucristó, ne uxrá chruj nij so', ne ndaa tiguíj tuvi' ma'an nij so' a.

Gaa ne guun che'e Jesucristó ca'mii so' asino yaan ga nij síi tucu'yón se-nana so', cataj so':

—Cutumé soj man soj se gaa nanj quiran' soj sayuun, qui'yaj se-levadura nij síi fariseo á. Dan me se taj nij so', ne inanj nana sa' a'mii nij so', taj nij so', tzaj ne taj ma'. Tu'va rma'an nij so' nanj adonj. Nuveé nana sa' a'mii nij so' ma'. Inanj nana nucu'í rá a'mii nij so' nanj adonj.

² Tzaj ne dan me se nu' nana ca'mii yuve nij so' do', nu' rasuun 'yaj yuve nij so' do', nu' yo' ro', nurihanj quene'en cunudanj yuvii vaa güii adonj.

³ Che'é dan nu' nana ca'mii soj rej rmi' ro', vaa güii nurihanj yo' rej chuguun, ne nu' nana ca'mii soj xréé tuvi' soj rej rá ve', ne nurihanj yo' vaa güii ndaa patio rihaan ve' adonj —taj Jesucristó rihaan nij so' a.

Nana nihánj taj xna'anj se vaa se cuchu'vi' ní quene'en ní'yuvii ma'

⁴ Gaa ne cataj uún Jesucristó a:

—Dan me se tuvi' 'unj me soj, ne che'é dan cataj xna'anj 'unj rihaan soj se vaa se cuchu'vi' soj quene'en soj nij síi ticavi' man nee man soj ma'. 'O se asa' qui'yaj nij so' danj, gaa ne taj vaj doj se chi'ii qui'yaj nij so' man soj a ma'.

⁵ Tzaj ne nihánj me se cataj xna'anj 'unj rihaan soj me síi cuchu'vi' soj ni'yaj soj man a. Dan me

se vaa che'é cuchu'vi' soj ni'yaj soj Diose adonj. Asa' quisij ticavi' nii man soj, gaa ne so' me sí ca'nej man soj rihaan ya'an cacaa soj sese tumé soj cacun' adonj. Che'é dan taj 'unj rihaan soj se vaa vaa che'é cuchu'vi' soj ni'yaj soj man so' adonj.

⁶ "Ne'en soj daj vaa nij xtâj chrin' se vaa 'un' ya xo' nó chi' guee cha'aa a. Tzaj ne taj ya'anj uxrá Diose man 'o 'o nij xo' a.

⁷ Ne Diose me se vaa cuentá yuvé raá soj 'yaj so', ne ne'en so' me daj yuvé raá soj, ne che'é dan se cuchu'vi' soj che'é sayuun qui'yaj yuvi man soj ma'. 'O se uxrá vaa yu'vee doj nó soj rihaan xtâj chrin' yo', 'yaj Diose adonj.

⁸ Ne cataj xna'anj 'unj rihaan soj cuano se vaa no xcúun soj nata' ya soj rihaan yuvi se vaa me soj sí noco' manj, ne nu' sí 'yaj danj ro', vaa güii, ne 'unj sij ca'née Diose nicaj yu'unj man yuvi ro', nataj rihaan nij se-mozó Diose se vaa sij noco' manj me so' a.

⁹ Ne sí taj xna'anj rihaan yuvi se vaa nuveé sij noco' manj me so' ro', vaa güii, ne cataj xna'anj yá 'unj rihaan nij se-mozó Réé 'unj se vaa nuveé sij noco' manj me so' a ma'.

¹⁰ "Dan me se 'unj sij ca'née Diose nicaj yu'unj man yuvi ro', ca'vee se ca'mii yo'o so' nana chi'ii che'ej, ne ca'vee navij cacun' xráá so' qui'yaj Diose, tzaj ne sese ca'mii chi'ii yo'o so' che'é Nimán Diose, ne daj chihaa mij se tinavij Diose cacun' yo' xráá so' a ma'.

¹¹ "Dan me se asa' tucuatúj nii man soj rá ve' tucu'yón ní' sij israelitá se-tucuanj Moisés ne canicun' soj rihaan nij sí uun chij, ne se nanó rá soj daj ca'mii soj che'é soj rihaan nij so' ma'.

12 'O se orá yo' ro', ma'an Nimán Diose ro', tucu'yón man soj daj ca'mii soj rihaan nij so' adonj —taj Jesucristó rihaan nij sí tucu'yón se-nana so' a.

Nihánj me cuentó nanó Jesucristó che'é 'o sí ru'vee caraa sa' que'ee rasuun rihaan chumii nihánj a

13 Dan me se cataj yo'o tuvi' nij yuvii yo' rihaan Jesucristó a:

—Cataj so' rihaan tinúú 'unj, ne cuxra' ta'aj so' yo'oo do', rasuun do', gaj, maestro —taj so' rihaan Jesucristó a.

14 Gaa ne:

—Me che'é guun rá so' se vaa guún 'unj sí a'ne' cacun' che'é soj ga. Me che'é ca'mii 'unj che'é rasuun vaa rihaan roj tinuj soj, rá so', ga tinu' —taj Jesucristó rihaan so' a.

15 Gaa ne cataj Jesucristó rihaan nij yuvii a:

—Tumé uxrá soj man soj rihaan nij rasuun xcoj ruvaa rá a. Nuveé rasuun man rihaan ní' qui'yaj cavii sa' nimán ní' ma' —taj Jesucristó rihaan nij yuvii a.

16 Gaa ne dan me se nanó Jesucristó 'o se-cuento 'o sí ru'vee rihaan nij yuvii a:

—'O sí ru'vee me 'o so', ne cavii ndo'o xnaa so', ne man ndo'o rasuun rihaan so',

17 ne dan me se taj so': “A me se qui'yaj ga rasuun man rihanj ne taj rej caraj man rasuun yo' ga”, taj so' a.

18 Gaa ne: “Aan a. Aj ne'enj me se qui'yaj á. Tucuanee 'unj man nij cuchruu nii, ne qui'yaj doj ve' xij, ne yo'o caraa chre' 'unj man nij rasuun, ne tinavii 'unj man nij yo' rá nij ve',

19 gaa ne cataj 'unj rihaan nimanj se vaa man ndo'o rasuun rihaan ní' cha ní', ne se nanó rá ní', maan se ve'é cha ní' do', ve'é co'o ní' do', ve'é cayáán ní' do', ve'é cotoj ní' do' a. Danj cataj rihaan nimanj che'é nij rasuun cumān rihanj”, taj so' a.

20 Tzaj ne Diose ca'mii rihaan so', cataj Diose: “Síi ni'yon mé so' á. 'Q se niij corá me se cavi' so', ne xa' rasuun caraa sa' so', tzaj ne me se guun yo' rihaan so', rá so' ga”, taj Diose rihaan ru'vee yo' a.

21 Danj quiran' síi araa sa' rasuun che'é ma'an danj, ne taj vaj a doj rasuun sa' nicaj so', ni'yaj Diose a ma' —taj Jesucristó rihaan nij yuvij a.

Nana nihánj taj xna'anj se vaa ne nó xcúún ní' nana ndo'o rá ní' che'é se cha ní' do', che'é yatzíj cunuú ní' do' a

22 Gaa ne cataj Jesucristó rihaan nij síi tucu'yón se-nana so' a:

—Che'é dan cataj xna'anj 'unj rihaan soj se vaa taj che'é nana ndo'o rá soj che'é soj ma'. Ne che'é se cha soj do', ne che'é yan quirí' soj se caráán xráá soj se nanó rá soj ma'.

23 Aj ne'en soj se vaa aj vaa i'na' soj, qui'yaj Diose, ne se guun nucuaj Diose rque Diose cha soj, rá soj gaa a na'. Daj chihaa míj se guun danj rá soj ma'. Ne Diose me síi ca'vee rque se cha soj ei. Ne Diose me síi qui'yaj nee man soj, ne se guun nucuaj Diose rque Diose yatzíj caráán xráá soj, rá soj gaa a na'. Daj chihaa míj se guun danj rá soj ma'. Ne Diose me síi ca'vee rque se caráán xráá soj ei.

24 ”Xcaj soj cuentá daj 'yaj nij xcaa, ne ne unô nij xo' 'núú, ne ne rii nij xo' naa, ne taj se-cuchruu nij

xo', tzaj ne Dioso ro', rque se cha nij xo' adonj. Ne sa' doj vaa soj rihaan xcaa ni'yaj Dioso adonj. Ya sa' doj vaa soj chuguanj.

25 Ne nda' se nanó ndo'o rá soj che'é yan chre' vaa soj, tzaj ne a 'ó xco' se guun nucuaj soj cachij xcaan soj doj qui'yaj ma'an soj ma'. Maan se Dioso ro', me sí ne'en daj ga cachij soj, ne che'é dan taj che'é nanó rá soj a ma'.

26 Dan me se sese se ca'vee qui'yaj soj rasuun le'ej doj, ne asa' ca'vee qui'yaj soj rasuun nocoo doj, rá soj ga. Che'é dan taj che'é nanó ndo'o rá soj che'é nij rasuun nocoo doj a ma'.

27 "'O se xcaj soj cuentá ni'yaj soj nij yâj se vaa ve'é ndo'o vaa nij yâj a. Ne 'yaj suun nij yâj, tzaj ne ma'an Dioso ro', me sí sa' ndo'o vaa qui'yaj man nij yâj adonj. Ne ne rii nij yâj yu'vej ma'. Tzaj ne adi' se vaa sí rii yu'vej ne sa' uxrá vaa sagan' so' ro', vaa nij yatzíj nuu nij yâj adonj. Dan me se cataj xna'anj 'unj rihaan soj se vaa sí cu'naj Salomón sí cane ga naá, ne ve'é uxrá vaa yatzíj nuu so', qui'yaj cunudanj sa'anj vaa rihaan so', tzaj ne nij doj vaa yatzíj nuu so' rihaan nij yâj man tacaan yo', qui'yaj Dioso adonj.

28 Dan me se danj nanj nij yâj man tacaan yo', tzaj ne sa' uxrá vaa nij yatzíj nuu nij yâj yo', 'yaj Dioso, tzaj ne a'yuj ca'ne' nii man nu' coj do', yâj do', ne caraa nii man yo' rihaan ya'an, ne cacaa nu' nij yâj yo' nanj adonj. Ne a doj yu'vee taj nó yâj yo' a ma'. Táa a soj yuvij, ne se nanó rá soj ma'. Dioso me sí rque sagan' soj adonj. Tzaj ne ne guun ya sa' rá soj se vaa Dioso me sí racuíj ya man soj man adonj.

29 "Ne xa' soj, tzaj ne se nano' ndo'o soj se cha soj do', se co'o soj do' ma'. Ne se nanó ndo'o rá soj che'é nij yo' ma'.

30 'Q se nij síi man rihaan chumiij nihánj síi ne ne'en daj vaa Diose ro', inanj 'yaj suun ndo'o nij so' che'é rasuun man rihaan chumiij nihánj adonj. Tzaj ne nu' rasuun achiin man soj ro', aj ne'en Rej soj Diose se vaa achiin rasuun yo' man soj adonj.

31 Tzaj ne nano' soj rej daj qui'yaj soj, ne guun chij Diose nimán soj, gaa ne rque Diose rasuun yo' rihaan soj adonj.

32 "Se cuchu'vi' soj ma'. Ase vaa daán Diose matzinj vaa soj, ne Diose tumé man soj, ne aj guun rá Rej soj Diose se vaa guun chij soj rihaan chumiij nihánj ga so' vaa güii a.

33 "Cutu'vee soj si'yaj soj, ne go' soj sa'anj man nij síi niqúe á. Gaa ne vaa güii quirij' soj 'o nanj caraa nu' sa'anj rque, ne xa' nanj yo', tzaj ne daj chihaa míj se xtuu nanj yo', ne xa' sa'anj yo', tzaj ne daj chihaa míj se navij sa'anj yo' a. Yo' me se quirij' soj rej xta', ne rej xta' ro', taj vaj síi ituu ma'. Ne taj vaj xluú chá rasuun ma'.

34 Ne sese inanj che'é rasuun man rihaan chumiij nihánj qui'yaj suun soj, gaa ne veé maan rihaan chumiij nihánj quinaj nimán soj gaa nanj adonj. Ne sese inanj che'é rasuun man xta' ro', qui'yaj suun soj, gaa ne veé rej xta' ro', ca'anj nimán soj nanj adonj. Me rej ma'an araa soj rasuun, ne veé rej danj vaj nimán soj nanj adonj —taj Jesucristó rihaan nij síi tucu'yón se-nana so' a.

Nihánj me cuentó nanó Jesucristó che'é mozó

na'vij naman ru'vee a

³⁵ Ne cataj uún Jesucristó rihaan nij so' a:

—Ase vaa síi 'nij raan nuj catuun ro', danj gaa soj ei. Ase vaa síi nicaj aga' chuguun aco' ya'an ro', danj gaa soj ei.

³⁶ Dan me se qui'yaj soj ndaa vaa 'yaj mozó na'vij so' naman se-ru'vee so' gaa ca'anj se-ru'vee so' cha'anj nara'aa ei. Dan me se asa' namán ru'vee ne nu' tara'a so' ta'yaa, ne nu' ca'nuu mozó yo' ta'yaa, gaa ne guun niha' rá se-ru'vee mozó yo' adonj.

³⁷ Ne cavii sa' uxrá nij mozó 'yaj danj, che'é se ne cotoj nij so' gaa namán se-ru'vee nij so' a. Dan me se quene'en ya so' se vaa ne cotoj nij so' ma'. Cataj yá 'unj rihaan soj cuano se vaa ma'an ru'vee yo' ro', naqui'yaj sa' so' man so', cayáán se-mozó so' rihaan mesá, qui'yaj so', ne qui'yaj chuvii ma'an so' cha nij se-mozó so' adonj.

³⁸ Dan me se ca'vee se rej yan' naman so' ni', ca'vee se rej taxrej naman so' ni', tzaj ne aj ne'en so' se vaa ve'é inanj na'vij nij mozó yo' man so', ne cavii sa' uxrá nij mozó yo' adonj. Che'é dan qui'yaj soj ndaa vaa 'yaj nij mozó yo' ei.

³⁹ Dan me se sese 'o síi tucua ve' ro', aj ne'en so' me orá ca'na' síi ituu ne qui'yaj ituu síi ituu rasuun man tucua so', ne uxrá cutumé so' tucua so', ne se qui'yaj ituu síi ituu tucua so' tzaj ma'. Maan se ne ne'en so' me orá ca'na' síi ituu man adonj.

⁴⁰ Dan me se ta'nga' danj vaa guue 'unj sij nicaj yu'unj man yuvii, ne ne ne'en soj me orá ca'na' uún 'unj man adonj. Che'é dan yo'o ni'yaj soj á —taj Jesucristó rihaan nij síi tucu'yón se-nana so' a.

Nana nihánj taj xna'anj daj quiran' sí ve'é 'yaj suun rihaan Diose do', daj quiran' sí ne 'yaj suun sa' rihaan Diose do' a

41 Gaa ne xná'anj síi cu'naj Pedró man Jesucristó, cataj so' a:

—Señor. Che'é ma'an núj me nanó so' cuentó yo' na'. Ase che'é cunudanj yuvii xa' —taj Pedró, xná'anj so' man Jesucristó a.

42 Gaa ne cataj síi 'nij ra'a man ní' a:

—Che'é dan me sese cune' síi tucua yo'o ve' man yo'o se-mozó so' se vaa cutumé mozó yo' man tuvi' mozó rque so' se chá rihaan nij so' orá chá nij so' chraa, ne daj qui'yaj mozó yo', rá soj ga. Sese ya ya sij ve'é 'yaj suun me so' do', sese ya ya sij avii raa me so' do', ne daj qui'yaj so', rá soj ga.

43 Gaa ne güii naman se-ru'vee mozó ro', sese quene'en se-ru'vee mozó se vaa ve'é 'yaj suun mozó se-suun ru'vee, ne cavii sa' uxrá mozó yo', qui'yaj se-ru'vee mozó yo' adonj.

44 Ya ya cataj xna'anj 'unj rihaan soj cuano se vaa cune' ru'vee yo' man mozó yo' guun so' síi tumé man cunudanj si'yaj ru'vee yo' a.

45 Tzaj ne sese guun rá mozó yo' se vaa guun raan ndo'o se-ru'vee so', gaa ne guun che'e so' go' so' man yo'ó nij mozó do', man nij mozó chana do', ne cha so' co'o so' ne guun xno so' a.

46 Dan me se ne ne'en so' aman naman se-ru'vee so' a. Ne na'vij so' ca'na' ru'vee a. Tzaj ne síj güii síj orá síj, ne ca'na' ma'an se-ru'vee mozó yo', gaa ne ca'ne' nu' so' man mozó yo', ne cataj so' se vaa ca'anj mozó yo' rihaan ya'an ga yo'ó nij síi ne amán rá ni'yaj man Diose a.

47 ”Dan me se xa' mozó ne'en daj me rá se-ru'vee so' qui'yaj so', tzaj ne sese se qui'yaj so' danj, ne qui'yaj so' inanj se vaa rii nimán ma'an so' qui'yaj so', ne cayuun uxrá so' vaa güii adonj.

48 Ne xa' síi ne ne'en daj me rá se-ru'vee so' qui'yaj so', ne qui'yaj so' rasuun na'vej rá se-ru'vee so' qui'yaj so', tzaj ne maan che'é se ne ne'en so' ne qui'yaj so' rasuun chi'ii ro', maan che'é dan doj cayuun so' adonj.

”Ne síi atá suun nocoo doj 'yaj Diose ro', doj a guun rá Diose qui'yaj suun so' a. Ne síi tumé doj rasuun che'é Diose ro', doj a gaa rasuun nachin' Diose rihaan so' nanj adonj —taj Jesucristó rihaan nij síi tucu'yón se-nanā so' a.

Nanā nihánj taj xna'anj se vaa cunu' ndo'o yuvií ga tuvi' yuvií che'é Jesucristó a

49 Gaa ne cataj uún Jesucristó a:

—Ca'ná' 'unj rihaan chumií nihánj che'é rej guun rá 'unj tacuacoj ya'an nimán yuvií, ne guun niha' rá nij yuvií canoco' nij yuvií man Diose adonj. Ne me ndo'o raj se vaa ra'yanj cacó' ya'an yo' nimán nij yuvií adonj.

50 Tzaj ne rej rihaan ní' me se vaa uxrá sayuun qui'rán' 'unj, se vaa nata' nu' sayuun yo' xráj nanj á.

51 Dan me se ca'ná' 'unj che'é rej dínj doj cayáán nij yuvií man rihaan chumií nihánj ga tuvi' yuvií, rá soj na'. Taj ma'. Cuanó nihánj me cataj 'unj rihaan soj se vaa ca'ná' 'unj che'é rej nata' 'unj se-nanaj rihaan yuvií, tzaj ne se cuno cunudanj nij yuvií rihanj ma'. Che'é dan cunu' yuvií ga tuvi' yuvií adonj.

⁵² Dan me se rej rihaan ní' me se, sese cayáán 'uñ' yuvií rá 'o ve', ne cunu' va'núj nij so' ga yavíj nij so', ne cunu' vjij nij so' ga ya'núj nij so' adonj.

⁵³ Dan me se cunu' snó'o ga ta'nij snó'o so', ne cunu' ta'nij snó'o so' ga ma'an so', ne cunu' chana ga ta'nij chana no', ne cunu' ta'nij chana no' ga ma'an no' adonj. Ne cunu' chana ga choco' no', ne cunu' choco' no' ga ma'an no', che'é se-nanaj adonj —taj Jesucristó rihaan nij síi tucu'yón se-nana so' a.

Nana nihánj taj xna'anj se vaa ne quene'en nij yuvií xcaj nij yuvií cuentá che'é sayuun quirán' nij yuvií ma'

⁵⁴ Gaa ne cataj Jesucristó rihaan nij yuvií a:

—Dan me se soj me se sa' uxrá ne'en soj xcaj soj cuentá adonj. Nu' ne'en soj se vaa gaa avii ngaa rej ata' güii, ne nu' taj soj se vaa caman' uxrá maan, taj soj, ne veé danj 'yaj guee xa' maan, ne aman' ndo'o yo' nanj adonj.

⁵⁵ Ne nu' ne'en uún soj se vaa avii nana yuvaa rej rque rej sur, ne nu' taj soj se vaa daj doj ca'na' ndo'o cachi' taj soj, ne veé danj 'yaj xa' cachi', ne maan ndo'o nanj adonj.

⁵⁶ Dan me se xa' soj sij nucui' rá me se síi sa' me soj taj soj, tzaj ne tu'va rma'an soj nanj adonj. 'Q se ne'en soj xcaj soj cuentá che'é se vaa rihaan chumij do', che'é se vaa rej xta' do', tzaj ne ne ne'en soj xcaj soj cuentá che'é sayuun quirán' soj sij man rihaan chumij nihánj vaa güii ma'.

⁵⁷ "Ne me che'é na'vee xcaj ma'an soj cuentá che'é se vaa nō xcúún soj qui'yaj ma'an soj ga.

58 Ne so' me se sese vaa sí me rá cuta' cacun' xráa so' rihaan nij sí nicaĵ suun, ne ġaa tihaj vaj so' chrej ġa so', ne ve'é ca'miĵ so' ġa so', cataĵ so' rihaan so' se vaa: “Ca'ne' rá so', ne se cutá' so' cacun' xráj ma'”, cataĵ so', ne ve'é ca'miĵ so' ġa so' ei. Ne sese se qui'yáa so' danĵ ca'miĵ sa' so' ġa so' ġaa tihaj vaj roĵ soĵ chrej rihaan chumiĵ nihánĵ, ne niĵaĵ so' mán so' ca'anĵ so' rihaan cuese, ne cuese yo' ro', taĵuachén mán so' ra'a sí tumé taga', ne so' me sí caxriĵ taga' mán so',

59 ne yo' me se ġuun raan ndo'o so', ne ndaa navij naru'vee so' nu' cacun' qui'yáa so', ġaa ne curihaĵ so' taga' nanĵ adonĵ —taj Jesucristó rihaan nij yuviĵ a.

13

Nana nihánĵ taj xna'anĵ se vaa quiĵi' nu' ní' sese se ca'veĵ rá ní' canicaĵ nimán ní' taĵánĵ ní' chrej chi'ĵi a

¹ Ġüii dan me se mán ta'aj nij yuviĵ, ne nata' nij so' rihaan Jesucristó che'é daj quiran' ta'aj nij sí man estadó Galilea ġaa mán nij so' ticavi' nij so' xcuu rihaan Diose ġaa ne curihaĵ nij tanuu 'yaj suun rihaan sí cu'naj Pilato, ne ticavi' nij tanuu man nij sí man estadó Galilea yo' a.

² Ġaa ne canicaĵ Jesucristó cataĵ so' rihaan nij yuviĵ nata' nana yo' a:

—Che'é yan quiran' nij so' danĵ, ne che'é dan sij tumé doĵ cacun' rihaan cunudaĵ yo'ó nij sí ne estadó Galilea me nij so', rá soĵ na'.

³ Taj ma'. Tzaj ne cataĵ xna'anĵ 'unĵ rihaan soĵ cuano se vaa sese se canicaĵ nimán soĵ taĵánĵ soĵ

chrej chi'ii, ne vaa güii quirí' nu' soj ne quiran' soj ndaa vaa quiran' nij so' adonj.

⁴ "Ne xa' xnu' va'nuj nij sí cavi' gaa canee ve' nata' xcaan cu'naj Siloé xraá nij so', gaa ne sij tumé doj cacun' rihaan cunudanj nij sí man chuman' Jerusalén me nij so', rá soj gaa na'.

⁵ Taj ma'. Tzaj ne cataj xna'anj 'unj rihaan soj cuano se vaa sese se canicaj nimán soj tanáj soj chrej chi'ii, ne vaa güii quirí' nu' soj ne quiran' soj ndaa vaa quiran' nij so' adonj —taj Jesucristó rihaan nij yuvü a.

Nihánj me cuentó nanó Jesucristó se vaa sese se guun rá ní' qui'yaj ní' ndaa vaa me rá Diose, ne quirí' ní' a

⁶ Gaa ne nanó Jesucristó cuentó nihánj a:

—Dan me se 'o snó'o me se naj 'o xnaa so' naa chruj uvá, ne nicun' 'o chruun higó rque naa uvá yo', tzaj ne 'na' so' nano' so' chruj raá yo' cha so', tzaj ne a 'ó chruj ne quirí' so' cha so' raá chruun yo', ne che'é dan quirí' rá so' ni'yaj so' chruun yo' a.

⁷ Che'é dan cataj so' rihaan sí 'yaj suun rque xnaa so': “Ni'yaj so' ei. Sij va'nuj ya yo' 'ná' 'unj nanó' 'unj chruj higó raá chruun nihánj, tzaj ne a 'ó chruj nuvi' raá chruun nihánj cha' ma'. Ca'ne' so' man yo', ne taj che'é canicun' rma'an yo' rihaan to'ój a ma'”, taj so' rihaan sí 'yaj suun rque naa uvá yo' a.

⁸ Tzaj ne sí 'yaj suun rque naa uvá yo' ro', cataj rihaan so' a: “Qui'yáá so' se ndo'o, ne daj orún' guee yo' cuano tanáj ní' man chruun nihánj, ne canaa 'unj nu' anicaj tacóo chruun yo', ne caraá 'unj ya'luj tacóo chruun yo', señor.

⁹ Xraj, ne sese yo' natuu ro', ne cuman chruj raa chruun yo', ne quinaj chruun yo', qui'yaj ní' a. Se taj, ne ca'ne' cachrij ní' man chruun yo' ei", taj sí' 'yaj suun naa uvá yo' rihaan sí' si'yaj chruun yo' a. —Dan me cuentó nanó Jesucristó rihaan nij yuvij yo' a.

Nana nihánj taj xna'anj se vaa nahuun sa' 'o chana guun lacuu xraá, qui'yaj Jesucristó güii naránj rá nij yuvij israelitá a

¹⁰ Dan me se 'o güii naránj rá nij yuvij israelitá me se tucu'yón Jesucristó rihaan nij yuvij cunuu chre' rá ve' tucu'yón nii se-tucuanj Moisés,

¹¹ ne dan me se rá ve' yo' ro', nicun' 'o chana guun lacuu xraá, ne nana chree yanj nimán no' ro', me qui'yaj guun lacuu xraá no' a. Ne aj quisíj xnu' va'núj yo' quiran' no' danj a. Dan me se ne ca'vee canicun' caya no' a ma'.

¹² Dan me se quene'en Jesucristó man no', ne canacúún so' man no', cataj so':

—Cuanó nihánj me x'nee chi'ij xraá so', nocoj —taj Jesucristó,

¹³ ne cuta' so' ra'a so' xraá no' a.

Nu' xcaj chana cuentá se vaa nahuun sa' no', ne nu' guun che'e no' cataj no' se vaa sa' uxrá qui'yaj Dióse a.

¹⁴ Tzaj ne ca'maan rá sí' 'nij ra'a ve' tucu'yón nii se-tucuanj Moisés, che'é se güii naránj rá nij yuvij israelitá me güii qui'yaj cono'ó Jesucristó man chana yo' a. Che'é dan cataj sí' 'nij ra'a ve' yo' rihaan nij yuvij a:

—Vatan' güii me güii no xcuún ní' qui'yaj suun ní' 'o 'o smaná a. Ca'na' soj güii yo', ne nahuun sa'

soj ei. Se ca'na' soj nahuun sa' soj güii naránj rá ní ma' —taj so' rihaan nij yuvií a.

¹⁵ Gaa ne cataj síi 'nij ra'a man ní' rihaan nij tuvií síi 'nij ra'a ve' a:

—Quij ndo'o vaa nimán soj, ne síi nucui' ndo'o rá me soj adonj. 'O se taran' soj me se ne nache soj daán soj scúj do', daán soj burró do', rej numíi xo', ne nicaj soj man xo' 'anj soj rej co'o xo' na güii naránj rá ní' gaa na'.

¹⁶ Ne nihánj me nicun' chana nihánj, ne ta'níi ta'nij si'no xii ní' síi cu'naj Abraham me no', ne nihánj me quisíj xnu' va'nuj yo' numíj síi cu'naj Satanás man no', ne ca'vee se güii naránj rá ní' me güii cuan', tzaj ne vaa che'é ndo'o nache ní' man no' ra'a síi cu'naj Satanás adonj —taj Jesucristó rihaan síi 'nij ra'a ve' yo' a.

¹⁷ Ne gaa quisíj ca'mii so' danj, gaa ne guun na'aj cunudanj nij síi guun rá cunu' ga so', gaa ne guun niha' rá cunudanj nij yuvií che'é cunudanj nij suun sa' nocoqo qui'yaj so' a.

Nihánj me cuentó nanó Jesucristó che'é caân cuêj mostazá xlá a

¹⁸ Che'é dan cataj Jesucristó a:

—Daj gaa guun chij Diose rihaan chumií nihánj, rá soj ga.

¹⁹ Dan me se ase vaa achij caân cuêj mostazá xlá ro', danj gaa guun chij Diose rihaan chumií nihánj adonj. Dan me se nicaj yo'o so' man caân cuêj mostazá xlá ne caxríj so' caân yo' rque to'óo so', ne dan me se xra' caân yo', ne cachij yo', ne asa' cachij yo', ne ase vaa 'o chruun ro', danj vaa yo' a. Gaa ne cayuu nij xtâj vaj rej xta' raá cuêj yo', ne qui'yaj nij

xo' saca' nij xo' raá cuêj yo' adonj. —Danj ca'mii Jesucristó rihaan nij yuvii a.

Nihánj me cuentó nanó Jesucristó che'é levadura se 'yaj naraa nana rque rachrúún a

²⁰ Gaa ne cataj uún Jesucristó a:

—Daj gaa 'o rasuun naqui'yaj ní' rihaan soj, gaa ne quene'en soj daj gaa guun chij Diose rihaan chumii nihánj, rá soj ga.

²¹ Dan me se naqui'yaj ní' 'o chana caxrój yo'óo levadura rque cunj hariná gaa 'yaj no' rachrúún a. Dan me se ase vaa 'o chana, ne cuxra' ta'aj no' 'o va'nuj ya aga' yo'óo hariná, ne caxrój ndo'o no' yo'óo levadura, ne caxrój yuve no' man yo' ndaa navij naraa ndo'o nana rque yo' a. Ase vaa uun chij yo'óo levadura yo' rihaan cunj hariná ro', danj gaa guun chij Diose rihaan chumii nihánj adonj. —Danj ca'mii Jesucristó rihaan nij yuvii a.

Nana nihánj taj xna'anj me síí ca'anj cayáán ga Diose ne me síí ca'anj rihaan ya'an a

²² Gaa ne vaj Jesucristó cachén so' nij chuman' nocoo do', nij chuman' ra'a do', ne tucu'yón so' se-nana so' rihaan nij yuvii a. Ne danj nanj nichrun' so' nichrun' so' chuman' Jerusalén a.

²³ Ne xná'anj yo'o so' man Jesucristó, cataj so':

—Ne doj nij síí ca'vee quinanii rihaan sayuun, qui'yaj Diose a na' —taj so', xná'anj so' man Jesucristó a.

Gaa ne cataj Jesucristó rihaan nij yuvii a:

²⁴ —Ase vaa ta'yaa chruj ndo'o vaa rej cachén yuvii catuu yuvii rihaan Diose adonj. Qui'yaj nucuaj soj nimán soj che'é rej catuu soj rej yo' ei. Cataj xna'anj 'unj rihaan soj cuano se vaa guun

ndo'o rá nij yuvii catuu nij so' rej yo', tzaj ne se guun nucuaj nij so' catuu nij so' ma'.

25 Ne asa' quisíj canicun' caya sí tucua ve' yo' ne caráán so' ta'yaa, gaa ne soj ro', canicun' xe', ne guun che'e soj tica'mii soj ta'yaa, ne cataj soj: “Na'nuu so' ta'yaa catuu núj, Señor”, cataj soj, gaa ne cataj 'unj rihaan soj: “Ne ne'en uxraj me rej cavii soj a ma'”, cataj 'unj rihaan soj gaa nanj adonj.

26 Gaa ne guun che'e soj cataj soj: “Chá núj chraa do', co'o núj na ga so' do', ne tucu'yón so' se-nana so' chiháán núj nanj á”, cataj soj rihanj á.

27 Gaa ne cataj uún 'unj rihaan soj: “Ne ne'en uxraj me rej cavii cunudanj soj sij 'yaj inanj cacun' a ma'. Naxuun soj man soj rihanj á”, cataj 'unj rihaan soj a.

28 ”Ne rej ca'anj soj me se rej ta'vee ndo'o yuvii me yo', ne ndaa cha ruj ma'an yuvii cúu yan' yuvii, ne quene'en soj man sí cu'naj Abraham do', man sí cu'naj Isaac do', man sí cu'naj Jacob do', man cunudanj nij sí nata' se-nana Diose gaa naá do', se vaa cayáán nij so' ga Diose asa' guun chij Diose rihaan chumii nihánj, ne xa' soj, tzaj ne quene'en soj se vaa aj quiri'íj nii man soj xe' nanj adonj.

29 Ne güii guun chij Diose rihaan chumii nihánj ro', ca'na' ndo'o yuvii man cunu' chumii, ne cayáán nij so' rihaan se-mesa Diose, ne cha nij so' chraa adonj.

30 Ne nij sí ne guun chij rihaan chumii nihánj me se xta' ro', guun chij nij so' a. Ne nij sí guun chij ndo'o rihaan chumii nihánj me se rej xta' ro', guun nij so' sí noco', qui'yaj Diose nanj adonj —taj

Jesucristó rihaan nij yuvij yo' a.

Nana nihánj taj xna'anj se vaa ne cuchu'vi' Jesucristó ni'yaj so' man síí cu'naj Herodes ma'

³¹ Ne güii dan me se cuchu' doj nij síí fariseo rihaan Jesucristó, ne cataj nij so' a:

—Curihanj so' estadó nihánj ca'anj so', ne síí nicaj suun rey cu'naj Herodes me se me ndo'o rá so' ticavi' so' mán so' á —taj nij síí fariseo rihaan Jesucristó a.

³² Gaa ne cataj Jesucristó rihaan nij so' a:

—Ase vaa chunee avii ndo'o raá qui'yaj sayuun vaa síí cu'naj Herodes yo', ne ca'anj soj, ne cataj soj rihaan so' se vaa 'unj me se rii 'unj nana chree nimán nij yuvij, ne naqui'yaj sa' 'unj man nij síí ran', ne 'o güii cuan' ne 'o güii a'yuj ne rque va'nuj guee güii qui'yaj suun 'unj se-sunj, ne veé danj quisij se-sunj, qui'yáj nanj adonj.

³³ Tzaj ne vaa che'é qui'yaj suun 'unj cuan' ne a'yuj ne yataj, ne rque va'nuj güii qui'yaj suun 'unj che'é xrej 'unj, gaa ne curihanj 'unj estadó nihánj ei. 'O se taj che'é cavi' 'o síí nata' se-nana Diose rej yanj yo'ó chuman', ne veé chuman' Jerusalén cavi' so' gaa ca'vee adonj —taj Jesucristó rihaan nij síí fariseo yo' a.

Nana nihánj taj xna'anj daj quiran' nij síí ne chuman' Jerusalén a

³⁴ Gaa ne cataj uún Jesucristó a:

—Naná uxrá raj che'é soj sij man chuman' Jerusalén nihánj nanj á. Dan me se ticavi' soj man nij síí nata' se-nana Diose, ne go' soj yahij man nij síí ca'née Diose cuchu' rihaan soj a. Guun que'ee ndo'o guun rá 'unj naqui'yaj chre' 'unj man soj

cutumé 'un̄j man soj, tzaj ne taj se qui'yá' ca'vee ma'. Dan me se ase vaa 'yaj chuchee naqui'yaj chre' chuchee man ta'níí xo' caráán xo' xcóó xo' xráá ta'níí xo' ro', danj guun raj qui'yáj man soj, tzaj ne ne ca'vej rá soj qui'yáj danj a ma'.

³⁵ Yaj me se cutumé ma'an̄ soj man soj nan̄j adon̄j. 'O se cuan̄ nihánj me se cataj xna'an̄j 'un̄j rihaan soj se vaa rej rihaan ní' ro', se quene'en uún soj manj ma'. Tzaj ne ndaa güii ca'na' uún 'un̄j rihaan chumīj nihánj quene'en soj manj, ne cataj soj: “Ve'é uxrá 'na' síí a'néé síí 'nij ra'a man ní' ei”, cataj soj a —taj Jesucristó ni'yaj so' man nij síí man Jerusalén yo' a.

14

Nanā nihánj taj xna'an̄j se vaa nahuun snó'o quixíj cu'maan man, qui'yaj Jesucristó güii naránj rá nij yuvī israelitá a

¹ Dan me se 'o güii naránj rá nij yuvī israelitá me se catúj Jesucristó rá ve' tucúa 'o síí uun chij rihaan nij síí fariseo cha so' chraa, ne nij síí fariseo ro', tumé uxrá man so' daj qui'yaj so' a.

² Ne veé danj nicun̄ 'o síí quixíj cu'maan man rihaan Jesucristó a.

³ Gaa ne xná'an̄j Jesucristó man nij síí naqui'yaj cuu se-tucañj Moisés rihaan yuvī do', man nij síí fariseo do', cataj so':

—No xcúún ní' ca'nēe ní' chi'ij xráá síí ran' güii naránj rá ní', rá soj na'. Ase ne nó xcúún ní' xa' —taj Jesucristó, xná'an̄j Jesucristó man nij so' a.

Tzaj ne guun dínj tu'va nij so' a.

⁴ Gaa ne quita'aa Jesucristó man sí ran' yo', ne nahuun sa' so', qui'yaj Jesucristó, gaa ne na'néé Jesucristó chrej man so' a.

⁵ Gaa ne ni'yaj Jesucristó rihaan nij sí fariseo yo', cataj so' a:

—Ne sese quinij ta'níi 'o tuvi' soj do', 'o daán soj scúj do', rá cuxruj na güii naránj rá ní, ne ra'yanj quirii soj man ta'níi soj do', man daán soj do', rá 'unj ei —taj Jesucristó rihaan nij sí fariseo a.

⁶ Veé dan me se a 'ó nana ne quirii nij so' ca'mii nij so' rihaan Jesucristó ma'.

Nana nihánj taj xna'anj se vaa se nano' ní' rej sa' doj quitaj ní' a

⁷ Dan me se quene'en Jesucristó se vaa nij síi 'na' tucua' síi fariseo yo' ro', nano' ndo'o nij so' rej sa' doj quitaj nij so', gaa ne che'é dan tucu'yón Jesucristó nana nihánj man nij so', cataj so' a:

⁸ —Asa' canacúun ta'aj nii mán so' ca'anj so' cha'anj nara'aa, ne se ca'anj quitaj so' chruun xlá sa' doj ma'. 'O se ne ne'én so' sese canacunj nii man yo'ó síi sa' doj rihaan so' ne quitaj so' chruun xlá taj so' man adonj.

⁹ Ne síi 'yaj cha'anj ro', cataj so' rihaan so': “Rque so' chruun yo' quitaj síi nihánj á”, cataj so' rihaan so', gaa ne guun na'aj so', ne chruun xlá nij doj ca'anj quitaj so', qui'yaj so' a.

¹⁰ Dan me se asa' canacúun nii mán so', ne asa' cuchí' so' rej canuú cha'anj, ne rej nij doj ro', quitaj so' ei. Gaa ne asa' ca'na' síi canacúun mán so', gaa ne cataj so' rihaan so': “Cavii so' quitaj so' rej sa' doj nihánj, tinuj”, cataj so' rihaan so', gaa ne

caraya'anj uxrá cunudanj nij sí 'na' cha'anj yo' n̄i'yaj nij so' mán so' nanj adonj.

¹¹ 'O se xa' sí me rá t̄icavii sa' man ma'an, tzaj ne quir̄i' so', ne guun na'aj so' adonj. Ne xa' sí 'yaj nica' nimán, tzaj ne cavii sa' so' adonj —taj Jesucristó rihaan nij sí fariseo do', rihaan nij sí naqui'yaj cuu se-tucuanj Moisés rihaan yuvii do' a.

Nana nihánj taj xna'anj me sí canacunj ní' cha chraa ga ní' a

¹² Gaa ne cataj Jesucristó rihaan sí canacúun man so' cha so' chraa a:

—Asa' guun rá so' ca'na' yuvii cha yuvii chraa ve' tucua' so', ne se canacúun so' man tuví' so' do', man tinúu so' do', man nij sí ru'vee man chiháán so' do' ma'. Dan me se sese canacunj so' man inanj ma'an nij so', gaa ne vaa güii canacunj nij so' mán so' cha so' chraa ga nij so', gaa ne dan me se aj naru'vee nij so' nu' se chá rihaan so' danj rá se vaa gaa nanj adonj.

¹³ Tzaj ne asa' canuû cha'anj qui'yáá so', ne canacunj so' man nij sí nique do', man nij sí rengo do', man nij sí tuchrii do', cha nij so' chraa ei.

¹⁴ Danj qui'yáá so', gaa ne nij so' me se taj rasuun rihaan nij so' naru'vee nij so' rihaan so' ma'. Gaa ne asa' cunuu i'na' uún nij sí sa' rihaan Diose, ne ma'an Diose naru'vee rihaan so', gaa ne cavii sa' uxrá so' adonj —taj Jesucristó rihaan sí canacúun man so' cha so' chraa a.

Cuentó nihánj taj xna'anj me sí cha chraa ga Diose asa' guun chij Diose rihaan chumiñ nihánj a

15 Dan me se cuno yo'ᵒ sᵓ́ chá chraa gᵗ Jesucristó nana ca'mii Jesucristó, gᵗa ne che'é dan cataj so' rihaan Jesucristó a:

—Cavii sa' cunudanj nij sᵓ́ chá chraa gᵗ Diose asa' guun chij Diose rihaan chumii nihánj nanj ei —taj so' rihaan Jesucristó a.

16 Gᵗa ne cataj Jesucristó rihaan so' a:

—Sᵓ́ navij rá cha'anj nocoo ndo'o me so', ne nacúún so' ca'na' que'ee yuvii a.

17 Gᵗa ne dan me se maan orá chá nij so' chraa me ca'née sᵓ́ navij rá cha'anj man se-mozó so' ca'anj cataj mozó yo' rihaan nij sᵓ́ ca'na' se vaa ca'na' nij so' cha'anj chá nij so' chraa a. “Aj quisij guun chuvii, ne ca'anj ní' chá nij soj chraa ei”, taj mozó yo' rihaan nij sᵓ́ ca'na' cha'anj yo' a.

18 Gᵗa ne guun che'e nij so' cataj 'ᵒ 'ᵒ nij so' rihaan mozó yo' se vaa se ca'vee cuchí' nij so' chá nij so' chraa a. Dan me se yo'ᵒ so' cataj: “Tzaj ne 'unj me se tihaj quiránj 'unj 'ᵒ yo'óó, ne vaa che'é ndo'o ca'anj 'unj quene'én 'unj yo'óó yo' a. Ne qui'yáá so' se ndo'o, cataj so' se vaa se ca'vee cuchí' 'unj ma'”, taj so' rihaan mozó yo' a.

19 Gᵗa ne yo'ó so' cataj: “Maan se 'unj me se 'un' yuntá scúj quiránj 'unj, ne cuano nihánj me se ca'anj 'unj quene'én 'unj daj vaa scúj quiránj sese scúj sa' me xo' a. Ne che'é dan qui'yáá so' se ndo'o cataj so' se vaa se ca'vee cuchí' 'unj ma'”, taj so' rihaan mozó yo' a.

20 Ne yo'ó so' ro', cataj uún rihaan mozó yo' a: “'Unj me se tihaj xcaj 'unj chana, ne che'é dan se ca'vee cuchí' 'unj ma'”, taj so' rihaan se-mozó sᵓ́

navij rá cha'anj yo' a. Ne veé danj ca'mii cunudanj nij sí aj quiri' ni'yaj ca'anj cha'anj yo' a.

21 "Dan me se namán mozó, ne nata' mozó nu' se vaa ca'mii 'o 'o nij so' rihaan se-ru'vee mozó a. Gaa ne ca'maan ndo'o rá sí navij rá cha'anj yo' gaa cuno so' se-nanā se-mozó so', ne cataj so' rihaan se-mozó so': "Ra'yanj cavii so' ca'anj so' daj a nij callé, ne nīcaj so' man nij sí nique do', man nij sí chéé rengo do', man nij sí tuchrii do', ca'na' so' nihánj, ne chá nij so' chraa ga ní ei", taj so' rihaan se-mozó so' a.

22 Veé danj qui'yaj se-mozó so', ne cuchi' uún mozó yo' rihaan se-ru'vee so', ne cataj so': "Aj qui'yáj nu' se vaa cataj so' rihanj, señor. Tzaj ne vaa rej quisij catuu doj yuvii uún a", taj mozó yo' rihaan se-ru'vee so' a.

23 Gaa ne cataj ru'vee yo' rihaan mozó a: "Cavii so' ca'anj so' nu' nij chrej ca'aan do', nu' nij chrej catuun do', ne qui'yáá so' fuerzá man nij yuvii se vaa ca'na' nij so' á. Gaa ne caraa nu' ve' tucuaaj ei.

24 'O se cuano nihánj me se cataj xna'anj 'unj rihaan so' se vaa xa' nij sí canacúún ní asino yaan, tzaj ne a 'o nij so' se ca'vee ca'na' chá chraa ga ní a man adonj", taj so' rihaan se-mozó so' a. —Veé danj quisij cuentó nanó Jesucristó a.

Nanā nihánj taj xna'anj se vaa yuun che'e ca'nej nimán ní canoco' ní man orún' Jesucristó a

25 Dan me se que'ee uxrá yuvii vaj ga Jesucristó, ne canicaj so', cataj so' rihaan nij yuvii a:

26 —Sese me rá 'o so' ca'na' so' rihanj, ne sese guun rá so' se vaa sa' doj vaa rej so' do', nii so' do', nica so' do', ta'níi so' do', tinúú so' do', ra'vij so'

do', ndaa nimán ma'an so' do', rihanj, ne se ca'vee guun so' 'o sí tucu'yón se-nanaj a ma'.

27 Ne sí na'vej rá quirán' sayuun che'é se me so' sí noco' manj ro', se ca'vee guun so' 'o sí tucu'yón se-nanaj a ma'.

28 ”Dan me se soj, tzaj ne sese guun rá yo'o tuvi' soj cune' yo'o soj ve' nata' xcaan, ne sí qui'yaj ve' yo' me se asino nuchruj raa so' cuentá sese quisij se-sa'anj so' quisij nu' ve' yo', raj a.

29 Ne sese se qui'yaj so' danj nuchruj so' cuentá asino yaan, gaa ne asa' cuchruj so' tacóo ve', gaa ne se guun nucuaj so' qui'yaj so' nu' ve' a ma'. Ne nij sí ne'en se vaa qui'yaj so' ro', ca'nga' nacoo nij so' ni'yaj nij so' man so',

30 ne cataj nij so': “Sí nihánj me se guun che'e so' cune' so' ve', tzaj ne ne guun nucuaj so' quisij nu' ve' qui'yaj so' a ma'”, cataj nij so' ni'yaj nij so' man sí guun che'e ve' yo' a.

31 ”Ne dan me se sese vaa 'o sí nicaj suun rey vaa chi' míj tanuu rihaan, ne sese ca'na' yo'ó sí nicaj suun rey vaa icó míj tanuu rihaan cunu' ga so', gaa ne asino yaan xcaj so' cuentá sese guun nucuaj so' qui'yaj canaán so' rihaan sí vaa icó míj tanuu rihaan yo', ne sese guun nucuaj so' rá so', ne cavii so' cunu' so' ga nij sí 'na' yo' a.

32 Tzaj ne sese se guun nucuaj so' qui'yaj canaán so' rá so', gaa ne ca'nej so' sí ca'anj suun ca'mii ga sí 'na' yo' ndaa vaa se guun cunu' nij so' a. Danj cataj so' gaa tihaj 'na' sí cunu' ga so' gan' a. Gaa ne cachinj ni'yaj sí ca'anj suun yo' rihaan sí 'na', ndaa vaa ca'ne' rá so' ga suun cunu' a.

33 ”Dan me se ase vaa xcaj sí cune' ve' do', sí

cunū' gā tuvi' dō', cuentá sese guun nucuaj roj so' qui'yaj roj so' danj ro', veé danj qui'yaj guee soj sij me rá canoco' manj ei. Ne sese se guun rá soj tanáj xcō soj nu' si'yaj soj dō', nu' tuvi' soj dō', canoco' soj manj, ne se ca'vee guun soj sí tucu'yón se-nanaj a ma'.

³⁴ "O se ase vaa yaan gā chraa ro', danj vaa nij sí tucu'yón se-nanaj gā chumi nihánj, ne vaa se uun ndo'o yaan nanj á. Dan me se sese ne 'ne' chá yaan yo', gaa ne taj se qui'yá' cunū sa' yaan gaa a ma'.

³⁵ Taj se guun yaan yo' rihaan to'óo ní' cunū sa' to'óo ní' ma'. Taj se guun yaan yo' rihaan ya'luj se vaa cunū sa' doj ya'luj ma'. A doj rasuun se cavii sa', qui'yaj yaan yo' ma'. Maan se ri'ij uun nii man yaan vaa danj xe' a.

"Dan me se sese taj yu'uj xréé soj, ne cunō soj nana nihánj ei —taj Jesucristó rihaan nij yuvii yo' a.

15

Nihánj me cuentó che'é matzinj ca'anj ni'ya a

¹ Dan me se cuchi' que'ee sí a'néj puextó dō', que'ee sí tumé cacun' dō', rihaan Jesucristó a. 'O se guun rá nij so' cunō nij so' se-nana so' a.

² Ne xa' nij sí fariseo dō', nij sí naqui'yaj cuu se-tucuanj Moisés rihaan yuvii dō', tzaj ne ca'maan rá nij so' ni'yaj nij so' man Jesucristó, ne nij ca'mii nij so' che'é so', che'é rej ve'é nicaj tuvi' so' gā nij sí tumé cacun' ne chá so' chraa gā nij so' a.

³ Gaa ne nanó Jesucristó 'o cuentó nihánj rihaan nij so' a:

4—Dan me se sese yo'ō tuvi' nij soj nicaj 'ō cientó matzinj, ne sese ca'anj ni'ya orún' guee daán so' matzinj, ne tanáj so' yo'ó ca'anj chihaa xnu' ca'anj daán so' matzinj rej tacaan, ne cavii so' ca'anj nano' so' man orún' daán so' matzinj ca'anj ni'ya á. Ne se ca'ne' rá so' ma'. Tananj ya ca'anj so' nano' so' man daán so' matzinj, gaa ne uun daj nari' so' man yo' adonj.

5 Ne asa' quisij nari' so' man xo', gaa ne cuta' so' man xo' tacaan xcóó so', ne guun niha' ndo'o rá so' a.

6 Ne asa' namán so' tucua' so', gaa ne nacunj so' man nu' tuvi' so' sí ne chiháán so', ne cataj so' rihaan nij tuvi' so': “Guun niha' rá soj gaj ei. 'Ō se narij danj matzinj ca'anj ni'ya ei”, cataj so' rihaan tuvi' so' a.

7 Ne cuano nihánj me cataj xna'anj 'unj rihaan soj se vaa xta' rej ne Diose ro', guun niha' doj rá nij sí man yo' ni'yaj nij so' man orún' sí tumé cacun' gaa canicaj nimán so' canoco' so' chrej sa' a. Tzaj ne se caráya'anj nij so' man ca'anj chihaa xnu' ca'anj, ése sij sa' me nij so', rá nij so' ma', ne taj che'é canoco' nij so' tucuaán naca narqué Diose, rá nij so' ma' —taj Jesucristó rihaan nij so' a.

Nihánj me cuentó che'é pesó xoo ca'anj ni'ya a

8 Ne cataj uún Jesucristó a:

—Ne sese nicaj 'ō chana chi' pesó xoo, ne sese ca'anj ni'ya orún' pesó xoo yo', ne tucuaço' no' ya'an aga' chuguun, ne naca' no' nu' ve' tucua' no', ne uxrá nano' no' pesó xoo yo', ne se ca'ne' rá no' ma'. Tananj uxrá nano' no' man pesó xoo yo', uun daj nari' ya no' man yo', gaa ne ca'ne' rá no' adonj.

9 Ne asa' quisíj nari' no' pesó xoo yo', gaa ne canacunj no' man nu' tuvi' chana no' ní ne x'núú ve' tucúa no', ne cataj no' rihaan nij tuvi' chana no': “Guun niha' rá soj gaj á. 'O se narij se-sa'anj pesó xoo ca'anj ni'ya ei”, cataj no' rihaan tuvi' chana no' a.

10 Dan me se cataj xna'anj 'unj rihaan soj a. Ndaa rá se vaa guun rá chana gaa nari' no' se-sa'anj no' ro', danj guun niha' uxrá rá nij se-mozó Diose n'yaj nij so' man orún' síí tumé cacun' gaa canicaj nimán so' canoco' so' chrej sa' adonj —taj Jesucristó rihaan nij so' a.

Nihanj me cuentó che'é síí tumé cacun' canicaj rihaan rej a

11 Gaa ne cataj uún Jesucristó a:

—'O síí vaa vij ta'núí me so' a.

12 Ne cataj síí cunij rihaan rej so' a: “Me rá 'unj cuxra' ta'aj so' rasuun rque so' manj guun si'yáj, ataj”, taj so' rihaan rej so' a. Gaa ne cuxra' ta'aj snó'o yo' nu' si'yaj so', ne rque so' ta'aj si'yaj so' rihaan 'o 'o ta'núí so' a.

13 Dan me se cachén doj güii, gaa ne naqui'yaj chre' síí cunij yo' nu' si'yaj so', ne cavii so' ca'anj so' chuman' naj gan', ne qui'yaj ndo'o so' se nij, ne cutun' rma'an so' nu' se-sa'anj so' a.

14 Quisíj cutun' so' nu' se-sa'anj so', gaa ne cachén ndo'o x'naa chuman' yo', ne guun che'e so' quiran' ndo'o so' sayuun, ne quina'aan ndo'o rque so', ne taj vaj a doj se chá rihaan so' cha so' a.

15 Dan me se catúj so' rihaan 'o síí chihanj chuman' yo', ne ca'ne' síí chihanj chuman' yo'

suun rihaan so' ca'anj so' se-rancho sí chihanj yo' cutumé so' xcáa a.

16 Tzaj ne na'aan ndo'o rque so', ne ndaa guun rá so' chá so' coj go' nii chá nij xcáa a. Tzaj ne ne rque nii coj yo' chá so' a ma'.

17 ”Dan me se 'o güii ne nahuun sa' raá so', ne guun che'e so' xcaj so' cuentá, ne nanuj rá so' rej so' a. Ne me rá so': “Nij se-mozó réj, tzaj ne man ndo'o se chá rihaan réj, ne man ndo'o se chá rihaan se-mozó réj a. Ne nihánj me cavi' 'unj qui'yaj x'naa nanj á.

18 Naxumaan 'unj, ne nán' 'unj rej ne réj, cataj 'unj rihaan réj: Tumej cacun' rihaan Diose, ne tumej cacun' rihaan so', ataj.

19 Taj che'é cataj so' se vaa ta'níi so' mej cuano a ma'. Maan se qui'yáa so' se ndo'o, ne guún 'unj mozó rihaan so', qui'yáa so', ruguanj, cataj 'unj rihaan réj”, guun rá síi cunij yo' a.

20 ”Gaa ne cavii so' ca'anj so' rej ne rej so' a. Dan me se gan' ndo'o vaj so' chéé so', ne quene'en rej so' man so', ne cunuu 'ee ndo'o rá rej so' man so', ne cunánj rej so' ndaa rej vaj so', ne na'yaan rej so' man so', ne cachrón tu'va rej so' man so' a.

21 Gaa ne cataj síi cunij yo' rihaan rej so' a: “Tumej cacun' rihaan Diose, ne tumej cacun' rihaan so', ataj. Taj che'é cataj so' se vaa ta'níi so' mej cuano a ma'. Maan se qui'yáa so' se ndo'o, ne guún 'unj mozó rihaan so', qui'yáa so', ruguanj”, taj so' rihaan rej so' a.

22 Tzaj ne ca'mii rej so' rihaan nij mozó man rihaan rej so', cataj rej so': “Ra'yanj nıcaj soj yatzi' sa' ndo'o ca'na' soj cunuû ta'nıj, ne ca'na' se'ej sa'

cunuû ra'a ta'níj, ne ca'na' canj naca qui'nij tacóo so' á.

²³ Ne ticavi' soj man scúj le'ej ramii ndo'o, ne qui'yaj chuvii soj, ne cha ní', ne qui'yaj ní' cha'anj, ne guun niha' uxrá rá ní' ei.

²⁴ 'O se ta'níj nihánj me se ase vaa síi cavi' gaa so' rihanj, tzaj ne nihánj me se cunuu i'na' uún so' rihanj, ne ase vaa síi ca'anj ni'ya gaa so', tzaj ne nihánj me se narij man so' nanj adonj", taj rej so', ne guun che'e nij so' guun niha' uxrá rá nij so' a.

²⁵ "Tzaj ne vaa síi chava' uún, ne 'yaj suun so' se-rancho rej so' a. Dan me se 'na' nique síi chava' yo', ne gaa quinichrun' so' ve', ne cuno so' se vaa go' ndo'o misca chra' do', se vaa ra'ánj ndo'o yuvii do' a.

²⁶ Gaa ne canacúún síi chava' yo' man 'o mozó, ne ca'na' yo'o mozó rihaan so', ne xná'anj so' man mozó, ne: "Me che'é 'yaj nii nu' cha'anj ga", taj so' rihaan mozó yo' a.

²⁷ Gaa ne cataj mozó rihaan so' a: "Namán tinúú so', ne cavi' scúj le'ej ramii ndo'o, qui'yaj rée so', che'é se nari' uún so' ta'níi so' ne vaa nucuaj ta'níi so' nari' so' a", taj mozó rihaan síi chava' yo' a.

²⁸ "Dan me se ca'maan rá síi chava', ne na'vej uxrá rá so' catuu so' rá ve' a. Tzaj ne curihanj rej so', gaa ne canacúún rej so' man so' ca'na' so' a.

²⁹ Tzaj ne cataj so' rihaan rej so' a: "'Unj nihánj me se aj quisíj que'ee yo' qui'yaj suun 'unj rihaan so' nihánj, ne cunudanj nij nana cataj xna'anj so' rihanj ve'é cunoj a. Ne a 'ó güii ne rque so' a 'ó tana le'ej rihanj ne qui'yaj chuvii 'unj ne chaj ga nij tuvij a ma'.

30 Tzaj ne nihánj me se namán ta'níi so' síi chá nu' si'yáá so' gaa chéé so' ga nij chana niha' rá, ne ticaví' so' scúj le'ej ramii che'é so' a", taj síi chava' yo' rihaan rej so' a.

31 "Gaa ne cataj rej so' rihaan so' a: "Maan se so' me se 'o né so' ga 'unj nihánj, rej. Ne nu' rasuun si'yáj me si'yáá so', rej.

32 Tzaj ne vaa che'é guun niha' rá níi gaa namán tinúú so', rej. 'O se tinúú so' ro', ase vaa 'o síi cavi' gaa so' rihanj, tzaj ne nihánj me cunuu i'na' uún so', ne ase vaa 'o síi ca'anj ni'ya gaa so' rihanj, tzaj ne cuano nihánj me se aj narij man so' nanj adonj", taj rej so' rihaan síi chava' yo' a. —Veé danj quisíj cuentó nanó Jesucristó rihaan nij so' a.

16

Cuentó nihánj taj xna'anj daj qui'yaj níi ga si'yaj níi rihaan chumii nihánj, ne ca'vee cayáán níi ga Diose asq' guun chij Diose rihaan chumii nihánj a

1 Gaa ne cataj Jesucristó rihaan nij síi tucu'yón se-nana so' a:

—Síi ru'vee me yo'o so', ne nuu 'o mayordomo rihaan so' síi tumé nu' si'yaj so' a. Dan me se cuta' nii cacun' xráa mayordomo yo' rihaan ru'vee se vaa cutun' ndo'o so' si'yaj ru'vee a.

2 Gaa ne canacúun ru'vee man mayordomo, ne ca'na' mayordomo rihaan so', ne cataj so' rihaan mayordomo yo' a: "Aj ca'na' nana rihanj se vaa cutun' ndo'o so' si'yáj, ne ne ne'en uxraj me che'é qui'yáá so' danj a ma'. Tzaj ne cataj xna'anj so' rihanj daj qui'yáá so' gaa cutumé so' si'yáj á. 'O se

se ca'vee cunuû so' doj rihanj cutumé so' si'yáj a ma", taj ru'vee rihaan mayordomo yo' a.

³ "Dan me se curihanj mayordomo, ne guun rá so' a: "Nihánj me se daj qui'yáj, ne ca'nee se-ru'vee 'unj suun ra'aj, ne daj qui'yáj cuano, raj a. 'Unj me se se guun nucuáj qui'yaj suun 'unj suun 'ee, ne na'aj 'unj cachinj 'unj caridad, na'aj 'unj cachee rma'anj nanj á.

⁴ Aan a. Nihánj me qui'yáj nanj á. Gaa ne asa' ca'néj ru'vee suun ra'aj gaa ne nuvi' rej ca'anj 'unj, gaa ne canacunj yo'ó nij so' manj ca'anj 'unj tucua' yo'ó nij so' cayánj a", guun rá so' a.

⁵ "Gaa ne canacúun so' man nij sí qui'yaj xcúun rihaan se-ru'vee so', ne ca'na' 'o 'o nij so' rihaan so' a. Gaa ne rihaan sí taj yaan rihaan yo'ó nij so' cataj so': "Me daj qui'yaj xcúun so' rihaan se-ru'vee 'unj ga", taj so', xná'anj so' man sí taj yaan yo' a.

⁶ Gaa ne so' cataj: "O cientó tambo casté qui'yaj xcúnj rihaan se-ru'vee so' a", taj so' rihaan mayordomo yo' a. Gaa ne cataj mayordomo yo' rihaan so': "Nıcaj so' dáán so' yanj cuentá nihánj, tirı' so' man yo', ne ra'yanj cayáán so', ne qui'yáá so' yo'ó yanj naca, ne cachron so' rihaan yanj naca se vaa vij chihaa chí' guee tambo qui'yaj xcúun so' á", taj mayordomo yo' rihaan sí taj yaan yo' a.

⁷ Gaa ne xná'anj so' man yo'ó so', cataj so': "Ne so' ga. Me daj qui'yaj xcúun so' rihaan se-ru'vee 'unj ga", taj so', xná'anj so' man yo'ó so' yo' a. "O cientó nanj 'núú trigó a", taj yo'ó so' a. "Nıcaj so' dáán so' yanj cuentá nihánj, tirı' so' man yo', ne qui'yáá so' yo'ó yanj naca, ne ca'anj chihaa

guee nanj cachron so' rihaan yanj naca yo' á", taj mayordomo rihaan yo'ó so' a.

8 "Dan me se xcaj se-ru'vee mayordomo yo' cuentá se vaa qui'yaj chi'ii ndo'o mayordomo yo' rihaan so', tzaj ne ca'mii sa' ru'vee che'é mayordomo cataj ru'vee se vaa sij avii ndo'o raa me mayordomo yo' adonj. Danj nanj nij síi man rihaan chumii nihánj cuano, tzaj ne gaa 'yaj suun nij so' ga tuvi' ma'an nij so', ne doj a avii raa nij so' rihaan nij síi noco' se-nana Diose nanj á.

9 "Gaa ne cuano nihánj me se cataj xna'anj 'unj rihaan soj se vaa nij rasuun man rihaan chumii nihánj, tzaj ne 'yaj ndo'o nij yuvii cacun' che'é rej qui'yaj canaan nij yuvii rasuun man rihaan chumii nihánj, ne soj ro', vaa che'é nicaj soj si'yaj soj rasuun man rihaan chumii nihánj, ne go' soj man yuvii gaa ne guun tuvi' soj ga nij yuvii, qui'yaj rasuun yo' a. Ne guii navij nu' rasuun man rihaan chumii nihánj me se aj quiri' ndo'o soj tuvi' soj síi cayáán ga soj, gaa ne ve'é ndo'o cayáán soj ga nij tuvi' soj ga Diose rej xta' nu' cavii nu' ca'anj a.

10 'O se síi ve'é tumé doj tzin' rasuun ro', so' me síi guun nucuaj cutumé noco rasuun, ne síi 'yaj chi'ii ga doj rasuun ro', chi'ii doj qui'yaj so' ga noco rasuun ei.

11 Che'é dan sese ne guun nucuaj soj cutumé sa' soj nij rasuun chi'ii man rihaan chumii nihánj, gaa ne me síi guun rá rque nij rasuun ya rihaan soj cutumé soj, rá soj ga. Taj vaj síi guun rá qui'yaj danj a ma'.

12 Ne nuveé si'yaj ma'an ya soj me nij rasuun man rihaan chumii nihánj a man adonj. Ne sese ne guun nucuaj soj cutumé sa' soj nij rasuun man

rihaan chumiij nihánj, ne me síi guun rá rque rihaan soj rasuun guun si'yaj ma'an ya soj rej xta', rá soj ga. Taj síi guun rá qui'yaj danj ma'.

13 "Taj vaj síi guun nucuaj cutumé sa' si'yaj vij ru'vee ma'. Sese qui'yaj suun ní' rihaan vij ru'vee, ne nachri' ní' ni'yaj ní' man 'o ru'vee yo', ne caran' rá ní' ni'yaj ní' man yo'ó ru'vee yo' a. Se guun nucuaj ní' caran' rá ní' ni'yaj ní' man vij ru'vee ma'. Ne xa' soj, tzaj ne se ca'vee qui'yaj suun soj che'é Diose ne qui'yaj suun soj che'é nij rasuun man rihaan chumiij nihánj a ma' —taj Jesucristó rihaan nij síi tucu'yón se-nana so' a.

Nana nihánj taj xna'anj se vaa tumé nij síi fariseo cacun' rihaan se-tucuaj Moisés a

14 Dan me se nij síi fariseo ro', me síi aran' ndo'o rá ni'yaj sa'anj, ne gaa cuno nij so' cunudanj se-nana Jesucristó nana che'é rasuun man rihaan chumiij nihánj, gaa ne ca'nga' nacoo nij so' ni'yaj nij so' man Jesucristó a.

15 Gaa ne cataj Jesucristó rihaan nij so' a:

—Xa' soj, tzaj ne nuvi' cacun' tumé soj ni'yaj yuvij, 'yaj soj ma'. Tzaj ne Diose ro', me síi ne'en daj vaa nimán soj adonj. 'O se sa' uxrá vaa 'yaj yuvij, rá tuvi' yuvij, tzaj ne chi'ij ndo'o 'yaj nij yuvij, rá Diose nanj adonj.

16 "'O se gaa ataa ca'na' síi cu'naj Juan síi cuta' ne man yuvij me se cuno yuvij rihaan inanj se-tucuaj Moisés do', rihaan nij síi nata' se-nana Diose gaa naá do', tzaj ne yaj me se uno ndo'o yuvij nana sa' nana che'é güii guun chij Diose nimán yuvij man rihaan chumiij nihánj, ne me inanj rá

cunudañj nij yuvij cataj ma'an nij yuvij daj qui'yañj Diose asa' guun chij Diose adonj.

¹⁷ Tzaj ne ne nó xcúún ní' tanáj ní' a 'ó nana rqué Diose rihaan ní' canoco' ní' ma'. 'Q se ca'vee a doj quinavij rej xta' do', ca'vee a doj quinavij chumij nihánj do', tzaj ne se ca'vee quinavij a doj nana rqué Diose rihaan ní' canoco' ní' ma'.

¹⁸ Dan me se sese quirijij yo'o so' man nica so', ne sese xcaj so' man yo'ó chana, ne cutumé so' cacun', ne sese xcaj yo'o so' man chana quirijij chii man, ne cutumé so' cacun' uún adonj —taj Jesucristó rihaan nij síí fariseo yo' a.

Nihánj me cuentó nanó Jesucristó che'é ru'vee ne che'é 'o síí nique cu'naj Lázaro a

¹⁹ Gaa ne nanó Jesucristó cuentó nihánj a:

—Ru'vee me yo'o so', ne yatziñj sa' inañj cunuú so', ne daj a güii uun ndo'o nihaa sa' tucua so', ne guun niha' uxrá rá so' rihaan chumij nihánj a.

²⁰ Ne naj 'o síí nique cu'naj Lázaro rihaan yo'óo ta'yaa ve' tucua ru'vee yo', ne mán ndo'o luj xraá síí nique yo',

²¹ ne guun rá síí cu'naj Lázaro cha so' se quiniñj rihaan yo'óo rej chá ru'vee yo' chraa, tzaj ne daj doj chuvee ca'na' chavé luj xraá so' a.

²² "Dan me se gaa quisij güii cavi' síí nique yo', gaa ne nicaj nij se-mozó Diose man so' ca'anj so' rej sa', ne na'yaan síí cu'naj Abraham man so' a. Ne cavi' ru'vee uún, ne cachin' nii man so' a.

²³ Dan me se ca'anj so' rihaan ya'an, ne quiran' uxrá so' sayuun rihaan ya'an yo', gaa ne naxcaj so' rihaan so', ne quene'en so' se vaa gan' ndo'o ne

sí cu'naj Abraham, ne na'yaan Abraham man sí cu'naj Lázaro yo' a.

24 Gaa ne canacúun so' man sí cu'naj Abraham, cataj so': "Cunu 'ee rá so' manj, ataj Abraham. Ne ca'nej so' man sí cu'naj Lázaro se vaa ca'na' so' ne tiguíj so' raá ra'a so' rque na, ne tucuchree so' ra'a so' daa 'unj, gaa ne cunu cuíj doj raj qui'yaj so', ataj. 'O se na'aan ndo'o manj, 'yaj ya'an nihánj nanj á", taj ru'vee yo' rihaan sí cu'naj Abraham a.

25 "Tzaj ne cataj Abraham rihaan so': "Tzaj ne nanuj rá so', ta'nij, se vaa gaa gaa i'na' so' rihaan chumij ne nicaj so' inanj rasuun sa', ne Lázaro me se inanj rasuun chi'ij nicaj so' nanj á. Ne cuano nihánj me se uun niha' nimán so', ne ma'an so' me se ran' sayuun a.

26 Ne danj inanj uún, ne nuu 'o yu'uj cunu ndo'o rej ne ní', ne veé danj se ca'vee cuchí' yuvi man nihánj ndaa rej ne nij soj yo', ne sí man yo' se ca'vee ca'na' rej nihánj a ma'", taj Abraham rihaan ru'vee yo' a.

27 "Ne cataj ru'vee yo' rihaan Abraham a: "Che'é dan qui'yáá so' se ndo'o, ataj, ne ca'nej so' man sí cu'naj Lázaro ca'anj so' tucua réj,

28 ne vaa 'un' tinúj, ne me rá 'unj cataj xna'anj so' rihaan nij so' daj rán' 'unj nihánj, ne se ca'na' nij so' uún rej rán' 'unj sayuun nihánj a ma'", taj ru'vee rihaan Abraham a.

29 Gaa ne cataj Abraham rihaan so' a: "Vaa se-nana sí cu'naj Moisés do', se-nana nij sí nata' se-nana Diose gaa naá do', nicaj nij so' á. Ca'vee cunúj nij so' nana yo' ei", taj Abraham rihaan ru'vee a.

³⁰ “Se cuno nij so', man ataj Abraham. Tzaj ne sese ca'anj 'o sí cavi' rihaan nij so', gaa ne canicaj nimán nij so' canoco' nij so' chrej sa', raj a”, taj ru'vee rihaan Abraham a.

³¹ ”Tzaj ne cataj Abraham rihaan so' a: “Sese se ca'vej rá nij so' cuno nij so' rihaan sí cu'naj Moisés do', rihaan nij sí nata' se-nana Diose gaa naá do', ne ca'vee se cunu i'na' uún 'o sí cavi', tzaj ne se cuchumán rá nij so' ni'yaj nij so' man so' a ma'”, taj Abraham rihaan ru'vee yo' a. —Veé danj quisij cuentó nanó Jesucristó a.

17

Nana nihánj taj xna'anj se vaa no xcúún ní' racuj ní' man tinúú ní' se qui'yaj tinúú ní' cacun' a

¹ Gaa ne cataj Jesucristó rihaan nij sí tucu'yón se-nana so' a:

—Xa' chumii nihánj, tzaj ne man ndo'o chrej chi'ii canoco' yuvii, ne vaa ya'núj uxrá rihaan nij yuvii canoco' nij yuvii chrej chi'ii adonj. Tzaj ne nique sí 'yaj anoco' yuvii chrej chi'ii yo' adonj.

² Daj chihaa mój se cavii sa' so' ma'. Ne'en soj se vaa sese toco' vaj nii yujej xij váj 'núú trigó man chihá yo'o so', ne sese taguéj nii man so' rque na ya'anj, ne nij uxrá vaa ran' sí 'anj nij rque na ya'anj yo' nanj adonj. Tzaj ne nij doj quiran' sí qui'yaj chi'ii nimán yo'o tuvi' soj sí nica' nimán nanj á. 'O se quiran' so' sayuun nu' cavii nu' ca'anj nanj adonj.

³ ”Tumé uxrá soj man soj daj qui'yaj soj á. Sese qui'yaj tinúú so' cacun', ne cataj so' rihaan so' se vaa nij ndo'o qui'yaj so', ne sese canicaj nimán so'

ta_ná_j so' chrej chi'ii, ne cara_a x'naa so' che'é cacun' tumé so' ei.

⁴ Dan me se ca'vee se chij ya qui'yaj so' cacun' rihaan so' rque orún' güii, tzaj ne sese chij cuchì' so' rihaan so' ne cataj so' se vaa canicaj nimán so' ne nij vaa cacun' qui'yaj so' rá so', ne cara_a x'naa so' rihaan so' ei —taj Jesucristó rihaan nij síi tucu'yón se-na_na so' a.

Nana nihánj taj xna'anj che'é rasuun guun nu-cuaj ní' qui'yaj ní' sese cuchuman rá ní' ni'yaj ní' man Diose a

⁵ Gaa ne nij apóstol cune' Jesucristó man ro', cataj chuvij nij so' rihaan ma'an Jesucristó sij 'nij ra'a man ní' a:

—Cataj xna'anj so' rihaan núj daj qui'yaj núj, gaa ne doj a cuchuman rá núj ni'yaj núj Diose á —taj nij so' rihaan Jesucristó a.

⁶ Gaa ne cataj síi 'nij ra'a man ní' rihaan nij so' a:

—Sese daj se 'o snij cuchuman rá soj ni'yaj soj man Diose, ne sese ase vaa caân cuêj mostazá xlá gaa cuchuman rá soj, ne cataj soj rihaan chruun se vaa curihanj chruun yo'óó rej nicun' chruun ne ca'anj chruun canicun' chruun rque na ya'anj, ne cun_o chruun rihaan soj ei —taj Jesucristó rihaan nij so' a.

Nana nihánj taj xna'anj se vaa se ca'mii xta' ní' che'é suun qui'yaj suun ní' che'é Diose ma'

⁷ Gaa ne cataj uún Jesucristó rihaan nij apóstol cune' so' a:

—Sese vaa mozó nuu rihaan 'o tuvi' soj, ne sese 'yaj suun uxrá mozó uxra' mozó yo' yo'óó do', sese tumé mozó yo' daán soj xcuu do', ne daj cataj soj

rihaan mozó nuu rihaan soj asa' namán mozó yo' ca'anj qui'yaj suun mozó tacaan ga. Ne se cataj soj rihaan mozó yo' se vaa nu' naman mozó ne nu' cayáán mozó cha mozó chraa ma'. Daj chihaa mij se tu'va soj danj a ma'.

⁸ Maan se cataj soj: “Qui'yaj chuvií so' cha 'unj chraa, ne cuta' so' chraa do', na do', rihaan mesá rej cha 'unj chraa, ne rque so' nij rasuun achiin manj, ne asa' quisíj chaj chraa ga ne ca'vee cha so' chraa ne co'o so' na á”. Danj ca'mii soj rihaan se-mozó soj nanj á.

⁹ Ne se caráya'anj soj man mozó sese qui'yaj suun ndo'o mozó yo' suun ca'ne' soj rihaan mozó yo' ma'.

¹⁰ Ne ase vaa mozó nuu rihaan Diose vaa soj, ne che'é dan asa' quisíj qui'yaj suun soj nu' suun ca'ne' Diose rihaan soj, ne cataj soj se vaa mozó rmii me soj, ne inanj do' suun ataj Diose rihaan soj qui'yaj suun soj nanj adonj —taj Jesucristó rihaan nij so' a.

Nana nihánj taj xna'anj che'é síi samaritano síi nago' graciá rihaan Diose a

¹¹ Dan me se vaj Jesucristó chrej ca'anj chuman' Jerusalén, ne cachée so' chrej uun ran' estadó Samaria ga estadó Galilea,

¹² ne dan me se daj doj catuu so' 'o chuman', ne nari' tuvi' so' ga chi' síi ran' luj ri'yuj a. Ne gan' canicun' nij so',

¹³ ne nucaj canacúún nij so' man Jesucristó, ne cataj nij so':

—Cunuu 'ee rá so' man núj, maestró Jesucristó —taj nij so', caguáj nij so' a.

14 Gaa ne quene'en Jesucristó man nij so', gaa ne cataj Jesucristó rihaan nij so' a:

—Cavii soj ca'anj soj, ne tijaan soj man soj rihaan nij xrej á —taj Jesucristó rihaan nij so' a.

Dan me se cuno nij so' nana ca'mii Jesucristó, ne cavii nij so', ca'anj nij so', ne gaa vaj nij so' chrej, ne nahuun sa' cunudanj nij so' ta'aj chrej a.

15 Ne yo'o tuvi' nij so' ro', xcaj cuentá se vaa nahuun sa' so', gaa ne canicaj so' ca'anj so' rej vaj Jesucristó, ne nucuj ndo'o caguáj so' cataj so' se vaa sa' uxrá qui'yaj Diose ga so' a.

16 Ne gaa cuchi' so' rihaan Jesucristó, gaa ne canicun' ruj so' ne nago' so' graciá rihaan Jesucristó a. Ne sí samaritano sí yaníj ga nij yuvii israelitá me so' a.

17 Gaa ne cataj Jesucristó rihaan nij sí chéé ga so' a:

—Chi' ya yuvii nahuun sa', qui'yáj, raj a. Ne me rej vaj yo'ó uun nij sí nahuun sa', rá soj ga.

18 Ne a 'ó nij so' ne canicaj cataj se vaa sa' uxrá qui'yaj Diose che'é so' a ma'. Orún' sí yaníj nihánj me sí guun rá cataj daj qui'yaj Diose ga so' na' —taj Jesucristó, xná'anj so' man nij yuvii chéé ga so' a.

19 Gaa ne canicaj Jesucristó cataj Jesucristó rihaan sí samaritano yo':

—Naxumaan so', ne ca'anj so' á. Che'é se amán rá so' ni'yaj so' Diose ro', che'é dan aj nahuun sa' so' ei —taj Jesucristó rihaan so' a.

Nana nihánj taj xna'anj che'é güii guun che'e Diose guun chij Diose rihaan chumiü nihánj a

20 Dan me se xná'anj nij síí fariseo man Jesucristó me güii guun chij Diose rihaan chumiï nihánj a. Gaa ne cataj so' rihaan nij síí fariseo a:

—Taj che'é nì'yaj ndo'o soj ma'. Ca'vee se guun chij Diose rihaan chumiï nihánj, tzaj ne se quene'en yuviï ma'.

21 Ne se cataj nii: “Nì'yaj so' ei. Nihánj me guun chij Diose á. Yo' me rej guun chij Diose á”. Se ca'mii yuviï danj ma'. 'O se sca'núj ma'an soj vaj 'o síí 'yaj uun chij Diose adonj —taj Jesucristó rihaan nij síí fariseo a.

22 Gaa ne canicaj Jesucristó cataj so' rihaan nij síí tucul'ón se-nana so' a:

—Vaa güii guun ndo'o rá soj quene'en soj güii nihánj güii vaj 'unj sij ca'née Diose nìcay yu'unj man yuviï rihaan chumiï nihánj, tzaj ne se ca'vee quene'en soj manj ma'.

23 Gaa ne cataj yuviï rihaan soj: “Nì'yaj so' ei. Yo' me rej vaj Jesucristó ei”. Ne cataj uún yuviï: “Nì'yaj so' ei. Nihánj me rej vaj Jesucristó ei”, cataj yuviï rihaan soj a. Tzaj ne se cavii soj nano' soj manj ma'.

24 Dan me se ndaa rá se uun gaa raan rihaan chumiï nihánj, ne 'o chuguun nu' rihaan chumiï nihánj ro', ne ne'en cunudanj yuviï se vaa raan rihaan chumiï á. Ne ase uun rá soj ne'en soj gaa raan ro', danj guun rá soj asa' ca'ná' 'unj sij nìcay yu'unj man yuviï, ne quene'en nu' yuviï man rihaan chumiï nihánj se vaa ca'ná' 'unj adonj.

25 Tzaj ne vaa che'é quirán' 'unj que'ee sayuun asino yaan, gaa ne vaa che'é nachri' nij síí man rihaan chumiï nihánj nì'yaj nij so' manj a.

26 "Ne ase vaa qui'yaj yuvii gaa cayáán síí cu'naj Noé rihaan chumii ro', danj gaa qui'yaj uún yuvii asa' ca'na' uún 'unj sij ca'neé Diöse nıcaj yu'unj man yuvii rihaan chumii nihánj adonj.

27 Dan me se chá yuvii do', co'o yuvii do', ne xcaj tuvi' nij yuvii do', inanj danj qui'yaj nij yuvii ndaa quisıj güii catúj nij tuvi' síí cu'naj Noé rque rihoo xıj cheé rihaan na a. Gaa ne taj ni'yón caman' ndo'o, ne ca'na' na ya'anj, ne caráán na ya'anj xráá cunudanj nij so', ne cavi' nij so' a.

28 Ne ase vaa qui'yaj nij yuvii man chuman' cu'naj Sodoma gaa cayáán síí cu'naj Lot ro', danj qui'yaj uún yuvii asa' ca'na' uún 'unj rihaan chumii nihánj adonj. Dan me se chá nij so' do', co'o nij so' do', quiránj nij so' rasuun cutu'vej nij so' do', cunô nij so' naa do', cune' nij so' ve' do',

29 ne nu' curihanj síí cu'naj Lot chuman' Sodoma, ne nu' cavii ya'an rej xta' ga yo'óo azufre, cayuu yo' rihaan chuman' yo', ne cacaa nu' chuman' yo', ne cavi' cunudanj nij síí man chuman' yo' a.

30 Ne ase vaa ne xcaj nij yuvii man gaa naá cuentá se vaa quirán' nij so' sayuun ro', danj gaa uún yuvii asa' quisıj ca'na' uún 'unj sij nıcaj yu'unj man yuvii rihaan chumii nihánj adonj. 'O se ndaa sıj güii quene'en nij so' manj, gaa ne xcaj nij so' cuentá a.

31 "Ne güii guun danj me se xa' síí taj xráá ve' tucúa me se se ca'vee catuu so' rá ve' tucúa so' quirii so' si'yaj so' ma'. Ne síí nuu tacaan 'yaj suun tacaan ro', se canicaj so' nano' so' si'yaj so' ma'. Maan se yo'o cunanj nij so' á.

32 Vaa che'é nanuj rá soj daj quirán' nıca síí

cu'naj Lot gaa canicaj no' ni'yaj no' rej xco no', ne cavi' no' a.

³³ "Sí chu'vi' ndo'o cavi' rihaan chumiij nihánj ro', cavi' nu' so', ne sí cavi' ro', so' me sí gaa i'na' nimán nu' cavii nu' ca'anj adonj.

³⁴ "Cuanō nihánj me se cataj xna'anj 'unj rihaan soj a: Ne güii guun danj me se rej ni ro', quitaj roj nica roj so' cotoj roj so', ne nacaj se-mozó Diose man yo'o so', ne quinaj yo'ó so' a.

³⁵ Ne cunuû vij roj chana gaj roj no' 'núú trigó, ne nacaj se-mozó Diose man yo'o no', ne quinaj yo'ó no' a.

³⁶ Ne cunuû vij roj snó'o qui'yaj suun roj so' yo'ó, ne nacaj se-mozó Diose man yo'o so', ne quinaj yo'ó so' nanj adonj —taj Jesucristó rihaan nij so' a.

³⁷ Gaa ne xná'anj nij sí tucu'yón se-nana Jesucristó man so', ne:

—Ne me rej ca'na' so', ga Señor —taj nij so', xná'anj nij so' a.

Gaa ne cataj Jesucristó rihaan nij so' a:

—Aj ne'en soj daj 'yaj yachrúú vaj rej xta', ne ne'en ma'an xo' me rej naj nee cha xo' a. Taj sí nata' rihaan xo' me rej naj nee yo' ma'. Ne ase uun rá yachrúú ro', danj guun rá ma'an soj asa' ca'na' uún 'unj rihaan chumiij nihánj adonj. Quene'en ma'an soj sij man rihaan chumiij nihánj me rej ca'na' 'unj adonj —taj Jesucristó rihaan nij so' a.

18

Nihánj me cuentó che'é chana cavi' nica cachín ni'yaj ndo'o rihaan cuese a

1 Ne nanó Jesucristó cuentó nihánj rihaan nij síi tucu'yón se-nānā so', che'é rej guun rá so' xcaj nij síi tucu'yón se-nānā so' cuentá se vaa no xcuún nij so' niganj cachinj ni'yaj nij so' rihaan Diose, ne se guun rmij nij so' ma'.

2 Dan me se cataj Jesucristó a:

—'O cuese cayáán rque 'o chuman' me yo'o so', ne nuveé sij amán rá ni'yaj man Diose do', nuveé sij aráj cochroj rihaan yuvij do', me cuese yo' a.

3 Ne yáán 'o chana cavi' nica chuman' yo', ne guun che'e no' cachín ni'yaj no' rihaan so' se vaa qui'yaj so' sayuun man síi qui'yaj sayuun man no' a.

4 Ne a doj ne ca'vej rá so' racuj so' man no' a. Tzaj ne 'o güii me se guun rá ma'an cuese yo', ne: “Ca'vee se ne amán raj ni'yaj 'unj Diose do', ca'vee se ne aráj cochrój rihaan yuvij do',

5 tzaj ne che'é se guun rmij ndo'oj 'yaj chana cavi' nica nihánj, ne che'é dan ca'ne' cachrú 'unj cacun' che'é síi 'yaj sayuun man no', ne ca'vee a. Se taj, ne guun rmij xrée 'unj, qui'yaj no' vaa güii adonj”, guun rá cuese yo' a

6 —taj síi 'nij ra'a man ní', ne cataj uún so'— Xcaj soj cuentá daj ca'mii cuese vaa quij nimán yo' á.

7 Ne dan me se táá a nij síi narii Diose, ne nuvii nigan' aguáj ndo'o nij so', achín ni'yaj nij so' rihaan Diose, ne Diose, tzaj ne se ca'ne' Diose cacun' che'é nij síi 'yaj sayuun man nij so', rá soj na'. Guun raan ndo'o Diose ca'ne' so' cacun', rá soj na'. Se guun danj rá soj ma'.

8 'O se cataj xna'anj 'unj rihaan soj cuano se vaa ra'yanj uxrá ca'ne' Diose cacun' che'é nij síi 'yaj sayuun man nij síi narii so' man adonj. Tzaj ne

dan me se asa' ca'na' uún 'un̄j sij n̄icaj yu'unj man yuvii rihaan chumii nihánj, ne me daj yuvii amán rá ni'yaj man Diose narij ga —taj Jesucristó rihaan nij sí tucu'yón se-nan̄a so' a.

Nihánj me cuentó nanó Jesucristó che'é vij sí cachíin ni'yaj rihaan Diose a

⁹ Gaa ne nanó Jesucristó cuentó nihánj rihaan ta'aj yuvii guun rá se vaa sij sa' inanj me ma'an̄a nij so' ne nachri' nij so' ni'yaj nij so' man yo'ó yuvii a:

¹⁰ —Canicun' vij snó'o rá nuvií nocoo, cachíin ni'yaj roj so' rihaan Diose a. Yo'ó so' ro', me sí fariseo, ne yo'ó so' ro', me sí tiha' yu'unj man yuvii che'é puextó a.

¹¹ ”Dan me se canicun' sí fariseo yo', ne cachíin ni'yaj so', ne cataj so' nan̄a nihánj rihaan Diose a. 'O se ne ca'mii nucuaj so' ma'. Maan se rihaan ma'an̄a so' ca'mii so', cataj so': “Guun ni'yaj uxrá ní', Ataj Diose. Guun ni'yaj uxrá ní' se vaa ne 'yáá 'un̄j ndaa vaa 'yaj yo'ó nij yuvii ma'. Dan me se xa' nij so', tzaj ne sij tiha' yu'unj do', sij tumé cacun' do', sij otoj ga nica yo'ó yuvii do', me nij so', ne ne 'yáá 'un̄j danj ma'. Ne guun ni'yaj ní' se vaa ne 'yáá 'un̄j ndaa vaa 'yaj sí nihánj sí tiha' yu'unj man yuvii che'é puextó a.

¹² Ne vij ya aráj guee 'un̄j che'é se chá 'o 'o tunj güii, ne rqué 'un̄j 'o pesó rihaan daj a chi' pesó 'yaj canaán 'un̄j rihaan so' ei”, taj sí fariseo yo' rihaan Diose a.

¹³ ”Ne gan' doj tzin' nicun' sí a'nej puextó man yuvii yo', ne guun na'aj ndo'o so' ni'yaj so' man so' rihaan Diose, ne ne ca'vej rá so' naxcaj so' rihaan so' ni'yaj so' rej nicun' Diose a. Tzaj ne

go' so' se-cuxru' so' rucuaa ma'an so', ne cataj so':
 “Cunuu 'ee rá so' ni'yaj so' manj, Ataj Diose. 'O se
 sij tumé cacun' mej adonj”, taj so' rihaan Diose a.

14 ”Ne cuano nihánj me se cataj xna'anj 'unj
 rihaan soj se vaa gaa quinan' síi tiha' yu'unj man
 yuvii che'é puextó yo' tucua so', gaa ne aj cunuu sa'
 so' rihaan Diose nanj á. Tzaj ne yo'ó so' ro', taj ma'.
 'O se xa' síi me rá tacavii sa' man ma'an, tzaj ne
 quirj' so', ne guun na'aj so' a. Ne xa' síi naqui'yaj
 nica' nimán, tzaj ne cavii sa' ndo'o so' adonj —taj
 Jesucristó rihaan nij yuvii yo' a.

*Nana nihánj taj xna'anj me che'é caran' rá Jesu-
 cristó ni'yaj so' man ne'ej a*

15 Gaa ne nicaj nij yuvii man nij ne'ej ca'na' nij
 yuvii rihaan Jesucristó a. 'O se me rá nij yuvii
 cuta' Jesucristó ra'a so' raaj nij ne'ej che'é rej quirj'
 ne'ej xna'anj ni'yaj ne'ej a. Tzaj ne quene'en nij
 síi tucu'yón se-nana Jesucristó daj qui'yaj nij yuvii,
 gaa ne cataj xna'anj nij so' rihaan nij yuvii se
 vaa ne nó xcúún nij ne'ej ca'na' nij ne'ej rihaan
 Jesucristó a.

16 Tzaj ne canacúún Jesucristó man nij síi
 tucu'yón se-nana so', ne cataj Jesucristó rihaan nij
 so' a:

—Ca'ne' rá soj ca'na' nij ne'ej rihanj á. Se caráán
 soj chrej rihaan nij ne'ej mei. 'O se tucua nij síi
 vaa danj ro', me rej yanj Diose uun chij Diose nanj
 adonj.

17 Ya ya cataj xna'anj 'unj rihaan soj cuano se
 vaa síi na'vej rá guun chij Diose nimán, ndaa vaa
 a'vej rá ne'ej guun chij Diose nimán ne'ej ro', daj
 chihaa míj se cayáán so' ga Diose asa' guun chij

Diose rihaan chumij nihánj ma' —taj Jesucristó rihaan nij síi tucu'yón se-nana so' a.

Nana nihánj taj xna'anj che'é 'o síi me rá cayáán ga Diöse nu' cavii nu' ca'anj a

¹⁸ Dan me se xná'anj 'o síi nicaj suun yo' man Jesucristó, cataj so' rihaan Jesucristó a:

—Maestro. Síi sa' uxrá mé so' adonj. Daj qui'yáj, ne ca'vee cayánj ga Diöse nu' cavii nu' ca'anj ga —taj síi nicaj suun yo', xná'anj so' man Jesucristó a.

¹⁹ Gaa ne cataj Jesucristó rihaan so' a:

—Me che'é cataj so' se vaa síi sa' uxrá mej ga. 'O se orún' Diöse me síi sa' á.

²⁰ Ne aj ne'én so' nij nana nocoo ya ya nana cataj xna'anj Diöse se vaa canoco' ní' á. Dan me se taj nana yo': “Se cotoj so' ga chana nica yo'ó yuvij ma'. Se ticaví so' yuvij ma'. Se qui'yaj ituu so' si'yaj yo'ó yuvij ma'. Se nanó so' cuentó ne che'é yuvij ma'. Caraa cochróo so' rihaan rée so' do', rihaan níi so' do' á”. Yo' me nana cunó so' ei —taj Jesucristó rihaan síi nicaj suun yo' a.

²¹ —Asij gaa mej xnii me ve'é unó 'unj nu' nij nana yo' nanj á —taj so' rihaan Jesucristó a.

²² Gaa ne cataj Jesucristó rihaan so' a:

—Daj orún' rasuun achiin ya mán so' nanj ei. Dan me se cutu'vee so' cunudanj si'yáa so', ne sa'anj quirí so' ro', caxrii so' ston nij síi nique, ne cumán ndo'o si'yáa so' rej xta', qui'yaj Diöse nanj ei. Ne dan me se ca'na' so', ne canocó' so' manj, ca'anj ní' á —taj Jesucristó rihaan so' a.

²³ Dan me se cuno síi nicaj suun yo' nana nihánj, gaa ne quinano' ndo'o rá so' a. 'O se síi ru'vee ndo'o me so' a.

24 Dan me se ni'yaj Jesucristó man so', ne cataj Jesucristó:

—Sayuun uxrá vaa quisij nij síi vaa ndo'o sa'anj rihaan cayáán nij so' ga Diose asa' guun chij Diose rihaan chumii nihánj nanj adonj.

25 Dan me se ne'en soj se vaa sayuun ndo'o vaa cachén xcuu camelló yu'uj taj tacúún cúu nuvá, tzaj ne ca'vee a doj cachén xcuu yo' yu'uj taj tacúún cúu nuvá, ndaa rá se vaa síi ru'vee, ne se guun cachén ma'an síi ru'vee cayáán so' ga Diose asa' guun chij Diose rihaan chumii nihánj a ma' —taj Jesucristó a.

26 Gaa ne xná'anj nij síi cuno nana nihánj man Jesucristó, cataj nij so':

—Che'é dan me se me síi guun nucuaj quinanii rihaan sayuun ga —taj nij so', xná'anj nij so' man Jesucristó a.

27 Gaa ne cataj Jesucristó rihaan nij so' a:

—Xa' rasuun na'vee qui'yaj ma'an inanj yuvij, tzaj ne Diose me síi uun nucuaj qui'yaj nu' rasuun yo' adonj —taj Jesucristó rihaan nij so' a.

28 Gaa ne cataj Pedró rihaan so' a:

—Ne núj ga. Aj tanáj núj nu' si'yaj núj, ne canoco' núj mán so' á —taj Pedró rihaan Jesucristó a.

29 Gaa ne cataj Jesucristó rihaan nij so' a:

—Cuanó nihánj me se cataj yá 'unj rihaan soj se vaa síi tanáj ve' tucúa tanáj nica tanáj tinúú tanáj tuvi' tanáj ta'níi tanáj, che'é rej guun chij Diose rihaan chumii nihánj ro',

30 uxrá doj a rasuun quirí' uún so' gaa vaa i'na' so' rihaan chumii nihánj, ne asa' guun chij Diose rihaan chumii nihánj me se yo'o cayáán so' ga

Diose n̄u' cavii n̄u' ca'anj nanj adonj —taj Jesucristó rihaan nij so' a.

Nana nihánj taj xna'anj se vaa síj va'nuj cataj xna'anj Jesucristó se vaa cavì' so' ne cunu u'ina' uún so' a

³¹ Dan me se nicaj Jesucristó chuvij nij síi tucuyón se-nana so' ca'anj so', ne cataj so' rihaan nij so':

—Nihánj me ca'anj ní' chuman' Jerusalén, ne asa' cuchi' ní', ne quisij ya n̄u' nana cataj xna'anj nij síi nata' se-nana Diöse gaa naá che'é 'un̄j sij ca'néé Diöse nicaj yu'unj man yuvij,

³² ne dan me se tacuachén nii manj rihaan nij síi yaníj, ne ca'nga' nacoó nij so' quene'en nij so' manj, ne qui'yaj chi'ii nij so' manj, ne quirii talúj nij so' manj,

³³ ne go' nij so' quartá xráj, gaa ne ticavi' nij so' manj a. Gaa ne cachén va'nuj güii, gaa ne cunu u'ina' uún 'un̄j, qui'yaj Diöse ei —taj Jesucristó rihaan nij so' a.

³⁴ Ne ne quene'en uxrá nij so' me che'é ca'mii Jesucristó danj ma'. 'O se ne ca'vee xcaj nij so' cuentá che'é nana yo' ma'.

Nana nihánj taj xna'anj se vaa naxra' rihaan 'o síi tuchrii, qui'yaj Jesucristó a

³⁵ Dan me se gaa quinichrun' Jesucristó chuman' Jericó, ne yáán 'o síi tuchrii tu'va chrej, ne achíin so' caridad rihaan yuvij a.

³⁶ Dan me se cuno síi tuchrii yo' se vaa cachén ndo'o yuvij chrej rej ne so', ne che'é dan xná'anj so' man yuvij che'é rej vaj ndo'o yuvij chrej yo' a.

37 Gaa ne cataj xna'anj nii rihaan so' se vaa Jesucristó sí cavii chuman' Nazaret me sí achén rej ne nij so' a.

38 Gaa ne dan me se caguáj sí tuchrii yo', cataj so':

—Ya ya ta'níi ta'nij si'nō sí cu'naj David sí cane gaa naá mé so', Jesús. Cunuu 'ee rá so' manj ei —taj so', caguáj so' a.

39 Gaa ne cataj nij sí racuáj man so' chée so' se vaa se tu'va so' danj, maan se:

—Dínj gaa tu'vá so' á —taj nij so' rihaan sí tuchrii, tzaj ne doj a nucuaj caguáj so', cataj so':

—Ta'níi ta'nij si'nō sí cu'naj David mé so' ei. Cunuu 'ee rá so' manj ei —taj so', caguáj so' rihaan Jesucristó a.

40 Canicun' Jesucristó, ne canacúún Jesucristó man sí tuchrii se vaa racuáj nii man so' ca'na' so' rihaan Jesucristó a. Ne gaa quinichrun' sí tuchrii yo' rihaan Jesucristó, ne xná'anj Jesucristó man so', cataj Jesucristó rihaan so' a:

41 —Daj qui'yáj mán so', rá so' ga —taj Jesucristó, xná'anj Jesucristó man so' a.

—Curuvi' rihanj raj, Señor —taj so' rihaan Jesucristó a.

42 Gaa ne cataj Jesucristó rihaan so':

—Ca'vee curuvi' rihaan so' á. Maan che'é se amán rá so' ni'yaj so' manj ro', che'é dan nahuun sa' so' ei —taj Jesucristó a.

43 Ne nu' curuvi' rihaan so', gaa ne canoco' so' xcó Jesucristó, ne nata' so' se vaa sa' uxrá qui'yaj Diose ga so' a. Ne nu' nij yuvi quene'en daj quiran' so' cataj se vaa sa' uxrá qui'yaj Diose a.

19

Nana nihánj taj xna'anj daj qui'yaj síi cu'naj Zaqueo gaa guun rá so' quene'en so' man Jesucristó a

¹ Dan me se catúj Jesucristó chuman' Jericó, ne cachén so' chuman' yo',

² ne yáán 'o síi cu'naj Zaqueo chuman' yo', ne so' me síi uun chij rihaan nij síi tihá' yu'unj man yuvii che'é puextó, ne ru'vee ndo'o so' a.

³ Dan me se guun rá so' quene'en so' me síi me Jesucristó, tzaj ne ne ca'vee quene'en so', che'é se man ndo'o yuvii, ne síi chre' nii vaa síi cu'naj Zaqueo a.

⁴ Che'é dan yoo cunánj so' quitáa yaan so' rihaan nij yuvii, gaa ne cavii so' raá 'o chruun man chruj higó raá, che'é yan me rá so' quene'en so' man Jesucristó a. 'O se cachén Jesucristó tacóó chruun yo' a.

⁵ Dan me se gaa cuhi' Jesucristó tacóó chruun taj Zaqueo, ne ni'yaj Jesucristó raá chruun, ne cataj so' rihaan Zaqueo a:

—Nanij so' cuaj rihaan yo'óó, Zaqueo. 'O se vaa che'é ndo'o carán' 'unj ve' tucúa so' cuan' á —taj Jesucristó rihaan Zaqueo a.

⁶ Gaa ne yoo nanij Zaqueo rihaan yo'óó, ne guun niha' uxrá rá so' se vaa caran' Jesucristó tucúa so' a.

⁷ Dan me se cuno nij yuvii daj cataj Jesucristó, gaa ne nij ca'mii nij yuvii ni'yaj nij so' man Jesucristó a. Ne cataj nij so' che'é Jesucristó a:

—Nihánj me se caran' so' tucúa 'o síi tumé ndo'o cacun' adonj —taj nij yuvii ni'yaj nij so' man Jesucristó a.

⁸ Tzaj ne canicun' ma'an Zaqueo, cataj so' rihaan sí 'nij ra'a man ní' a:

—Cuanō nihánj me se rque 'unj yanej si'yáj rihaan nij sí nique, ne nij sí tiha' yu'unj 'unj man, tzaj ne naqui'yáj 'ó cunu' ca'anj narque 'unj rihaan nij so' se vaa ca'néj 'unj man nij so', Señor —taj so' rihaan Jesucristó a.

⁹ Gaa ne cataj Jesucristó rihaan so' a:

—Cuan' me se aj cavii sa' nij tucua sí nihánj, ndaa rá se vaa 'o ta'ní sí cu'naj Abraham gaa naá ro', danj vaa ma'an so' cuanō a.

¹⁰ 'O se ca'ná' 'unj sij nicaj yu'unj man yuvii che'é rej ca'vee nanō' 'unj man nij sí ca'anj ni'ya, ne cavii sa' nij so' qui'yáj adonj —taj Jesucristó rihaan nij so' a.

Nanā nihánj me cuentó nanó Jesucristó che'é sí racuj sa'anj rihaan se-mozó so' a

¹¹ Dan me se cuno nij sí man chuman' Jericó se-nanā Jesucristó, tzaj ne guun rá nij so' se vaa che'é se nichrun' Jesucristó chuman' Jerusalén, che'é dan ra'yanj guun chij Diosē rihaan chumii nihánj adonj, rá nij so', ne che'é dan guun che'e Jesucristó naqui'yaj Jesucristó yo'o cuentó nihánj, gaa ne ca'vee xcay nij yuvii cuentá a.

¹² Dan me se cataj so' a:

—Yo'o sí xna'anj ru'vee guun rá quinaj suun uun chij chiháán, ne guun rá so' ca'anj so' chuman' raa ne nata suun so' suun guun chij chiháán so', gaa ne canicaj so' naman so' chiháán so', rá so' a.

¹³ Gaa ne canacúún so' man chij' nij se-mozó so' ca'na' rihaan so', gaa ne rque so' 'o sa'anj mina rihaan 'o 'o nij so', ne cataj xna'anj so' rihaan nij

so' se vaa qui'yaj suun nij so' ga sa'anj, ne tanaca nij so' man sa'anj, ne ndaa quisij güii naman uún so', gaa ne nuchruj nij so' cuentá, taj so' a. Danj ca'mii so', gaa ne cavii so' ca'anj so' a.

14 "Tzaj ne nij síi man chiháan so' ro', quitáa ri'yunj man so', ne che'é dan ca'née nij so' síi ca'anj suun ca'anj cataj xna'anj rihaan síi nicaj suun rej ca'anj síi xna'anj ru'vee yo' se vaa ne ca'vej rá nij so' guun chij síi xna'anj ru'vee yo' rihaan nij so' a.

15 "Dan me se ya qui'yaj canaán síi xna'anj ru'vee yo' guun chij so' chiháan so', gaa ne gaa namán so', ne cataj xna'anj so' se vaa nacunj nii man chi' nij se-mozó so' nij síi rqué so' sa'anj rihaan a. 'Q se guun rá so' xcaj so' cuentá me daj sa'anj qui'yaj canaán nij so' a.

16 "Dan me se síi ca'na' asino yaan rihaan so' ro', cataj: "Xa' sa'anj mina rqué so' manj, tzaj ne qui'yaj canaán 'unj 'ó chi' sa'anj mina uún, qui'yaj sa'anj yo', señor", taj so' rihaan síi xna'anj ru'vee yo' a.

17 Gaa ne cataj síi xna'anj ru'vee yo' rihaan mozó yo': "Cunaj uxrá qui'yáa so' á. Mozó sa' inanj mé so' ei. Che'é dan guun chij so' rihaan chi' ya chuman', qui'yáj a", taj síi xna'anj ru'vee rihaan mozó sa' yo' a.

18 "Dan me se ca'na' uún yo'ó mozó, cataj so': "Xa' sa'anj mina rqué so' manj, tzaj ne qui'yaj canaán 'unj yu'un' sa'anj mina uún, qui'yaj sa'anj yo', señor", taj so' rihaan síi xna'anj ru'vee yo' a.

19 Ne cataj síi xna'anj rihaan so': "Gaa ne guun chij so' rihaan 'un' ya chuman' nanj ei", taj so'

rihaan yo'ó mozó yo' a.

20 ”Dan me se ca'na' yo'ó so' uún, ne cataj so': “Nihánj me nacaj so' se-sa'anj so', señor. 'O se caraa sa' 'unj man yo' rque 'o vitó,

21 ne cuchu'ví' 'unj ni'yaj 'unj mán so', che'é se sij sca' ndo'o nimán mé so', ne naxcaj so' rasuun rej nuvi' rasuun cutá' so', ne yo'ó yuvi unô caân, ne so' me se, ne ma'án so', ne rii so' naa adonj”, taj mozó yo' rihaan síi xna'anj ru'vee yo' a.

22 ”Gaa ne cataj síi xna'anj ru'vee rihaan mozó yo': “Mozó chi'ii nimán mé so' ei. Cutá' 'unj cacun' xráá so' che'é nana tu'va ma'án so' á. 'O se quene'én so' se vaa sij sca' ndo'o nimán mej, ne quene'én so' se vaa naxcaj 'unj rasuun rej nuvi' rasuun cutaj, ne quene'én so' se vaa yo'ó yuvi unô caân ne 'unj rii naa nanj á.

23 Che'é dan me che'é ne tacuachén so' se-sa'anj 'unj rihaan nij síi nuta' sa'anj ga. Gaa ne gaa ca'ná' 'unj, ne nacaj 'unj se-sa'anj 'unj ga sa'anj nata' raá yo' ga”, taj síi xna'anj ru'vee yo' rihaan mozó rmii yo' a.

24 Gaa ne cataj so' rihaan yo'ó nij síi nicun' ga so' a: “Ca'nee soj sa'anj nicaj mozó chi'ii nihánj, ne tacuachén soj rihaan síi nicaj chi' sa'anj mina yo' á”, taj síi xna'anj ru'vee yo' rihaan yo'ó nij so' a.

25 “Tzaj ne aj nicaj so' 'o chi' vaa guee á”, cataj nij so' rihaan síi xna'anj ru'vee yo' a.

26 “Taj se 'yaj ma'. Cuanó nihánj me se cataj xna'anj 'unj rihaan soj se vaa síi ne'en sa' qui'yaj suun rihanj ro', ne vaa güii, ne doj a guun nucuaj so' qui'yaj suun so' adonj. Ne síi ne ne'en qui'yaj suun rihanj ro', ca'nee 'unj suun le'ej nii atá so',

ne quinaj uun so' adonj", taj sí xna'anj ru'vee yo' rihaan nij so' a.

27 Gaa ne cataj uún so': "Tzaj ne xa' nij sí taj ri'yunj manj sí ne ca'vej rá guun chij 'unj rihaan, tzaj ne nıcaj soj man nij so' ca'na' soj rihanj, gaa ne ticavi' soj man nij so' rihanj nihánj ei", taj uún so' a.

28 —Veé danj quisıj cuentó nanó Jesucristó a.

Gaa ne cavii so' ca'anj so' chuman' Jerusalén, ne táa yaan so' rihaan nij sí tucu'yón se-nana so' a.

Nana nihánj taj xna'anj daj qui'yaj Jesucristó gaa catúj Jesucristó chuman' Jerusalén a

29 Dan me quinichrun' Jesucristó roj chuman' cu'naj Betfagé ga Betania a. Naj roj chuman' yo' tacóo quij cu'naj Quij man Chruun Olivó a. Gaa ne ca'née Jesucristó man vij tuvi' nij sí tucu'yón se-nana so' ca'anj rque chuman' Betfagé,

30 ne cataj so' rihaan roj so' a:

—Cavii roj soj ca'anj soj, ne catuu roj soj chuman' nihánj chuman' naj rihaan ní', ne asa' catúj roj soj, ne nari' roj soj man yo'o burró le'ej ya'anj numii a. Dan me se nache roj soj man xo', ne nıcaj roj soj ca'na' roj soj rihanj nihánj á.

31 Ne sese xna'anj nii man roj soj me che'é nache roj soj burró, ne cataj roj soj: "Sí' 'nij ra'a man ní' achiin xcuu nihánj rihaan chuguanj", cataj roj soj á —taj Jesucristó rihaan roj sí tucu'yón se-nana so' a.

32 Dan me se ca'anj roj so', ne catúj roj so' chuman' yo', ne nari' roj so' man burró le'ej, ndaa vaa cataj xna'anj Jesucristó rihaan roj so' a.

33 Ne gaa nache roj so' man burró, ne xna'anj nij sí daan burró man roj so' a:

—Me che'é nache soj burró ga —taj nij so', xná'anj nij so' man roj so' a.

³⁴ Gaa ne cataj roj so' rihaan nij síi daan burró a:

—Síi 'nij ra'a man ní' achiin xcuu nihánj rihaan chuguanj —taj roj so' a.

³⁵ Gaa ne nicaj roj so' xcuu ca'na' roj so' rihaan Jesucristó, ne cuta' roj so' sagan' roj so' xráá burró, ne tacavii roj so' man Jesucristó xráá burró yo',

³⁶ ne gaa vaj Jesucristó, ne cuchruj ndo'o nij yuvij yatzij sagan' nij so' rá chrej, ne achén Jesucristó ga burró yo' rihaan yatzij a.

³⁷ Dan me se quinichrun' Jesucristó chuman' Jerusalén, ne vaj so' tacóó Quij man Chruun Olivó rej vaj nij chrej, ne guun che'e que'ee nij síi tucu'yón se-nana so' guun niha' rá nij so', ne aguáj nij so', ca'mii sa' nij so' che'é Diosé che'é nu' nij suun sa' nocoo qui'yaj Jesucristó quene'en nij so' a.

³⁸ Dan me se cataj nij so':

—Cunaj uxrá vaa ca'na' síi ca'née síi 'nij ra'a man ní' ei. Síi nicaj suun rey uun chij rihaan ní' me so' ei. Ve'é cayáán Diosé síi nicun' xta' á. Cunaj uxrá 'yaj so' ei —taj nij yuvij, caguáj nij so' a.

³⁹ Dan me se ta'aj nij síi chée ga Jesucristó me síi fariseo, ne ta'aj nij so' cataj rihaan Jesucristó a:

—Cataj xna'anj so' rihaan nij síi tucu'yón se-nana so' se vaa ca'ne' rá nij so' ga nana vaa danj á —taj nij so' rihaan Jesucristó a.

⁴⁰ Gaa ne cataj so' rihaan nij so' a:

—Cataj xna'anj 'unj rihaan soj cuano se vaa sese dínj gaa tu'va nij síi aguáj nana vaa danj, ne ma'an nij yahij naj rihaan yo'óo nihánj caguaj nana vaa

danj asuun nanj adonj —taj Jesucristó rihaan nij síí fariseo yo' a.

⁴¹ Ne gaa quinichrun' Jesucristó chuman' Jerusalén yo', ne ta'vee Jesucristó che'é chuman' yo',

⁴² ne cataj so':

—Güii cuan' me se me inanj raj quene'en soj sij man chuman' Jerusalén daj qui'yaj soj ne ca'vee dínj cayáán soj, tzaj ne cuano nihánj me se se ca'vee xcaj soj cuentá ma'.

⁴³ Dan me se quisij ya güii, ne ca'na' nij síí taj ri'yunj man soj, ne cune' nij so' chingá nu' anicaj chiháán soj, ne tucuachriin nij so' man soj, ne se ca'vee curihanj soj, qui'yaj nij so' ma'.

⁴⁴ Ne tucuanee nij so' nu' chiháán soj, ne cavi' soj, ne a' ó yuvej se quitáá xráa tuvi' yuvej, qui'yaj nij so' ma'. Danj quiran' soj, che'é se gaa guun rá Diose racuíj Diose man soj, ne ne xcaj soj cuentá ma' —taj Jesucristó ni'yaj so' man nij síí man chuman' Jerusalén yo' a.

Nana nihánj taj xna'anj se vaa quirii Jesucristó man nij yuvií tu'vej rasuun rá nuvií nocoo a

⁴⁵ Gaa ne catúj Jesucristó rá nuvií nocoo, gaa ne guun che'e so' quirii so' man nu' nij yuvií tu'vej rasuun man rá nuvií nocoo a.

⁴⁶ Ne cataj so' rihaan nij so' a:

—Danj Diose taj se vaa tucúa Diose me rej na'víj yuvií rihaan Diose á. Tzaj ne guun tucua síí ituu man tucúa Diose nihánj, qui'yaj soj nanj á —taj Jesucristó rihaan nij yuvií quirii so' a.

⁴⁷ Ne dan me se daj a güii nicun' Jesucristó rá nuvií nocoo, tucu'yón Jesucristó se-nana so' rihaan

yuvii, tzaj ne nij xrej atā suun nocoo doj do', nij síí naqui'yaj cūu se-tucuanj Moisés rihaan yuvii do', nij síí uun chij rihaan nij yuvii israelitá do', nano' uxrá nij so' daj qui'yaj nij so' gaa ne ca'vee cavi' Jesucristó a.

⁴⁸ Tzaj ne ne nari' nij so' daj qui'yaj nij so' cavi' Jesucristó ma'. 'O se guun niha' uxrá rá nij yuvii cuno nij so' se-nana Jesucristó a.

20

Nana nihánj taj xna'anj se vaa xná'anj nii man Jesucristó me síí ca'ne' suun rihaan so' qui'yaj so' ndaa vaa 'yaj so' a

¹ Dan me se 'o güii nicun' Jesucristó rá nu-vii nocoo, tucu'yón Jesucristó rihaan yuvii, ne nata' so' se-nana so' nana sa', ne nicun' xrej atā suun nocoo doj nicun' síí naqui'yaj cūu se-tucuanj Moisés nicun' síí uun chij nicun' rej tucu'yón Jesucristó a.

² Gaa ne cataj nij so' rihaan Jesucristó a:

—Me síí ca'ne' suun rihaan so' qui'yáa so' ndaa vaa 'yáa so' ga —taj nij so', xná'anj nij so' man Jesucristó a.

³ Gaa ne cataj Jesucristó rihaan nij so' a:

—Ne vaa yo'o nana me raj xna'anj 'unj man nij soj, ne cataj soj rihanj á.

⁴ Dan me se me síí ca'ne' suun rihaan síí cu'naj Juan cuta' ne so' man yuvii, rá soj ga. Ma'an Juan cavii raá na'. Ase Diose cataj xna'anj rihaan so' xa'. Cataj xna'anj nij soj rihanj ei —taj Jesucristó rihaan nij so' a.

⁵ Gaa ne nuchruj raá ndo'o nij so' ga tuvi' nij so' a:

—Ne sese cataj ní' se vaa Diose ca'ne' suun rihaan sí' cu'naj Juan cuta' ne so' man yuvii, ne cataj Jesucristó rihaan ní' me che'é ne cuchuman rá ní' nana ca'mii Juan, cataj so' a.

⁶ Tzaj ne sese cataj ní' se vaa nuveé sij ca'ne' Diose suun rihaan me sí' cu'naj Juan, ne go' cunudanij nij yuvii yahij man ní' a. 'O se cuchumán rá nij yuvii se vaa sí' nata' se-nana Diose me sí' cu'naj Juan a —cataj nij so' ga tuvi' ma'an nij so' a.

⁷ Gaa ne cataj nij so' rihaan Jesucristó se vaa ne ne'en nij so' me sí' ca'ne' suun rihaan sí' cu'naj Juan cuta' ne so' man yuvii a.

⁸ Gaa ne cataj Jesucristó rihaan nij so' a:

—Che'é dan se cataj xna'anj 'unj rihaan nij soj me sí' ca'ne' suun rihanj qui'yáj ndaa vaa 'yáj ma' —taj Jesucristó rihaan nij so' a.

Nana nihánj me cuentó nanó Jesucristó che'é yuvii chí'ii 'yaj suun rihaan yo'óo a

⁹ Gaa ne guun che'e Jesucristó nanó so' cuentó nihánj rihaan nij yuvii a.

—Dan me se chruj yo'o so' yo'o naa chruj uvá a. Gaa ne tanáj so' man naa yo' rihaan sí' qui'yáj suun naa yo', ne curihanj so' ca'anj so' gan' que'ee yavii a.

¹⁰ Ne 'o güii ca'née so' man yo'ó se-mozó so' ca'anj so' rihaan nij sí' nuu tumé xnaa so' a. 'O se me rá so' rque nij sí' nuu tumé naa doj chruj uvá rihaan yo'ó mozó yo', tzaj ne a doj chruj ne rque nij sí' nuu tumé naa rihaan yo'ó mozó yo' ma'. Maan se go'ndo'o nij so' xraá so', ne quirii nij so' man so' rque naa yo' a.

11 Che'é dan ca'néé sí to'oj naa yo' man yo'ó mozó uún, tzaj ne nij sí nuu tumé naa ro', go' uún nij so' xráá mozó uún, ne nij uxrá qui'yaj nij so' man so', ne quirii nij so' man so' rque naa, ne a doj chruj ne rque nij so' man mozó yo' a ma'.

12 Gaa ne ca'néé uún sí xnaa yo' yo'ó mozó uún, tzaj ne quiran' chi'ii ndo'o so', qui'yaj nij sí nuu tumé naa, ne quirii nij so' man so' xe' a.

13 ”Gaa ne guun rá sí xnaa yo': “Daj qui'yáj yaj ga. 'O se ca'nej 'unj ma'an ta'níj sí 'ee raj man á. Caraa cochroj nij so' rihaan ta'níj sese ca'anj ta'níj saj xee”, guun rá sí xnaa, ne ca'néé so' man ta'níi ma'an so' ca'anj a.

14 Dan me se quene'en nij sí nuu tumé naa se vaa 'na' ta'níi sí xnaa, gaa ne nuchruj raa nij so' ga tuvi' nij so' daj qui'yaj nij so', taj nij so' a: “Sí nihánj me sí guun xnaa man naa nihánj vaa güii ei. Che'é dan ticavi' ní' man so', ne vaa güii, ne guun xnaa ma'an ní' man naa nihánj chuguanj”, taj nij so' rihaan tuvi' nij so' a.

15 Gaa ne quirii nij so' man ta'níi sí xnaa yo' xe', ne ticavi' nij so' man ta'níi sí si'yaj naa nanj adonj. Che'é dan daj qui'yaj sí si'yaj naa yo' man nij sí nuu tumé xnaa so', rá nij soj ga.

16 'O se ca'na' so' vaa güii, ne ticavi' so' man nij sí nuu tumé naa yo', ne tacuachén so' xnaa so' rihaan yo'ó sí tumé man xnaa so' nanj adonj —taj Jesucristó rihaan nij yuvii a.

Gaa cuno nij yuvii nana nihánj, ne cucu'vi' ndo'o nij so', ne cataj nij so':

—Orún' raa Diose me sí nacaj man núj rihaan sayuun yo' nanj chuguanj —taj nij so' rihaan Jesu-

crístó a.

¹⁷ Gaa ne ni'yaj Jesucristó man nij so', ne xná'anj Jesucristó man nij so' a:

—Che'é dan me se me che'é nó nana nihánj rihaan danj Diose, rá nij soj ga: “Yuvej quiri'íj nij sí cune' ve' ro', guun yuvej sa' doj rihaan cunudanj nij yuvej man tacóo ve' yo' nanj adonj”, taj danj Diose a.

¹⁸ Ne yuvej yo' me se ase vaa yuvej yo' vaa 'unj, ne ase vaa yuvii tíxé yuvej yo' vaa yuvii na'vej rá cunó rihaan 'unj, ne uxrá quiran' nij so' sayuun nanj adonj. Ne ase vaa yuvii quiniy yuvej yo' xráa vaa nij yuvii qui'yáa 'unj sayuun man, ne yuun che'e quinavij nij so' nu' cavii nu' ca'anj nanj adonj —taj Jesucristó a.

¹⁹ Gaa ne guun rá nij sí naqui'yaj cuu se-tucuanj Moisés rihaan yuvii guun rá nij xrej ata suun nocoo doj guun rá quita'aa ra'yanj man Jesucristó, tzaj ne chu'vi' nij so' ni'yaj nij so' man nij yuvii a. Quene'en nij so' se vaa che'e ma'an nij so' me cuentó nanó Jesucristó a. Ase vaa nij sí nuu tumé naa vaa ma'an nij so' rihaan Jesucristó, ne quene'en nij so' se vaa che'é dan nanó Jesucristó cuentó yo' a.

Nana nihánj taj xna'anj che'é puextó go' ní rihaan gobiernó do', che'é se rque ní rihaan Diose do' a

²⁰ Dan me se cutumé ndo'o nij sí naqui'yaj cuu se-tucuanj Moisés rihaan yuvii do', nij xrej ata suun nocoo doj do', man Jesucristó daj ca'mii so' a. Ne go' nij so' sa'anj rihaan doj tuvi' nij so' sí tiha' yu'unj cuchí' nij so' rihaan Jesucristó, ne qui'yaj nij so' ndaa vaa 'yaj sí vaa sa' sí me rá xna'anj

nana man so' a. 'O se guun rá nij so' cuta' nij so' cacun' xráá Jesucristó che'é nana ca'mii so', gaa ne ca'vee tacuachén nij so' man Jesucristó rihaan síi nicaj suun procurador a.

²¹ Dan me se xná'anj nij síi tiha' yu'unj yo' man Jesucristó a:

—Ne'en núj se vaa nana nica inanj a'mii so' ne tucu'yón so' do', maestro. Ne 'o cuyaan vaa cunudanj yuvii rihaan so' chuguanj. Ne ya tucu'yón so' rihaan yuvii daj qui'yaj yuvii canoco' yuvii man Diose, maestro.

²² Dan me se nó xcúún ní' go' ní' puextó rihaan síi nicaj suun gobiernó na'. Ase se go' ní' xa' —taj nij síi tiha' yu'unj, xná'anj nij so' man Jesucristó a.

²³ Tzaj ne caxrij rá Jesucristó se vaa me rá nij so' tiha' yu'unj nij so' man so' a. Che'é dan cataj Jesucristó nana nihánj rihaan nij so' a:

²⁴ —Tihaan soj sa'anj aga' ni'yaj ní' á —taj Jesucristó rihaan nij so' a.

Gaa ne gaa tihaan nij so' sa'anj aga' yo' rihaan Jesucristó, gaa ne cataj Jesucristó:

—Me síi nó rihaan sa'anj aga' nihánj ga. Ne me síi se-chuvii nó rihaan sa'anj aga' nihánj ga —taj Jesucristó, xná'anj so' man nij síi me rá tiha' yu'unj yo' a.

—Síi nicaj suun gobiernó me nó rihaan sa'anj aga' yo', ne nó se-chuvii so' rihaan sa'anj ei —taj nij so' a.

²⁵ Gaa ne cataj Jesucristó rihaan nij so' a:

—Che'é dan go' soj si'yaj síi nicaj suun gobiernó rihaan ma'an so', ne rque soj si'yaj Diose rihaan Diose á —taj Jesucristó a.

26 Gaa ne ne guun nucuaj nij sí tiha' yu'unj yo' cuta' nij so' cacun' xráa Jesucristó che'é se-nana so' ma'. 'O se cuno cunudanj nij yuvii daj ca'mii nij so', gaa ne ca'anj ndo'o rá nij yuvii cuno nij so' se-nana Jesucristó, ne ca'ne' rá nij so' nanj adonj.

Nana nihánj taj xna'anj se vaa ya cunuu i'na' uún nij sí cavi' a

27 Dan me se cuchi' doj nij sí saduceo rihaan Jesucristó a. Nij sí saduceo ro', a'mii nana nihánj se vaa daj chihaa mǐj se cunuu i'na' uún yuvii asa' cavi' yuvii, taj nij so' a.

28 Dan me se xná'anj nij so' man Jesucristó, ne cataj nij so' nana nihánj a:

—Cachrón sí cu'naj Moisés nana nihánj rihaan yanj, che'é rej cuno ní' nana nihánj a: “Sese cavi' yo'o sí vaa nica, ne sese taj vaj ta'níi so', ne no xcúún tinúú so' xcaj tinúú so' man choco' so' chana quináj, ne cotoj tinúú sí cavi' ga choco' so', ne cuchruj no' ne'ej, ne guun ta'nij sí cavi' man ne'ej yo', ne cunuú ne'ej yo' rihaan to'óó sí cavi' yo' a”, taj sí cu'naj Moisés gaa naá, maestro.

29 Dan me se vaa chij nij tinuj 'o nij so' a. Sí chava' ro', xcaj man chana, tzaj ne cavi' so', ne taj vaj ne'ej cuchruj chana nica so', qui'yaj so',

30 ne che'é dan xcaj scue'ee sí cavi' yo' man choco' so' chana quináj, tzaj ne cavi' so' uún, ne xcaj scue'ee so' uún man chana, tzaj ne cavi' so' uún,

31 ne dan me se quisíj xcaj nu' chij nij tinuj nij so' man orún' chana yo', tzaj ne taj vaj a 'ó ne'ej cuchruj chana yo', qui'yaj nij so' ma'. Ne cavi' taran' nij so' nanj adonj.

32 Sij, gaa ne cavi' ma'an chana yo' uún,

33 ne dan me se asa' cunuu i'na' uún nij sí cavi',
 gaa ne me nij tinuj nij so' nica' man chana yo', rá
 so' ga. 'O se gaa vaa i'na' nij so', ne nica' taran' nij
 tinuj nij so' guun orún' no' a —taj nij sí saduceo,
 xná'anj nij so' man Jesucristó a.

34 Gaa ne cataj Jesucristó rihaan nij so' a:

—Xa' nij yuvij man rihaan chumij nihánj cuano,
 tzaj ne uchruj nij so' sa'anj do', xcaj tuvi' nij so' do',

35 tzaj ne ino qui'yaj nij yuvij cunuu i'na' uún
 cayáan ga Diose asa' cunuu naca uún chumij
 nihánj nanj á. 'O se rej yanj Diose me se taj yan vaj
 sí xcaj tuvi' yo' ma'.

36 'O se danj nanj uún, ne taj yan vaj sí cavi' uún
 rej yo' ma'. 'O se ase vaa nij se-mozó Diose ro', danj
 gaa nij so', ne cyaan gaa nij so' ga nij se-mozó
 Diose, ése ta'nij Diose me nij so', ne sij aj cavi' ne
 cunuu i'na' uún me nij so' adonj.

37 "Ne ma'an sí cu'naj Moisés me sí cataj
 xna'anj asino yaan se vaa ca'vee cunuu i'na' uún
 nij sí cavi' ndaa vaa nari' so' gaa canicun' so'
 rihaan yan nicun' 'o coj aco' ya'an raá a. Dan me se
 cataj so' se vaa sí 'nij ra'a man ní' ro', me Diose sí
 noco' nij sí man gaa naá sí cu'naj Abraham do',
 sí cu'naj Isaac do', sí cu'naj Jacobo do' a.

38 Dan me se nuveé se-Diose nij xngá me
 Diose ma'. Inanj nij sí vaa i'na' a'vee noco' man
 Diose nanj adonj. Che'é dan, nda' se sí cane gaa
 naá me va'nuj nij so', tzaj ne vaa i'na' nij so' rihaan
 Diose nanj ei. 'O se vaa i'na' cunudanj yuvij ni'yaj
 Diose nanj adonj —taj Jesucristó rihaan nij so' a.

³⁹ Gaa ne ta'aj nij sí naqui'yaj cuu se-tucuanj Moisés rihaan yuvii ro', cataj rihaan Jesucristó a:

—Cunaj uxrá ca'mii so', maestro —taj nij so' a.

⁴⁰ 'O se ne quisij rá nij so' xna'anj nij so' doj nana man Jesucristó a ma'.

Nana nihánj taj xna'anj se vaa sí ca'nej Diose t̄inanii man yuvii rihaan sayuun ro', nuvéé nanj yuvii me so' ma'

⁴¹ Gaa ne cataj Jesucristó rihaan nij so' a:

—Me che'é taj nij soj se vaa nanj ta'níi ta'nij si'no sí cu'naj David sí cane gaa naá me sí ca'nej Diose t̄inanii man yuvii rihaan sayuun ga.

⁴² 'O se nó se-nana ma'an sí cu'naj David rihaan yanj no chra' qui'yaj so', se vaa cataj so':

⁴³ “Ca'mii Diose sí 'nij ra'a man ní' rihaan sí 'nij ra'a manj, cataj so' se vaa cayáán sí 'nij ra'a manj x'núú Diose rej nuva' Diose ndaa se quisij qui'yaj canaán Diose rihaan taran' nij sí taj ri'yunj man sí 'nij ra'a manj ne quirii ta'nga' sí 'nij ra'a manj rihaan nij so' adonj”, taj sí cu'naj David yo' a.

⁴⁴ Dan me se sí 'nij ra'a man sí cu'naj David me sí ca'nej Diose t̄inanii man yuvii rihaan sayuun, taj sí cu'naj David yo' a. Sese 'nij ra'a so' man David, gaa ne me che'é taj soj se vaa nanj ta'níi ta'nij si'no David me so' ga. Taj che'é cataj soj se vaa nanj yuvii me so' ma' —taj Jesucristó rihaan nij sí naqui'yaj cuu se-tucuanj Moisés a.

Nana nihánj taj xna'anj che'é cacun' tumé nij sí naqui'yaj cuu se-tucuanj Moisés rihaan yuvii a

⁴⁵ Gaa ne ca'mii so' nana nihánj rihaan nij sí tucu'yón se-nana so', ne cuno cunudanj nij yuvii daj ca'mii so' a:

46 —Xcaj nij soj cuentá daj 'yaj nij síí naqui'yaj cuu se-tucuañj Moisés rihaan yuvií, ne tumé soj man soj se gaa nanj qui'yaj soj ndaa vaa 'yaj nij so' á. Dan me se niha' rá nij so' cunuú nij so' yatzíj sa' xcaan cachee nij so' rej quene'en yuvií man nij so', ne aran' rá nij so' se vaa ca'mii sa' yuvií ga nij so' gaa chéé nij so' rihaan yu'vee a. Ne uun rá nij so' quitaj nij so' chruun xlá sa' doj gaa 'anj nij so' ve' nuu chre' ní' tucu'yón ní' se-tucuañj Moisés do', gaa 'anj nij so' cha'anj do' a.

47 Ne a'néj nij so' ve' tucua chana cavi' nica, ne yuun che'e guun tucua nij so' man ve' yo', ne 'yaj xcaan ndo'o nij so' cuentó achín ni'yaj nij so' rihaan Diose, che'é rej sa' doj guun nucuaj nij so' tihá' yu'unj nij so' man yuvií a. Xa' nij so', tzaj ne che'é se vaa 'yaj nij so' ro', che'é dan doj a gaa sayuun quiran' nij so' qui'yaj Diose, asa' ca'ne' Diose cacun' che'é yuvií adonj —taj Jesucristó rihaan nij síí tucu'yón se-nana so' a.

21

Nana nihánj taj xna'anj che'é chana nique cavi' nica qui'yaj sa' doj rihaan nij ru'vee, ni'yaj Diose a

¹ Dan me se ni'yaj Jesucristó, ne quene'en so' se vaa araa ndo'o nij síí ru'vee sa'anj rque chrúun taj rihaan nuvií nocqo che'é Diose a.

² Ne quene'en so' 'o chana cavi' nica chana nique se vaa caraa no' vij guee sa'anj aga' le'ej rque chrúun yo',

³ ne cataj so':

—Cataj xna'anj yá yá 'unj rihaan nij soj cuano se vaa xa' chana cavi' nica chana nique nihánj, tzaj

ne doj a caraa no' sa'anj rque chrúún yo' rihaan sa'anj caraa cunudanj yo'ó nij yuvii nanj adonj.

⁴ 'Q se nij so', daj doj sa'anj quináj raá se-sa'anj nij so' ro', caraa nij so' rque chrúún, ne xa' no', tzaj ne nda' se achiin ndo'o sa'anj rihaan no', tzaj ne rque no' rihaan Diose cunudanj sa'anj nicaj no' sa'anj quiraan no' se cha no' nanj adonj —taj Jesucristó a.

Nana nihánj taj xna'anj se vaa canee nu' nuvií nocoo ne chuman' Jerusalén a

⁵ Dan me se cataj ta'aj yuvii se vaa xa' nuvií nocoo, tzaj ne yuvej sa' inanj me yuvej guun nuvií nocoo, ne me doj uxrá sa'anj go' nij yuvii rihaan Diose che'é rej ca'vee cune' nii nuvií nocoo yo' a.

⁶ Gaa ne cataj Jesucristó rihaan nij so' a:

—Xa' nu' nuvií nocoo ni'yaj soj nihánj, tzaj ne vaa güii canee nu' nuvií nocoo nihánj, ne a 'ó yuvej se quitáá xráá tuvi' yuvej nihánj a ma' —taj Jesucristó a.

Nana nihánj taj xna'anj che'é sayuun guun rihaan chumii nihánj vaa güii a

⁷ Dan me se xná'anj nii man Jesucristó, ne cataj nii rihaan so' a:

—Che'é dan cataj xna'anj so' rihaan núj aman canee nu' nuvií nocoo nihánj do', a me rasuun ca'na' quiyáá so' asa' quisíj ca'na' sayuun yo', señor —taj nii, xná'anj nii man so' a.

⁸ Gaa ne cataj so' rihaan nii:

—Tumé ndo'o soj man soj se gaa nanj tihá' yu'unj yuvii man soj á. 'Q se ca'na' uxrá yuvii cataj: “Unj me sí na'vij soj, ne Cristo mej á”, cataj nij yuvii, ne cataj uún nij yuvii: “Aj quisíj güii ca'anj

ni'ya chumiġ nanj á”, cataġ uún nij yuviġ rihaan soġ a. Tzaj ne se cuchumán rá soġ, ne se canoco' soġ man yuviġ a'mii danj ma'.

⁹ ”Dan me se ca'vee se cunō soġ nana se vaa unu' uxrá chuman' ga tuvi' chuman' do', ca'vee se cunō soġ nana se vaa tucuáá ndo'o yuviġ rihaan gobiernó do', tzaj ne se cuchu'vi' soġ ma'. Maan se vaa che'é guun sayuun yo' rihaan chumiġ nihánj asino yaan adonj. Tzaj ne asa' quisíj guun danj, gaa ne se ca'anj ni'ya chumiġ nihánj nu' orá ma'. 'Q se quinaj chumiġ nihánj doġ adonj —taj so' rihaan nij so' a.

¹⁰ Gaa ne cataġ uún Jesucristó rihaan nij so' a:

—Dan me se cunu' uxrá yuviġ man chuman' nocoo ga yo'ó chuman' nocoo, ne cunu' gobiernó ga tuvi' gobiernó a.

¹¹ Ne cachén ndo'o yuún nocoo, ne que'ee chuman' me se cachén ndo'o chi'ii cachén ndo'o x'naa cachén ndo'o a. Ne quene'en ndo'o yuviġ rasuun nocoo nij ndo'o rej xta', ne cuchu'vi' nij yuviġ, qui'yaj rasuun yo' a.

¹² ”Tzaj ne asa' ataa guun nu' sayuun yo', ne quitaj ri'yunj nii man soġ, ne quita'aa nii man soġ, ne canoco' nii man soġ qui'yaj nii sayuun man soġ, ne taacuachén nii man soġ rihaan nij síj man rá ve' nuu chre' ní' tucu'yón ní' se-tucuanj Moisés, ne caxrii nii taga' man soġ, ne taacuachén nii man soġ rihaan nij síj nicaj suun, che'é se sij noco' manj me soġ a.

¹³ Síj, gaa ne quirí' soġ cataġ xna'anj soġ rihaan nij so' che'é 'unj a.

14 Ne asa' nicun' soj rihaan nij so', ne yo'o ca'nej nimán soj se nanó rá soj che'é nana ca'mii ma'an soj rihaan nij so' ma'.

15 'Q se ma'anj me síi rque nana cuu cavii tu'va soj nanj á. Ne taj síi guun nucuaj qui'yaj canaán rihaan se-nana soj ma'.

16 Dan me se ndaa ma'an rej soj do', ndaa ma'an tuvi' soj do', ndaa ma'an tinúú soj do', ndaa ma'an nij síi man chiháán soj do', me nij síi tacuachén man soj rihaan nij síi qui'yaj sayuun man soj, gaa ne ticavi' nii man ta'aj soj,

17 ne nachri' cunudanj nij yuvii man rihaan chumii ni'yaj nij so' man soj, che'é se me soj síi noco' manj adonj.

18 Tzaj ne daj chihaa míj se ca'anj ni'ya a doj yuvé raaj soj ma'.

19 'Q se che'é se noco' raan soj manj ro', che'é dan yo'o gaa i'na' soj nu' cavii nu' ca'anj adonj.

20 "Dan me se asa' quene'en soj se vaa tu-cuachriin tanuu nu' chuman' Jerusalén, ne xcaj soj cuentá se vaa daj doj quiri' nu' chuman' yo', ne quinavij nu' chuman' yo' nanj adonj.

21 Ne güii dan me se yo'o cunanj nij síi man estadó Judea ca'anj nij so' raaj quij, ne nij síi vaj rque chuman' Jerusalén me se ra'yanj curihanj nij so', ne nij síi vaj rej tacaan me se se catúj nij so' chuman' yo' daj chihaa míj ma'.

22 'Q se yo' me güii naru'vee Diose sayuun rihaan nij síi ne estadó Judea yo' che'é cacun' tumé nij so', ne ya danj guun, gaa ne quisij ya nu' nana no rihaan danj Diose che'é nij so' a.

23 Nique chana nuu rque do', chana vaa ta'nii

ne'ej utzii do', güii ca'na' sayuun yo' a. 'O se se guun nucuaj chana yo' cunanj chana yo' ma'. 'O se guun ndo'o sayuun rej yo', ne caxrii yuvaá Diose man yuvii yo',

24 ne cavi' que'ee nij so' raá neê espadá, ne quita'aa nii man que'ee nij so' ca'anj nıcaj nii rej ne nij sıı yanıj a. Ne cachee nij sıı yanıj xraá nu' chuman' Jerusalén, ndaa se quisij güii ca'nee Diose suun ra'a nij so' a —taj Jesucristó a.

Nana nihánj taj xna'anj daj gaa ca'na' uún Jesucristó rihaan chumii nihánj a

25 Ne cataj uún Jesucristó a:

—Gaa ne quene'en yuvii se vaa cunuú ino güii do', yavii do', nij yati' do', ne rihaan ma'an chumii me se cuchu'vi' ndo'o cunudanj nij yuvii cunó nij so' daj gaa cariin ndo'o na ya'anj do', quene'en nij so' daj gaa quinaan rihaan na ya'anj do' a.

26 Ne cuchu'vi' ndo'o nij yuvii, che'é yan quinano rá nij so' daj gaa quiran' nu' chumii nihánj a. Ne quinaan taran' nij rasuun nucuaj man rej xta' a.

27 Gaa ne quene'en nij so' mán 'unj sij ca'neé Diose nıcaj yu'unj man yuvii á. Dan me se xraá ngaa quitaj 'unj ca'na' 'unj, ne guun nucuaj ndo'oj quirii ta'ngaj, ne ve'é uxrá curuvij ca'naj ei.

28 Dan me se asa' guun che'e nu' rasuun nihánj guun yo' danj, ne canicun' soj, ne ni'yaj soj xta', ne daj doj nacaj 'unj man soj rihaan chumii nihánj gaa nanj adonj —taj Jesucristó rihaan nij so' a.

Nana nihánj taj xna'anj se vaa ya quene'en ní' se vaa daj doj ca'na' uún Jesucristó a

29 Gaa ne nanó Jesucristó cuentó nihánj a:

—Xcaj soj cuentá daj 'yaj chruun man chruj higó raá do', daj 'yaj me ma'an chruun do' á.

³⁰ Gaa naca coj ya'lij ra'a nij chruun, ne ni'yaj soj man nij chruun, ne ne'en soj se vaa daj doj 'na' tió naman maan a.

³¹ Dan me se xcaj uún soj cuentá se vaa asa' quene'en soj nu' se vaa cataj xna'anj 'unj rihaan soj cuano, ne daj doj guun che'e Diose guun chij Diose rihaan chumii nihánj nanj adonj.

³² Ya ya cataj xna'anj 'unj rihaan soj cuano se vaa quene'en ta'aj soj sij vaa i'na' rihaan chumii nihánj cuano quisij nu' rasuun nihánj nu' se vaa cataj xna'anj 'unj rihaan soj cuano ei. Ne ya quene'en soj nu' nihánj gaa ataa cavi' soj ei.

³³ Vaa güii ca'anj ni'ya yo'óo do', xta' do', tzaj ne se-nanaj me se daj chihaa mij se quinavij yo' ma' —taj Jesucristó rihaan nij so' a.

Nana nihánj taj xna'anj se vaa tumé ní' man ní' daj qui'yaj ní', gaa ne ca'vee canicun' ní' rihaan Jesucristó a

³⁴ Ne cataj uún Jesucristó a:

—Dan me se cutumé soj man soj se gaa nanj yo'o guun rá soj rasuun man rihaan chumii nihánj, ne guun rá soj guun xno soj do', guun rá soj ca'mii sca' soj do', guun rá soj guun si'yaj soj nu' rasuun man rihaan chumii nihánj do' a. Se qui'yaj soj danj, tóse taj ni'yón ca'naj, ne se quene'en soj ca'naj a.

³⁵ 'O se ndaa rá se vaa 'o lazo ne' ta'aa man nii ro', danj gaa ca'na' xraá cunudanj chumii nihánj adonj.

³⁶ Che'é dan yo'o ni'yaj soj, ne xcaj soj cuentá nu' güii, ne inanj cachinj ni'yaj soj rihaan Diose se

vaa ca'vee quinanii soj rihaan nu' sayuun nihánj asa' guun danj rihaan chumii nihánj, gaa ne ca'vee canicun' soj rihaan 'unj sij ca'neé Diose nıcaj yu'unj man yuvii ei —taj Jesucristó a.

³⁷ Dan me se rej ranga' ro', ne Jesucristó rá nuvíi nocoo, ne tucu'yón so' man nij yuvii, ne rej ti'nuu me se curihañj so', ne rej cu'naj Quij man Chruun Olivó aran' so' a.

³⁸ Ne taxrej uchi' cunudanj nij yuvii cuno nij so' se-nana Jesucristó a.

22

Nana nihánj taj xna'anj daj qui'yaj síi cu'naj Judas gaa cutu'vej yuve so' man Jesucristó a

¹ Dan me se daj doj canuú cha'anj pascuá cha'anj chá nij yuvii israelitá chraa yo'óo trigó a.

² Ne nano' nij xrej ata suun nocoo doj do', nij síi naqui'yaj cuu se-tucuanj Moisés rihaan yuvii do', daj qui'yaj nij so' ne cavi' Jesucristó, che'é se man ndo'o yuvii nocoo' man Jesucristó a.

³ Ne catúj síi chree cu'naj Satanás nimán síi cu'naj Judas Iscariote, ne so' me se yo'q tuvi' ma'an chuvij nij síi tucu'yón se-nana Jesucristó me so' a.

⁴ Dan me se cavii so' ca'anj so', ne ca'mii so' ga nij xrej ata suun nocoo doj do', ga tanuu uun chij rihaan nij tanuu tumé nuvíi do', gaa ne cataj so' daj qui'yaj so' ne taquachén so' man Jesucristó rihaan nij so' a.

⁵ Gaa ne guun niha' rá nij so' gaa cuno nij so' se-nana Judas, ne guun ya ca'mii nij so' ga Judas se vaa rque nij so' sa'anj man Judas a.

6 Dan me se cata' tu'va sí cu'naj Judas se vaa tacuachén so' man Jesucristó rihaan nij so', gaa ne nuchruj raa Judas aman ca'vee tacuachén so' man Jesucristó rihaan nij so', gaa ne se gaa nanj quene'en nij yuvij a.

Nana nihánj taj xna'anj che'é rachrúún rqué Jesucristó rihaan nij sí tucu'yón se-nana so' cha nij so' do', che'é na vinó rqué so' co'ó nij so' do' a

7 Dan me se quisij güii canuü cha'anj chá nii chraa yo'óó trigó, ne güii dan me güii ticavi' nij yuvij israelitá matzinj le'ej che'é Diose a.

8 Dan me se ca'née Jesucristó man Pedró do', man Juan do', ne cataj so' rihaan roj so':

—Ca'anj roj soj qui'yaj chuvij roj soj cha ní ne navij rá ní cha'anj pascuá ei —taj so' rihaan roj so' a.

9 Gaa ne xná'anj roj so' man Jesucristó a:

—Me rej qui'yaj chuvij núj cha ní ga —taj roj so' a.

10 Gaa ne cataj Jesucristó rihaan roj so' a:

—Cunó roj soj nana nihánj, se vaa asa' catúj roj soj chuman' yo', ne nari' tuvi' roj soj ga 'o sí táá chiha 'o cacuaj na, ne canoco' roj soj man so', catuü roj soj rá ve' catuü so',

11 ne cataj roj soj rihaan sí tucua ve' yo': “Xná'anj maestró mán so' se vaa me rej ne ve' cha xti'no maestró chraa ga nij sí tucu'yón se-nana so' che'é cha'anj pascuá, taj so' a”, cataj roj soj rihaan sí tucua ve' yo' a.

12 Gaa ne tijaan so' 'o ve' nata' xij rihaan roj soj, ne aj vaa chuvij rá ve' yo', ne man chruun mesá man chruun xlá man rá ve' yo' a. Yo' me rej qui'yaj chuvij roj soj á —taj Jesucristó rihaan roj so' a.

13 Dan me se cavii roj so' ca'anj roj so', ne nari roj so' nu' ndaa vaa cataj xna'anj Jesucristó rihaan roj so', gaa ne qui'yaj chuvii roj so' cha xti'no nij so' chraa che'é cha'anj pascuá a.

14 Ne quisij orá cha xti'no nij so', ne ca'na' Jesucristó ga yo'ó nij apóstol cune' so' man nata' rihaan yuvii che'é so', gaa ne ca'anj cayáán taran' nij so' rihaan mesá a.

15 Gaa ne cataj Jesucristó rihaan nij so' a:

—Guun ndo'o raj cha xti'no 'unj che'é cha'anj pascuá nihánj ga nij soj cuano nihánj gaa ataa quirán' 'unj sayuun a.

16 'O se cataj xna'anj 'unj rihaan soj cuano se vaa se chá xti'no uún 'unj ga soj a 'ó cha'anj nihánj ndaa se quisij güii canuú cha'anj pascuá naca asa' guun chij Diose rihaan chumii nihánj a man adonj —taj Jesucristó rihaan nij so' a.

17 Gaa ne nicaj so' 'o aga' tazá na vinó, ne nago' so' graciá rihaan Diose, gaa ne cataj so':

—Quita'aa soj na nihánj, cuxra' ta'aj soj, ne co'o cunudanj soj á.

18 'O se cataj xna'anj 'unj rihaan soj cuano se vaa veé doj nihánj me co'oj, ne se co'oj yaj a ma'. Tzaj ne asa' quisij güii guun chij Diose rihaan chumii nihánj, ne co'oj adonj —taj Jesucristó rihaan nij so' a.

19 Gaa ne nicaj so' rachrúún, ne nago' so' graciá rihaan Diose, gaa ne cuxra' so' rachrúún, ne rqué so' man nij so', ne cataj so':

—Ne manj me rachrúún nihánj nanj á. Ca'vej rá 'unj cavi' ne manj che'é soj, ne cha soj man nihánj, gaa ne yo'o cunuú rá soj manj ei —taj so' rihaan nij apóstol a.

20 Gaa ne ase vaa qui'yaj so' ga rachrúun ro', danj qui'yaj uún so' ga aga' nuu na vinó gaa quisíj chá xti'no nij so', ne cataj so':

—Na vinó nihánj ro', me ton manj a. Che'é ton manj ro', rqué Diose 'o nana rihaan soj daj qui'yaj Diose ga soj a. Dan me se che'é se cayanj ton manj ro', che'é dan me caraa x'naa Diose ni'yaj Diose cacun' tumé yuvij nanj adonj —taj Jesucristó rihaan nij so' a.

Nana nihánj taj xna'anj se vaa ma'an Jesucristó cataj xna'anj se vaa tacuachén yo'o sí tucu'yón se-nana so' man so' rihaan nij sí taj ri'yunj man so' a

21 Ne cataj uún Jesucristó a:

—Tzaj ne xcaj soj cuentá se vaa vaa 'o sí tacuachén manj rihaan nij sí taj ri'yunj manj, ne táá ra'a so' rihaan chruun mesá taj ra'aj nihánj cuano ei.

22 'O se xa' 'unj sij ca'née Diose nicaj yu'unj man yuvij, tzaj ne ca'anj 'unj cavi' 'unj ndaa vaa cataj xna'anj ma'an Diose a. Tzaj ne nique ndo'o sí tacuachén manj rihaan nij sí taj ri'yunj manj nanj á. Quiran' uxrá so' sayuun adonj —taj Jesucristó rihaan nij so' a.

23 Gaa ne guun che'e nij sí tucu'yón se-nana Jesucristó nuchruj raa nij so' ga tuvi' nij so' me tuvi' nij so' me sí qui'yaj danj man Jesucristó, rá nij so' a.

Nana nihánj taj xna'anj daj qui'yaj ní' sese me rá ní' guun ní' sí guun chij doj rihaan tuvi' ní' a

²⁴ Gaa ne ca'mii cunu' cunudanj nij sí tucu'yón se-nanā Jesucristó me tuvi' nij so' me sí guun chij doj a.

²⁵ Gaa ne cataj Jesucristó rihaan nij so' a:

—Nij sí nicaj suun rey uun chij rihaan nij yuviij yaníj ro', rii ta'nga' uxrá nij so' rihaan tuvi' nij so', ne tucu'náj nii “sí 'nij ra'a man ní” man nij so' nanj á.

²⁶ Tzaj ne se guun soj sí vaa danj ma'. Maan se tuvi' soj sí guun rá se vaa guun chij so' doj rihaan soj ro', vaa che'é guun so' sí nocó' doj rihaan soj, ne guun so' ase vaa 'o se-mozó soj a.

²⁷ Dan me se me sí me sí uun chij doj, rá soj ga: sí anicaj co'oo rihaan mesá na', ase sí yanj rihaan mesá xa'. Veé sí yanj rihaan mesá me sí uun chij doj, rá soj a. Tzaj ne nihánj me se vaj ma'án 'unj sca'núj nij soj, ne aj guún 'unj mozó rihaan soj vaa nanj adonj.

²⁸ ”Ne xa' soj, tzaj ne nij soj me nij sí cachée ga 'unj gaa quirán' 'unj sayuun,

²⁹ ne ase vaa cune' Réj Diose manj se vaa guun chij 'unj ro', danj gaa cune' 'unj man soj cuano

³⁰ se vaa cayáán soj rihaan xrúún 'unj chruun mesá asa' guun chij ma'anj, ne cha soj chraa ne co'o soj na ga 'unj adonj. Ne quitaj soj chruun xlá sa' ndo'o, ne ca'ne' soj cacun' che'é chuvij nij x'ne' yuviij israelitá adonj —taj Jesucristó rihaan nij sí tucu'yón se-nanā so' a.

Nana nihánj taj xna'anj daj ca'mii Jesucristó ga sí cu'naj Simón Pedró a

³¹ Gaa ne cataj Jesucristó rihaan sí cu'naj Simón Pedró a:

—Cunó so' nana nihánj ca'mij rihaan so', Simón. 'O se aj cachíin ni'yaj sí cu'naj Satanás rihaan Diose se vaa ca'vej rá Diose qui'yaj so' sayuun man nij soj a. Dan me se ase vaa 'yaj nii man 'núú trigó gaa tixrin' nii 'núú trigó rihaan rcuaa ro', danj qui'yaj sí chree man soj, che'é se guun rá so' quirí' soj adonj.

³² Tzaj ne aj cachíin ni'yáá 'unj rihaan Diose che'é so', se vaa se ca'ne' rá so' ga suun amán rá ni'yaj manj a ma'. Gaa ne asa' nanicaj nimán so' canoco' uún so' manj ro', ne racuíj so' man nij tinúú so' se vaa cunuú sca' doj nimán nij so' uún á —taj Jesucristó rihaan sí cu'naj Simón Pedró yo' a.

³³ Gaa ne cataj so' rihaan Jesucristó a:

—Tzaj ne aj ca'née nimanj yo'o cachee 'unj ga so', Señor. Ca'vee se caxrii nii taga' mán so' ca'vee se ticaví' nii mán so' ca'vee se, tzaj ne se tanáj xco 'unj mán so' ma' —taj so' rihaan Jesucristó a.

³⁴ Tzaj ne cataj Jesucristó rihaan Pedró a:

—Nihánj me cataj 'unj rihaan so' daj qui'yáá so', Pedró. Ne'én 'unj se vaa asa' ataa caguaj to'loo ni corá, ne va'nuj cataj so' se vaa ne ne'én so' manj ma' —taj Jesucristó rihaan Pedró a.

Nana nihánj taj xna'anj se vaa quirán' nij sí tucu'yón se-nana Jesucristó sayuun a

³⁵ Gaa ne cataj Jesucristó rihaan nij sí tucu'yón se-nana so' a:

—Gaa ca'née 'unj man soj ca'mii natáj soj se-nanaj rihaan nij yuvií israelitá ne taj nanj taj vitó taj canj taj ca'anj nicaj soj gaa ca'anj soj, tzaj ne taj vaj rasuun cachiin man soj gaa ca'anj soj, rá 'unj a —taj Jesucristó rihaan nij so' a.

—Taj vaj a doj rasuun ne cachiin man núj ma'
—taj nij so' rihaan Jesucristó a.

³⁶ Gaa ne cataj Jesucristó rihaan nij so' a:

—Yaj me se sese vaa xnánj soj do', se-vito soj do',
ne nıcaj soj ca'anj soj á. Ne sese taj yan vaj neê
espadá rihaan soj, ne quiraan soj 'o taneê soj neê
espadá á. Ne sese nuvi' sa'anj rihaan yo'o tuvi' soj,
ne vaa che'é cutu'vee so' se-roto so', ne quiraan so'
neê espadá ei.

³⁷ 'O se vaa nana no rihaan danj Diose taj: “Cataj
nii se vaa sij 'yaj cacun' me so'”, taj danj Diose
che'é 'unj, ne vaa che'é quisij ya nu' nana yo' che'ej
a. 'O se daj doj quinavij se vaa 'yáa 'unj rihaan
chumij nihánj nanj adonj —taj Jesucristó rihaan
nij so' a.

³⁸ Gaa ne cataj nij so' rihaan Jesucristó a:

—Nı'yaj so' ei. Vaa vij neê espadá rihaan ní
nihánj, Señor —taj nij so' a.

—Veé danj me se danj nanj á —taj Jesucristó
rihaan nij so' a.

*Nana nihánj taj xna'anj daj qui'yaj Jesucristó gaa
cachín ni'yaj Jesucristó rihaan Diose a*

³⁹ Gaa ne cavii so' ca'anj so' quij cu'naj Quij man
Chruun Olivó, ndaa vaa cu'yón inanj so' qui'yaj so'
a. Ne canoco' nij sí tucu'yón se-nana so' rej xcó so'
a.

⁴⁰ Ne gaa cuhi' nij so' rej yo', ne cataj Jesucristó
rihaan nij so' a:

—Cachınj ni'yaj soj rihaan Diose se vaa caráán
Diose chrej rihaan sí chree se gaa nanj guun rá soj
qui'yaj soj cacun' qui'yaj sí chree á —taj Jesucristó
rihaan nij sí tucu'yón se-nana so' a.

41 Gaa ne naxuun so' man so' rihaan nij síi tucu'yón se-nana so', ne ca'anj so' rej yaníj doj, ne canicun' ruj so', ne cachín ni'yaj so' rihaan Diose,
 42 ne cataj so' rihaan Diose a:

—Sese ca'vee, ne caraán ra'á so' xráj, se gaa nanj quirán' uxrá 'unj sayuun, tzaj ne sese ma'án so' me rá quirán' 'unj sayuun, ne qui'yáa so' ndaa vaa me rá ma'án so', ne se qui'yáa so' ndaa vaa me rá ma'anj ma' —taj Jesucristó, cachín ni'yaj so' rihaan Diose a.

43 Gaa ne curuvi' yo'o se-mozó Diose cavii rej xta' rihaan so', ne nari' nucuaj nimán so', qui'yaj se-mozó Diose yo' a.

44 Ne nanó ndo'o rá so', ne nucuaj ndo'o cachín ni'yaj so' rihaan Diose, ne cavii ndo'o nihaa rihaan so', ne ase vaa ton vaa nihaa cavii rihaan so' cayanj rihaan yo'óo a.

45 Ne canicun' caya so', ne ca'anj so' rej ne nij síi tucu'yón se-nana so', tzaj ne quene'en so' se vaa cotoj nu' nij so', che'é se nanó ndo'o rá nij so' a.

46 Gaa ne cataj Jesucristó rihaan nij so' a:

—Me che'é otoj soj ga. Naxumaan soj cachinj ni'yaj soj rihaan Diose se gaa nanj guun rá soj qui'yaj soj cacun' qui'yaj síi chree á —taj so' rihaan nij síi tucu'yón se-nana so' a.

Nana nihánj taj xna'anj daj qui'yaj nii gaa quita'aa nii man Jesucristó a

47 Dan me se nicun' Jesucristó ca'mii so', ne nu' ca'na' que'ee yuvij, ne síi cu'naj Judas yo'o tuvi' chuvij nij síi tucu'yón se-nana Jesucristó me síi táa yaan rihaan nij yuvij, ne quinichrun' síi

cu'naj Judas rihaan Jesucristó, che'é rej guun rá so' cachron tu'vā so' xruu Jesucristó a.

48 Gaa ne cataj Jesucristó rihaan Judas a:

—Ne chihān' uxrá 'yáá so', se vaa tacuachén so' manj sij ca'néé Diose nīcaj yu'unj man yuvii gaa cachron tu'vá so' xruj, man Judas —taj so' rihaan Judas yo' a.

49 Dan me se quene'en nij síi nicun' ga Jesucristó daj qui'yaj nij yuvii man Jesucristó, ne che'é dan xná'anj nij so' man Jesucristó a:

—Go' núj neê espadá raā nij so', rá so' na' —taj nij so' rihaan Jesucristó a.

50 Ne yo'o tuvi' nij so' ro', go' taneê so' neê espadá raā se-mozó xrej atā suun nocoo doj, ne güéj nu' xréé yo' rej nuva' yo', qui'yaj so' a.

51 Gaa ne cataj Jesucristó rihaan so' a:

—Ca'ne' rá soj ga suun 'yaj danj á —taj Jesucristó rihaan nij so' a.

Gaa ne cuta' Jesucristó ra'a Jesucristó rej quiran' chi'ii xréé mozó yo', ne nu' orá nahuun sa' xréé mozó yo', qui'yaj Jesucristó a.

52 Gaa ne cataj Jesucristó rihaan nij xrej atā suun nocoo doj do', rihaan tanuu uun chij rihaan nij tanuu tumé nuví do', rihaan nij síi uun chij rihaan nij yuvii israelitá do' a:

—Me che'é 'na' neê espadá 'na' chruun 'na' ga soj ga. Síi ituu mé 'unj, rá soj na'.

53 'O se daj a güii yáán 'unj ga nij soj rá nuví nocoo, tzaj ne ne guun rá soj quita'aa soj mán 'unj ma'. Tzaj ne cuano nihánj me se aj quisíj orá ca'vee qui'yaj soj ndaa vaa me rá soj qui'yaj soj, ne nihánj

me se ca'vee guun nucaj soj sij vaj rej rmi' a —taj Jesucristó rihaan nij so' a.

Nana nihánj taj xna'anj daj qui'yaj sí cu'naj Pedró gaa cataj so' se vaa nuveé sij noco' man Jesucristó me so' a

⁵⁴ Dan me se quita'aa nij so' man Jesucristó, ne ca'anj nicaj nij so' man Jesucristó rá ve' tucúa xrej atá suun nocoj doj, ne gan' gan' canoco' sí cu'naj Pedró rej xco Jesucristó, 'na' so' a.

⁵⁵ Dan me se naran' nii ya'an rá ve', ne yáán tacuachriin taran' nii rihaan ya'an, ne yáán sí cu'naj Pedró sca'núj nij so' a.

⁵⁶ Dan me se yáán so' rej chuguun ya'an rihaan nij tuvi' xrej, ne quene'en yo'o mozó chana man so', ne ni'yaj uxrá chana yo' man so' a. Gaa ne cataj mozó chana yo' rihaan tuvi' no' sí man ga no' a:

⁵⁷ —Sí nihánj ro', me yo'o sí cachéé ga Jesucristó a —taj chana yo', ni'yaj yo' man Pedró a.

Gaa ne cataj Pedró rihaan chana yo' a:

—Ne ne'én 'unj man so', man nocoj —taj so' a.

⁵⁸ Ne yo'ó orá nii me se quene'en yo'ó so' man Pedró uún a:

—Yo'o tuvi' nij sí chéé ga so' mé so' ei —taj so' rihaan Pedró a.

—Taj ma'. Nuveé sij chéé ga so' mé 'unj, man tinuj —taj Pedró yo' a.

⁵⁹ Dan me se cachén yo'ó orá uún, gaa ne nucaj ca'mii yo'ó so' a:

—Ya uxrá sij cachéé ga Jesucristó me sí nihánj nanj ei. 'O se sij cavii estadó Galilea me roj so' ga Jesucristó chuguanj —taj yo'ó so' a.

⁶⁰ Gaa ne cataj Pedró rihaan sí tu'va danj a:

—Ne uno uxraj me taj so', man tinuj —taj so' rihaan nij so' a.

Ne dan me se nu' ca'mii so' danj, ne nu' caguáj to'loo a.

⁶¹ Gaa ne canicaj sí 'nij ra'a man ní', ne ni'yaj so' man Pedró, gaa ne nanuj rá Pedró se-nana sí 'nij ra'a man ní' gaa cataj sí 'nij ra'a man ní' rihaan so': “Ne'én 'unj se vaa asa' ataa caguaj to'loo nij corá, ne va'nuj cataj so' se vaa ne ne'én so' manj ma”, cataj sí 'nij ra'a man ní' rihaan so' quii a.

⁶² Dan me se gaa ni'yaj sí 'nij ra'a man ní' man Pedró, gaa ne curihanj Pedró xe', ne ta'vee ndo'o so' a.

Nana nihánj taj xna'anj daj qui'yaj nii gaa cuta' nii cacun' xráá Jesucristó a

⁶³ Gaa ne nij sí quita'aa man Jesucristó ro', tiha' ndo'o nij so' man so', ne go' nij so' xráá so' a.

⁶⁴ Ne gaa go' nij so' xráá so' me se caráán nij so' rihaan Jesucristó, ne cataj nij so' rihaan so' a:

—Cataj so' rihaan núj me sí go' mán so' á —taj nij so',

⁶⁵ ne que'ee doj nana nij a'mii uún nij so' rihaan Jesucristó a.

⁶⁶ Ne gaa quisj güii, ne cunuu chre' nij sí uun chij rihaan nij yuvi israelitá, ne dan me se nij xrej ata suun nocoo doj do', nij sí naqui'yaj cuu se-tucuanj Moisés do', cunuu chre', ne ca'anj nicaj nij so' man Jesucristó rá ve' a'ne' nij so' cacun' che'é yuvi a. Gaa ne xná'anj nij so' man Jesucristó, ne cataj nij so':

67 —Sese ya sij ca'néé Diose t̄inanii man yuvii rihaan sayuun mé so', rá so', ne cataj xna'anj so' rihaan núj á —taj nij so' a.

Gaa ne cataj Jesucristó rihaan nij so' a:

—Ca'vee se cataj xna'anj 'unj rihaan soj, tzaj ne se cuchumán rá soj se-nanaj ma'.

68 Ne sese xna'anj 'unj 'o nana man soj, tzaj ne se cataj xna'anj soj rihanj ma'.

69 Tzaj ne rej rihaan ní' me se xa' 'unj sij ca'néé Diose n̄icaj yu'unj man yuvii, tzaj ne cayáán 'unj rej nuva' Diose sí nucuaj ndo'o a —taj Jesucristó rihaan nij so' a.

70 Gaa ne xná'anj cunudanj nij so' man Jesucristó, cataj nij so':

—Che'é dan me ta'nij Diose mé so', rá so' na' —taj nij so' rihaan so' a.

Gaa ne cataj Jesucristó rihaan nij so' a:

—Veé ya ndaa vaa cataj soj ro', veé danj vaa nanj á —taj so' a.

71 Gaa ne cataj nij so' rihaan tuvi' nij so' a:

—Se cachiin doj sí ca'na' cataj xna'anj rihaan ní' che'é cacun' tumé sí nihánj a ma'. 'O se ma'an ní' me sí cuno daj tu'va so' nihánj nanj adonj —taj nij so' rihaan tuvi' nij so' a.

23

Nana nihánj taj xna'anj daj ca'mii sí cu'naj Pilato ga Jesucristó a

1 Dan me se que'ee nij so', ne naxumaan taran' nij so', ne ca'anj nicaj nij so' man Jesucristó rihaan sí cu'naj Pilato a.

² Gaa ne cuta' nij so' cacun' xraá so' rihaan sí cu'naj Pilato, ne cataj nij so' rihaan sí cu'naj Pilato a:

—Sí nihánj ro', me sí tucu'yón tucuáán ne rihaan tuvi' núj sij israelitá, ne cataj so' se vaa se go' yuviij puextó rihaan sí nicaj suun cu'naj César, ne taj so' se vaa sij ca'née Diose guun sí nicaj suun rey me ma'an so', taj so' adonj —taj nij so' rihaan sí cu'naj Pilato, ni'yaj nij so' man Jesucristó a.

³ Gaa ne xná'anj sí cu'naj Pilato man Jesucristó a:

—So' me sí nicaj suun rey uun chij rihaan nij yuviij israelitá na' —taj so', xná'anj so' man Jesucristó a.

—Vej á —taj Jesucristó rihaan so' a.

⁴ Gaa ne cataj sí cu'naj Pilato rihaan nij xrej ata suun nocoo doj do', rihaan nij yuviij do' a:

—Nuvi' cacun' tumé sí nihánj narij ma' —taj so' a:

⁵ Tzaj ne nucuaj doj ca'mii nij so', cataj nij so':

—Tzaj ne que'ee yuviij uno se-nana so', ne vaa güii qui'yaj nij so' sayuun nanj á. Ne vaj so' tucu'yón so' se-nana so' nu' estadó Judea nihánj, ne guun che'e so' tucu'yón so' se-nana so' estadó Galilea, ne 'na' so' ndaa nihánj tucu'yón so' nanj adonj —taj nij so' rihaan Pilato a.

⁶ Dan me se cuno Pilato se-nana nij so', gaa ne xná'anj Pilato man nij so' sese sij cavii estadó Galilea me Jesucristó a.

⁷ Gaa ne quene'en so' se vaa ya cavii Jesucristó estadó Galilea rej uun chij sí cu'naj Herodes a. Che'é dan cataj so' se vaa ca'anj nicaj nij so' man Jesucristó rihaan sí cu'naj Herodes yo' a. 'Q se güii

dan me se nuû ma'an síi cu'naj Herodes chuman' Jerusalén a.

Nana nihánj taj xna'anj daj ca'mii síi cu'naj Herodes ga Jesucristó a

⁸ Gaa quene'en síi cu'naj Herodes man Jesucristó, gaa ne guun niha' uxrá rá so' a. 'O se asij rque ndo'o me se guun rá so' quene'en so' man Jesucristó, che'é se aj cuchi' nana rihaan so' daj 'yaj Jesucristó a. Ne guun rá so' se vaa qui'yaj Jesucristó 'o suun sa' nocoo ni'yaj so' a.

⁹ Dan me se xná'anj ndo'o so' nana man Jesucristó, tzaj ne a 'ó nana ne ca'mii Jesucristó rihaan so' a ma'.

¹⁰ Tzaj ne nicun' nij xrej atá suun nocoo doj nicun' nij síi naqui'yaj cuu se-tucuanj Moisés rihaan nij yuvií nicun', ne nucuaj ndo'o cuta' nij so' cacun' xráa Jesucristó a.

¹¹ Gaa ne nachri' Herodes do', nij tanuu nuu rihaan so' do', ni'yaj nij so' man Jesucristó, ne ca'nga' nacoo nij so' ni'yaj nij so' man Jesucristó a. Gaa ne na'née nij so' yatzíj sedá man Jesucristó qui'yaj Herodes, ne veé dan na'née uún Herodes man so' rihaan Pilato a.

¹² Ne güii dan me se guun che'e Herodes ga Pilato na'mii sa' roj so' ga tuvi' roj so' a. 'O se asij rque doj me se sij taj ri'yunj man tuvi' me roj so' a.

Nana nihánj taj xna'anj se vaa cataj xna'anj síi cu'naj Pilato se vaa cavi' Jesucristó rihaan rcutze a

¹³ Dan me se canacúun síi cu'naj Pilato man nij xrej atá suun nocoo doj do', man nij síi uun chij rihaan nij yuvií israelitá do', man ma'an nij yuvií

do', se vaa ca'na' nij so' cunu chre' nij so' rihaan so' a.

14 Gaa ne cataj Pilato rihaan nu' nij yuvii a:

—Dan me se nicaj soj man snó'o nihánj ca'na' soj rihanj, ne cataj soj se vaa so' me sí me rá qui'yaj nij yuvii sayuun a. Ne veé xná'anj 'unj man so' cuno taran' soj daj 'yaj so', ne xa' cacun' cuta' soj xráá so', tzaj ne taj vaj cacun' vaa danj tumé sí nihánj narij ma'.

15 Ne sí cu'naj Herodes ro', ne nari' so' cacun' tumé sí nihánj a ma'. Maan se na'née uun sí cu'naj Herodes man sí nihánj rihaan ní nanj á. Ne xcaj soj cuentá se vaa taj cacun' qui'yaj sí nihánj, ne ne nó xcúun so' cavj' so' ma'.

16 Che'é dan qui'yaj doj sayuun man so', ne ca'anj uun so', qui'yaj ní nanj á —taj Pilato rihaan taran' nij yuvii a.

17 'O se maan güii dan me se daj a cha'anj pascuá na'née nij so' man 'o yuvii 'nij taga' a.

18 Gaa ne caguáj cunudanj nij so', cataj nij so' a:

—Ticavi' soj man sí nihánj ei. Ticavi' soj man sí nihánj ei. Ne quirii so' man sí cu'naj Barrabás taga' che'é núj á —taj nij so', caguáj nij so' rihaan Pilato a.

19 Ne xa' sí cu'naj Barrabás, tzaj ne sij qui'yaj cunu' nij yuvii man chuman' Jerusalén me so', ne sij ticavi' man yuvii me so', ne che'é dan caxrij nii taga' man so' a.

20 Gaa ne ca'mii uún Pilato rihaan nij yuvii a. 'O se guun rá so' quirii so' man Jesucristó ca'anj Jesucristó a.

21 Gaa ne caguáj nu' nij yuvii, cataj nij so':

—Canō ya so' rihaan rcutze ei —taj nij yuvī, caguáj nij yuvī a.

²² Gaa ne quisíj va'nuj cataj so' rihaan nij yuvī:

—Tzaj ne taj vaj se chi'ii qui'yaj so' ma'. Taj vaj cacun' tumé so', ne ne nó xcúún so' cavi' so' ma'. Dan me se qui'yáj doj sayuun man so', ne ca'anj uun so' qui'yáj nanj á —taj uún Pilato rihaan nij yuvī a.

²³ Tzaj ne caguáj ndo'o nij yuvī, ne uxrá ca'ne' nij yuvī suun rihaan Pilato se vaa ya cavi' Jesucristó rihaan rcutze qui'yaj so', ne guun nucuaj doj se-nana nij yuvī yo' a.

²⁴ Gaa ne guun ya rá Pilato se vaa qui'yaj so' ndaa vaa cataj nij yuvī rihaan so' a.

²⁵ Dan me se sí 'nij taga' tumé cacun' se vaa cunu' yuvī qui'yaj do', se vaa ticavi' yuvī do', quirii Pilato man so' ca'anj uun so', ndaa vaa cataj nij yuvī a. Ne Jesucristó ro', ca'vej rá Pilato quiran' so' ndaa vaa guun rá nij yuvī quiran' so' nanj adonj.

Nana nihánj taj xna'anj daj qui'yaj nij yuvī gaa cachrón nij yuvī man Jesucristó rihaan rcutze a

²⁶ Dan me se nicaj nii man Jesucristó ca'anj nii, gaa ne quita'aa nii man yo'o sí cu'naj Simón sí cavii chuman' Cirene gaa 'na' nique so' rej tacaan, ne cuta' nii rcutze xráá so' atá so' rcutze 'na' so' rej xco Jesucristó a.

²⁷ Ne noco' que'ee yuvī man Jesucristó, ne ta'aj nij yuvī me chana, ne dan me se go' nij chana se-cuxru' nij no' rucuaa nij no', ne ta'vee ndo'o nij chana ni'yaj nij chana man Jesucristó a.

28 Gaa ne canicaj Jesucristó, cataj Jesucristó rihaan nij chana yo':

—Cuno soj chana ta'nij chuman' Jerusalén ca'mij á. Se ta'vee nij soj ni'yaj soj man 'unj a ma'. Tzaj ne ta'vee soj ni'yaj soj man ma'an soj do', man ma'an ta'ní soj do' á.

29 'O se vaa güii cataj nii se vaa aj cavii sa' doj nij chana ituun do', nij chana ne nari' ne'ej do', nij chana ne tucutzii ne'ej do' a.

30 'O se güii dan me se guun che'e yuvii nacunj yuvii nij quij se vaa canee nij quij caráán nij quij xráá ma'an nij so' a.

31 'O se ase vaa chruun maree vaa i'na' vaa 'unj nihánj, tzaj ne danj nanj ticavj' nii manj a. Táá a nij sí ne chuman' Jerusalén, ne ase vaa chruun nacoo cavi' vaa nij sí tumé cacun' ne chuman' Jerusalén, ne che'é dan chi'ii uxrá doj quiran' nij so' nanj adonj —taj Jesucristó rihaan nij chana a.

32 Ne nicaj nii man yavíj roj sí tumé cacun', ca'anj nii rej cavj' roj so' ga Jesucristó a.

33 Ne gaa cuchi' taran' nij so' rej cu'naj Tacaan Cúú Yave Xnangá, ne cachrón nii man Jesucristó ga roj sí tumé cacun' rihaan va'núj rcutze, ne dan me se yo'o so' ro', cachrón nii rej nuva' Jesucristó, ne yo'ó so' ro', cachrón nii rej nichruun Jesucristó a.

34 Gaa ne cachíin ni'yaj Jesucristó rihaan Diose, cataj so':

—Caraa x'naa so', ne se qui'yáá so' sayuun man nij so', man Ataj Chij. 'O se ne ne'en nij so' daj 'yaj nij so' ma' —taj so', cachíin ni'yaj so' rihaan Rej so' Diose a.

Gaa ne tico tixaj nij tanuu che'é sagan' Jesucristó a.

³⁵ Ne canicun' que'ee yuvii ni'yaj daj quiran' Jesucristó a. Dan me se ca'nga' nacoqo nij síi uun chij, cataj nij so':

—Aj tinanii so' man yo'ó yuvii rihaan sayuun, rá so' á. Ca'vee tinanii so' man ma'an so' yaj ei. Sese sij narii Diose me so' do', sese sij ca'née Diose tinanii man yuvii rihaan sayuun me so' do', ne ca'vee tinanii ma'an so' man so' a —taj nij síi uun chij ni'yaj nij so' man Jesucristó a.

³⁶ Ne nij tanuu, tzaj ne ca'nga' nacoqo uún nij tanuu ni'yaj nij tanuu man Jesucristó, ne ru'maan nij tanuu na vinó yuu tu'va Jesucristó,

³⁷ ne cataj nij so':

—Sese so' me síi nicaj suun rey uun chij rihaan nij yuvii israelitá, ne tinanii so' man ma'an so' rihaan sayuun yaj vij —taj nij tanuu rihaan Jesucristó a.

³⁸ Ne vaa rcuchra' nó rihaan rcutze yo', ne nó nana rihaan rcuchra' yo' se vaa: “Sij nicaj suun rey uun chij rihaan nij yuvii israelitá me síi nihánj a”, taj nana yo' a.

³⁹ Ne yo'qo tuvi' roj síi tumé cacun' noco' rihaan rcutze rej x'nuj Jesucristó ro', nij ca'mii so' rihaan Jesucristó, cataj so':

—Sij ca'née Diose tinanii man yuvii rihaan sayuun mé so', rá so' na'. Me che'é ne tinanii so' man taran' ní ga —taj so' rihaan Jesucristó a.

⁴⁰ Tzaj ne yo'ó síi tumé cacun' ro', cataj so' rihaan tuvi' so':

—Nihánj me se cyaan vaa sayuun ran' ní' ga sayuun ran' síi nihánj nanj á. Ne me che'é ne chu'ví' so' a doj ni'yaj so' Diose ga.

⁴¹ Dan me se xa' ní', tzaj ne vaa che'é cavi' ní', ne ran' ní' sayuun che'é cacun' tumé ní', tzaj ne xa' síi nihánj, tzaj ne taj vaj a doj se chi'ii ne qui'yaj síi nihánj a ma' —taj yo'ó síi tumé cacun' yo' rihaan tuvi' so' a.

⁴² Gaa ne cataj so' rihaan Jesucristó a:

—Se quini'yón so' racuáj so' manj, asa' guun che'e so' guun chij so' a ma' —taj so' rihaan Jesucristó a.

⁴³ Gaa ne cataj Jesucristó rihaan so' a:

—Ya ya cataj xna'anj 'unj rihaan so' cuano se vaa güii cuan' me se cayáan so' ga 'unj rej sa' ndo'o rej ne nij síi sa' rihaan Diose ei —taj Jesucristó rihaan so' a.

⁴⁴ Veé dan, ne caxuj me yo', ne guun rmi' rihaan nu' chumi, ne yo'o guun rmi' rihaan chumi ndaa quisíj aga' va'nuj rej anoco' güii a.

⁴⁵ Ne guun rmi' rihaan güii, ne sin' nu' yatzíj cortiná noco' rá nuví noco a.

⁴⁶ Gaa ne nucuaj ndo'o caguáj Jesucristó, cataj so':

—Nacaj so' nimanj, Ataj Chij —taj so', ne veé dan cavi' so' a.

⁴⁷ Dan me se quene'en tanuu capitán se vaa guun, gaa ne ve'é uxrá ca'mii so' che'é Diose, ne cataj so':

—Xa' síi nihánj, tzaj ne ya ya síi sa' me so' nanj á —taj tanuu yo' ni'yaj so' man Jesucristó a.

⁴⁸ Dan me se quene'en taran' nij yuvi cunuu chre' rej yo' se vaa guun, gaa ne go' nij so' se-cuxru'

nij so' rucuaa nij so' che'é se nanó ndo'o rá nij so',
gaa ne canicaj nij so' ca'anj nij so' chuman' a.

⁴⁹ Ne canicun' cunudanj nij tuvi' Jesucristó rej
gan' doj, ne ta'aj nij so' me chana cuno se-nana
Jesucristó asij cavii Jesucristó estadó Galilea a. Ne
ni'yaj taran' nij so' man Jesucristó a.

*Nana nihánj taj xna'anj se vaa cachin' nii man
Jesucristó rque yu'uj yuvej a*

⁵⁰ Ne vaa 'o sí cu'naj José, ne yo'o tuvi' nij sí uun
chij rihaan nij yuvii israelitá me so' a. Ne sí sa' me
so', ne sí nicā nimán me so',

⁵¹ ne ne vaa rá so' daj se vaa rá yo'ó nij sí uun
chij rihaan nij yuvii israelitá ma'. Ne guun rá so'
qui'yaj so' ndaa vaa qui'yaj yo'ó nij so' ma'. Ne sí
cavii chuman' Arimatea yo'o chuman' naj estadó
Judea me so' a. Ne so' me sí me ndo'o rá guun
chij Diose rihaan chumii nihánj a.

⁵² Dan me se ca'anj so' rihaan sí cu'naj Pilato,
ne cachín ni'yaj so' rihaan sí cu'naj Pilato se vaa
ca'vej rá sí cu'naj Pilato cachin' so' man Jesucristó
a. Dan me se ca'vej sí cu'naj Pilato,

⁵³ gaa ne ca'anj sí cu'naj José, tinanij so' man
Jesucristó, ne nacutáj so' yatzij mantá xraá Je-
sucristó, ne caxrij so' man Jesucristó rque yu'uj
yuvej rej nuvi' a 'ó xngá naj a.

⁵⁴ Veé danj qui'yaj nij so' güii 'yaj chuvii nij yuvii
israelitá che'é güii naraan rá nij so', ne veé danj
quisij güii naranj rá nij so' a.

⁵⁵ Ne canoco' nij chana cavii estadó Galilea ga
Jesucristó rej xco sí cu'naj José, ne quene'en nij
chana yu'uj rej caxrij sí cu'naj José man Jesu-
cristó,

⁵⁶ gaa ne canicaj nij chana chuman' Jerusalén, ne qui'yaj chuvii nij chana yo'óo gun' daj do', squíi xlá mirra do', caxrii nij chana man Jesucristó rá nij chana a.

Nana nihánj taj xna'anj se vaa cunuu i'na' uún Jesucristó a

Dan me se ma'an güii naránj rá nij yuvii israelitá me se naránj rá nij chana a.

24

¹ Ne taxrej güii cotungó, gaa ataa doj quisij güii, me se ca'anj nij chana rej taj yu'uj, ne nicaj nij chana nij rasuun gun' daj se vaa aj qui'yaj chuvii nij no' a.

² Gaa ne quene'en nij chana se vaa naj yaníj yuvej aráan tu'va yu'uj naj Jesucristó a.

³ Ne gaa catúj nij chana rá yu'uj, ne ne nari' nij chana man Jesucristó sij 'nij ra'a man ní' a ma'.

⁴ Dan me se caráya'anj ndo'o nij chana, ne nicun' vij snó'o rihaan nij chana, ne roj snó'o yo' me se yatzíj chuguun uxrá nuû roj so' a.

⁵ Dan me se kuchu'vi' uxrá nij chana, ne ca'anj cayáán ruj nij chana, ne cuchruj nij chana rihaan nij chana rihaan yo'óo a. Gaa ne cataj roj snó'o rihaan nij no':

—Taj che'é nano' soj man síi vaa i'na' rej naj nij síi cavi' ma'.

⁶ 'Q se nuvi' so' naj nihánj a ma'. 'Q se cunuu i'na' uún so' nanj á. Dan me se nanuj rá soj se vaa cataj so' gaa vaj nij soj estadó Galilea, ne cataj xna'anj so' rihaan soj se vaa

⁷ xa' so' sij ca'née Diose nicaj yu'unj man yuvii, tzaj ne vaa che'é tacuachén nii man so' rihaan síi

tumé cacun', ne cachron nij so' man so' rihaan rcutze, ne cachén va'núj güii, gaa ne cunuú i'na' uún so', taj so' a —taj roj snó'o yo' rihaan nij chana a.

⁸ Dan me se nanuj rá nij chana nana ca'mii Jesucristó a.

⁹ Gaa ne curihanj nij chana yu'uj yujej, ne canicaj nij chana yo' chuman' Jerusalén, ne cataj xna'anj nij chana nu' se vaa quene'en nij no' rihaan xaan nij apóstol cune' Jesucristó man do', rihaan yo'ó nij sí tucu'yón se-nana Jesucristó uún do' a.

¹⁰ Dan me se va'núj nij chana me ní cu'naj Mariá Magdalena do', ní cu'naj Juana do', ní cu'naj María nii Jacobo do', ne va'núj nij no' ga yo'ó nij chana ro', cataj xna'anj rihaan nij apóstol che'é nu' se vaa quene'en nij no' a.

¹¹ Ne gaa cuno nij apóstol cune' Jesucristó man se-nana nij chana, gaa ne nana snúú rma'an me nana yo', rá nij apóstol cune' Jesucristó man, ne ne cuchuman rá nij so' se-nana nij chana a.

¹² Tzaj ne naxumaan sí cu'naj Pedró, ne cavii so' cunanj so' ca'anj so' ndaa yu'uj yo', ni'yaj so' a. Dan me se canicun' nituu so', ni'yaj so' rque yu'uj, tzaj ne nuvi' Jesucristó naj rque yu'uj quene'en so' a. Maan yatzíj mantá uun naj, ni'yaj so' a. Gaa ne cavii so' quinan' so', ne caráya'anj so' che'é nu' se vaa guun a.

Nana nihánj taj xna'anj se vaa ca'mii Jesucristó ga vij tuvi' nij sí tucu'yón se-nana so' gaa vaj roj so' chrej ndaa chuman' cu'naj Emaús a

13 Dan me se vij tuvi' nij sí tucu'yón se-nāna Jesucristó ro', vaj roj so' chrej veé maan güii co-tungó yo', ca'anj roj so' ndaa 'o chuman' naj xaan kilómetro ga chuman' Jerusalén, ne Emaús cu'naj chuman' yo' a.

14 Ne nanó roj so' cuentó che'é nu' se vaa quiran' nij tuvi' Jesucristó a.

15 Dan me se nanó roj so' cuentó, ne nuchruj raa roj so' daj quiran' Jesucristó, ga ne ma'an Jesucristó quinichrun' rihaan roj so', ne chéé Jesucristó ga roj so' a.

16 Tzaj ne ne ca'vee cunu yaan roj so' man Jesucristó ma'.

17 Ga ne cataj Jesucristó rihaan roj so' a:

—Chéé roj soj nanó roj soj cuentó, ne me che'é nanó roj soj cuentó ga tuvi' roj soj, ne me che'é nanó ndo'o rá roj soj ga —taj so', xná'anj so' man roj so' a.

Ne dan me se canicun' roj so', ne nanó ndo'o rá roj so' a.

18 Dan me se yo'o so' me sí cu'naj Cleofas, ne cataj so' rihaan Jesucristó a:

—Cunudanj nij sí aran' chuman' Jerusalén ne'en daj vaa guun chuman' Jerusalén güii cachén nihánj ei. Ne me che'é daj 'o ruún so' me sí ne ne'en daj vaa guun güii cachén nihánj ga —taj so', xná'anj so' man Jesucristó a.

19 Ga ne:

—Daj guun chuman' Jerusalén ga —taj Jesucristó, xná'anj so' man roj so' a.

Ga ne cataj roj so' rihaan Jesucristó a:

—Nu' se vaa quiran' Jesucristó sí cavii chuman' Nazaret a. Ne so' me sí guun sí nata' se-nāna

Diose rihaan nij yuvii, ne síi uun nucaj ndo'o qui'yaj suun me so', ne síi cavii ndo'o nana sa' che'é Diose tu'va me so' rihaan cunudanj nij yuvii a.

²⁰ Ne dan me se ca'ne' nij xrej ata suun nocoo doj ca'ne' nij síi nicaj suun ca'ne' suun se vaa cavi' so', gaa ne cachrón nii man so' rihaan rcutze,

²¹ ne dan me se guun rá núj se vaa so' me síi tinanii man ní' sij israelitá rihaan sayuun, tzaj ne quiran' so' cunudanj, ne nihánj me se síj va'nuj güii cavi' so' adonj.

²² Tzaj ne caráya'anj ndo'o núj, qui'yaj chana tuvi' núj a. 'O se taxrej cuan' me se ca'anj ni'yaj nij chana yu'uj cachin' nii man so',

²³ tzaj ne dan me se ne nari' nij chana man so' a ma'. Che'é dan ca'na' uún nij chana rihaan núj, ne cataj nij chana se vaa ndaa vij se-mozó Diose naqui'yaa rihaan nij no', ne cataj roj se-mozó Diose se vaa vaa i'na' Jesucristó, taj nij chana rihaan núj nanj adonj.

²⁴ Dan me se cavii 'o vij tuvi' núj ca'anj ni'yaj roj so' yu'uj yo', tzaj ne quene'en roj so' nu' ndaa vaa cataj xna'anj nij chana rihaan núj, tzaj ne ne nari' roj so' man ma'an Jesucristó a ma' —taj roj so' rihaan Jesucristó a.

²⁵ Gaa ne ma'an Jesucristó cataj rihaan roj so' a: —Dan me se síi ne acaj cuentá me soj, ne síi ne niha' rá cuchuman rá nu' se-nana nij síi nata' se-nana Diose gaa naá me soj nanj á.

²⁶ 'O se ne ne'en soj se vaa xa' síi ca'née Diose tinanii man yuvii rihaan sayuun, tzaj ne vaa che'é ndo'o quiran' so' sayuun ne catuu so' rej guun chij ndo'o so' a —taj Jesucristó rihaan roj so' a.

27 Gaa ne dan me se guun che'e so' ca'mii so' che'é se-naṇa sí cu'naj Moisés do', che'é se-naṇa cunudañj nij sí nata' se-naṇa Diose do', gaa ne cataj xna'anj so' rihaan roj so' daj taj nu' danj Diose che'é ma'an so' a.

28 Dan me se quinichrun' nij so' tu'va chuman' rej ca'anj roj so', gaa ne Jesucristó me se ndaa rá se 'yaj sí ca'anj chuman' naj gan' doj ro', qui'yaj so' a.

29 Gaa ne terquee roj so' man Jesucristó a:

—Quinaj cachrí so' ga rój, ne aj ca'anj güii, ne vaj so' chrej, ne guun rmi' nanj á —taj roj so' rihaan Jesucristó a.

Gaa ne quináj so' ga roj so', ne catúj so' chuman' carañ so' ga roj so' a.

30 Dan me se yáán nij so' cha xti'no nij so', ne nicaj Jesucristó rachrúún, ne nago' so' gracia rihaan Diose che'é rachrúún, gaa ne cuxra' ta'aj so' rachrúún, rqué so' cha roj so' a.

31 Dan me se caxrj rá roj so', ne cunuu yaan roj so' man Jesucristó, ne veé dan nu' ca'anj ni'ya Jesucristó rihaan roj so', ne ne ca'vee quene'en roj so' man so' a ma'.

32 Gaa ne cataj roj so' rihaan tuvi' roj so' a:

—Veé ya ma'an Jesucristó me yo' asan. 'O se gaa ca'mii so' ga ní' gaa vaj ní' chrej do', gaa cataj xna'anj so' che'é danj Diose do', gaa ne guun niha' uxrá nimán ní', ne ndaa tiquisii ma'an nimán ní', qui'yaj so' a —taj roj so' rihaan tuvi' roj so' a.

33 Gaa ne maan orá dan naxumaan roj so', ne canicaj roj so' ca'anj uún roj so' chuman' Jerusalén, gaa ne cuchi' roj so' yo', gaa ne aj cunuu chre' xaan

nij sí tucu'yón se-nanā Jesucristó gā yo'ó tuvi' nij so',

³⁴ ne nij so' ro', cataj rihaan roj so' se vaa ya aj cunuu i'na' uún sí 'nij ra'a man ní', ne sí cu'naj Simón me sí quene'en man so', taj nij so' rihaan roj so' a.

³⁵ Gaa ne roj so' ro', cataj xna'anj daj guun gaa quene'en roj so' man Jesucristó gaa vaj roj so' chrej, ne cataj xna'anj roj so' se vaa ndaa cuxra' ta'aj so' rachrúun gaa cunuu yaan roj so' man Jesucristó, taj roj so' a.

Nanā nihánj taj xna'anj se vaa curuvi' Jesucristó rihaan xaan nij sí tucu'yón se-nanā so' gā tuvi' nij so' a

³⁶ Dan me se gaa nanó nij so' cuentó che'é nu' rasuun dan, ne nu' curuvi' Jesucristó tanuu sca'núj nij so', ne:

—Dínj gaa nimán soj á —taj so' rihaan nij so' a.

³⁷ Gaa ne cuchu'vi' ndo'o nij so', ne ta'naj me sí nicun' rihaan nij so', rá nij so' a.

³⁸ Gaa ne cataj Jesucristó rihaan nij so' a:

—Me che'é nanó ndo'o rá soj, ne me che'é uun vij rá soj gā.

³⁹ Nì'yaj soj ra'aj nì'yaj soj tacój nì'yaj soj, ne xcaj soj cuentá se vaa mā'anj me á. Xa' ta'naj, tzaj ne taj nee man so' dō', taj cúu man so' dō' ma' —taj Jesucristó rihaan nij so',

⁴⁰ ne tihaan so' ra'a so' dō', tacóo so' dō', rihaan nij so' a.

⁴¹ Dan me se ne ca'vee cuchuman rá nij so' se vaa ma'an Jesucristó me a. 'Q se guun niha' uxrá rá

nij so', ne ca'anj uxrá rá nij so' a. Che'é dan cataj Jesucristó rihaan nij so' a:

—Vaa doj se chá rihaan soj na' —taj so', xná'anj so' man nij so' a.

⁴² Gaa ne rqué nij so' 'o xco' nee xcuaj ri'ya do', doj scuü xtaan do', man so',

⁴³ gaa ne nicaj so', ne chá so' ni'yaj nij so' a.

⁴⁴ Gaa ne cataj so' rihaan nij so' a:

—Nihánj me nana ca'mii 'unj rihaan nij soj gaa vaj 'unj ga soj, se vaa cataj 'unj vaa che'é quisij ya 'unj nu' nana a'mii che'é 'unj nana no rihaan yanj no se-tucuanj Moisés do', yanj no se-nana nij sí nata' se-nana Diose gaa naá do', yanj no nij chra' salmo do' a —taj so' rihaan nij so' a.

⁴⁵ Gaa ne guun nucuaj nij so' xcaj nij so' cuentá che'é nu' danj Diose, qui'yaj so',

⁴⁶ ne cataj so' rihaan nij so':

—Veé danj taj danj Diose se vaa xa' 'unj sij ca'née Diose tinanii man yuvii rihaan sayuun, tzaj ne quiran' ma'anj sayuun, ne cavi' 'unj, ne cachén va'nuj güii, gaa ne cunuü i'na' uún 'unj a.

⁴⁷ Gaa ne ca'mii natáj nii rihaan cunudanj nij yuvii man rihaan chumii se vaa che'é se vaa ca'ná' 'unj ro', che'é dan sese canicaj nimán nij yuvii canoco' nij yuvii chrej sa', gaa ne tinavij Diose cacun' tumé nij so' a. Dan me se asino ca'mii natáj nii nana dan chuman' Jerusalén, gaa ne ca'mii natáj nii nu' rihaan chumii adonj.

⁴⁸ Ne nij soj ro', me nij sí quene'en nu' rasuun qui'yáj ne testigó guun soj,

⁴⁹ ne nihánj me se rque 'unj Nimán Diose rihaan soj ndaa vaa cata' tu'va ma'an Diose gaa naá a.

Dan me se yo'o cayaán soj chuman' Jerusalén nihánj ndaa se nari' nucuj nimán soj qui'yaj Diose á —taj Jesucristó rihaan nij so' a.

Nana nihánj taj xna'anj se vaa cavii Jesucristó xta' a

⁵⁰ Gaa ne nicaj Jesucristó man nij so', ca'anj so' ndaa tu'va chuman' Betania, gaa ne naxcaj so' ra'a so', ne cachín ni'yaj so' rihaan Diose se vaa ve'é racuúj Diose man nij so', ne cavii sa' nij so' a.

⁵¹ Ne nu' ca'mii so' danj che'é nij so', ne nu' cavii so' xta' ca'anj so' a.

⁵² Dan me se na'víj nij so' rihaan so', gaa ne canicaj nij so' ca'anj uún nij so' ndaa chuman' Jerusalén, ne guun niha' uxrá rá nij so',

⁵³ ne yo'o ca'anj nij so' nuví nocoo, ne nata' nij so' rihaan nij yuvij se vaa sa' uxrá qui'yaj Diose a. Veé danj gaa ya ei.

**Se-nānā Diosē nanā sã' me rá catũũ nimán ní'
a
New Testament in Triqui, Copala (MX:trc:Triqui,
Copala)**

copyright © 1987 Wycliffe Bible Translators, Inc.

Language: Triqui, Copala

Translation by: Wycliffe Bible Translators, Inc.

Triqui, Copala [trc], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Triqui, Copala

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

3a8f2838-fe9f-5490-8d78-a7bbfddab871